

I

---

# KASUÁLA- DOAIMMAHUSAT



GÁSTA

# Máná gásta

Dát minsttar geavahuvvo gásttašettiin vuollái 15-jahkásaš máná. Árranuora gásttašettiin sáhtta geavahit dán mistara dahje nuora ja ollesolbmo gástta minstara.

Girku lahttu galgá fuolahit mánás gásttašeames almmá dušši ájahallama (Girkoortnet 2: 15). Máná oskkolaš dilis mearredettiin galgá váldit vuhtii čuovvovačča: Vuollái viđanuplotjahkásaš máná sáhtta šaddat girku lahttun, juos ankke nubbi su vanhemiin dahje okta su fuolaheaddjiin gullá girku. Máná oskkus mearredeaba ovtas su fuolaheaddjit. Juos soai eaba bastte soahpat das, sáhtta máná eadni jagi siste máná riegádeames okto mearredit máná searvamis oskkoldatovttastupmái. Juos duopmostuollu lea máná fuolaheames ja deaivvadanrievttis addojuvvon lága (361/1983) 9 § 3 momeantta vuodul mearredan vanhemiid rivttiin nuppe láhkai, de galgá čuovvut duopmostuolu mearrádusa. (Oskku friddjav. L 3§). 12-14-jahkásaš máná gásttašeapmái dárbbášuvvo su iežas girjjálaš miehtan. (Oskku friddjav. L 3 §).

Mánás galget leat ankke guokte risvánhema, guđet leat konfirmerejuvvon evangelalaš-luteralaš oskku dovddasteaddji girku lahtut. Dáid lassin risvánhemis sáhtta leat maid olmmoš, guhte gullá eará kristtalaš girku, mii dohkkeha evangelalaš-luteralaš girku doaimmahan gástta. Uhcimustá guovttis risvánhemiin dahje guokte eará duođasteaddji galget leat mielde gástadoaimmahusa. (Girkoortnet 2: 17.) Eará kristtalaš girku dahje oskkoldatovttastumi lahtus lea riekti doaimmat risvánhemis, juos girkolaščoahkkin lea dohkkehan duon girkuin dahje oskkoldatovttastumiin dahkkojuvvon soahpamuša. (GO vuosttas logu 4 § 2 mom.)

Báhppa galgá áiggil ovdal gástadoaimmahusa váldit oktavuoda máná ruktui. Dalle son ságasta vanhemiiguin gástta mearkkašumis ja soahpá geavatlaš ortnegiin. Báhppa galgá ságastallat maiddái máná namas, dasgo searvegoddi galgá čilget nama lágalašvuoda ja doaimmahit dieđu ájahalakeahtta álbmotregistarii. (Namma-láhka 32 a § .)

Gásta doaimmahuvvo girkus, ruovttus dahje eará sajis dađe mielde go báhppa ja máná vanhemat das sohpet (Girkoortnet 2: 16).

Čáhci njarrejuvvo gástagerrii ovdal doaimmahusa dahje aiddo ovdalaš gástagohčuma (čuokkis 11).

Gástadoaimmahusa boddii sáhtta cahkkehit beassášgintala.

Musihka válljemis galgá váldit vuhtii doaimmahusa ipmilbálvaluslágan luonddu.

Gástta sáhtta merket vihahan- dahje bearašbiibbalii.

# I Álggahus

---

## 1. Sálbma

---

## 2. Álgosivdnideapme

---

Buressivdnádusa ja vuorrodearvvahusa lea vejolaš lohkat dahje lávlut.

**Buressivdnádus**

**B** Áhči ja + Bártni ja Bassi Vuoiŋŋa nammii.

**S** Ámen.

**Vuorrodearvvahus**

**B** Hearrá lehkos dinguin.

**S** Nu son lehkos maddái du vuoiŋŋain.

## 3. Álggahansánit

---

Báhppa ráhkada álggahansániid ieš dahje geavaha čuovvovaš molssaeavttuid.

**B** Ráhkis kristtalaččat. Ipmil lea addán dudnuide, NN ja NN, dán mánáža. Kristusa báhkoma mielde doai leahppi buktán su bassi gástii. Das Ipmil gohčču su nama mielde ja skenke bestojumi.

**DAHJE**

**B** Gástaávvudeaddjit. Jesus gohčui mánáid lusas ja buressivdnidii sin. Beastámet váldá bassi gásttas iežas oktavuhtii dán máná ja skenke sutnje agálaš eallima. Jesus lea lohpidan: ”Dat gii bohtá mu lusa, su in eisege áje eret” (Joh 6: 37).

**DAHJE**

**B** Ráhkis kristtalaččat. Dat guhte dáhttu beassat sisa almmi riikii, galgá riegiidit oddasis čázis ja Vuoiŋŋas. Hearrámet Jesus Kristus lea ieš

ásahan midjiide bassi gástta odda eallima mearkan ja seailan. Gásttas mii bassot buhtisin suddus ja gárvvohuvvot odda eallimii. Jesus cealká: ”Mun lean boahtán vai oččošedje eallima, valljugas eallima” (Joh 10: 10).

## 4. Biibbalsálbma

---

Sáhtta atnit maiddái girkojagi čuovvu dahje eará biibbalsálmmaid. Sálmmaid sajis sáhtta geavahit bearraša sotnabeivve sálbmavuorrolávлага (geahča Ipmilbálvalusaid girji).

Biibbalsálmma sáhtta lohkat dahje lávlut. Dan álggus ja loahpas sáhtta leat antifona.

Biibbalsálbmii laktojuvvo Uhca gudni. Dan sajis sáhtta atnit čuovvovaš sálmmaid vearssaid: 5:4, 66:3, 136:7, 218:7, 336:8, 340:8, 341:10, 348:6, 379:6. Uhca gudni guđđojuvvo eret 5. fástoáiggi sotnabeivvi rájes.

### Antifona

Bohtet geahččat Ipmila daguid,  
su imašlaš daguid olbmuid gaskkas.

Sál 66: 5

### DAHJE

Dát lea dat beaivi man Hearrá lea dahkan,  
ávvudehkot ja illudehkot!

Sál 118: 24

### Biibbalsálbma

Hearrá, Ipmileamet,  
man hearvái lea du namma miehtá eatnama,  
don lebbet hearvásvuodat albmái.

Uhcahaččaid ja njuoratmánáid njálmmis  
don leat vuodđudan alcesat suoji vašálaččaidat vuostái,  
bissehit juohke vuostálasti ja mávssaheaddji.

Go mun oainnán du almmi, du suorpmaid dagu,  
mánu ja násttiid maid don leat ráhkadan,

de mii lea dalle olmmoš, go don muittát su,  
olbmománna, go don anát sus fuola?

Don dahket su goasii Ipmila láhkásažžan

ja kruvnnidit su hearvásvuodain ja gudniin.  
Hearrá, Ipmileamet,  
man hearvái lea du namma miehtá eatnama.  
Sál 8: 2–6, 10

### DAHJE

Rámidehket Hearrá, oppa eanan.  
Bálvalehket Hearrá ilus,  
bohtet su muođuid ovdii ávuin!  
Dovdet ahte Hearrá lea Ipmil!  
Son lea sivdnidan min, ja mii leat su,  
su olbmot ja su sávzzat maid son geahččá.  
Mannet su poarttaid čada giittoslávlagiin,  
mannet su ovdašiljuide máidnunlávlagiin.  
Giitet su ja máidnot su nama.  
Dasgo Hearrá lea buorre,  
su árbmugasvuohta bistá agálaš áigái,  
su oskkáldasvuohta sogas sohki.  
Sál 100

### DAHJE

Mun bajidan čalmmiidan váriid guvlui:  
Gos bohtá munnje veahkki?  
Mu veahkki bohtá Hearrás,  
almmi ja eatnama sivdnideaddjis.  
Ii son divtte du juolggi suoibut,  
du goziheaddji ii oadestuva.  
Ii son oadestuva iige nohka,  
Son, guhte lea Israela goziheaddji.  
Hearrá lea du goziheaddji,  
Hearrá lea du suoivvan du olgeš gieda bealde.  
Beaivváš ii vahágahte du beaivet  
iige mánnu ihkku.  
Hearrá várjala du buot bahás,

son várjala du heakka.

Hearrá várjala du vuolgima ja du boahtima  
dálážis gitta agálaš áigái.

Sál 121

## DAHJE

Hearrá, don leat sivdnidan mu monemuččaid,  
don goddet mu eatniheakka siste.

Mun giittán du go lean sivdniduvvon ovddolaš láhkái.

Ovddolaččat leat du dagut, mu siellu diehtá dan sakka bures.

Mu dávttit eai lean čihkkojuvvon du ovddas

go mun sivdniduvvojin čiegusvuodas,

go mun duddjojuvvon eatnama čienalvuodas.

Don oidnet mu juo dalle go ledjen ohki,

du girjái ledje juo čállojuvvon buot mu beaivvit

ovdal go oktage dain lei boahrán.

Sál 139: 13–16

## Uhca gudni

Gudni Áhččái ja Bárdnái

ja Bassi Vuignii,

nugo lei álggus, dál lea ja álo

agálašvuodas agálašvuhtii. Ámen.

Antifona geardduhuvvo.

## 5. Gažaldagat dahje ávžžuhus

---

### Gažaldagat

**B** Vánhenguovttos, man nama doai leahppi addán mánnái?

Vástádus:

NN (ovdanamat).



**B** Vánhenguovttos, dáhttubeahttigo, ahte son gásttašuvvo kristtalaš oskui?

Vástádus:

De dáhtun.

**B** Vánhenguovttos ja risvánhemat, dáhttubehtetgo ovttas searvegottiin fuolahit das, ahte NN (ovdanamat) oažžu kristtalaš bajásgeassima?

Vástádus:

De dáhtun.

### **DAHJE**

**B** Doai, vánhenguovttos, leahppi addán mánnái namman NN (ovdanamat). Dáhttubeahttigo, ahte son gásttašuvvo kristtalaš oskui?

Vástádus:

De dáhtun.

**B** Vánhenguovttos ja risvánhemat, dáhttubehtetgo ovttas searvegottiin fuolahit das, ahte NN (ovdanamat) oažžu kristtalaš bajásgeassima?

Vástádus:

De dáhtun.

### **Ávžžuhus**

**B** Doai, vánhenguovttos, leahppi addán mánnái namman NN (ovdanamat). Otneson gásttašuvvo kristtalaš oskui. Vánhenguovttos ja risvánhemat, bassi gásta geatnegahtá din ovttas searvegottiin fuolahit su kristtalaš bajásgeassimis.

## **6. Ruossamearka**

---

Báhppa dahká ruossamearka máná gállui ja raddái ja dadjá:

Váldde bassi ruossamearka du gállui + ja du raddái + duodaštussan das, ahte russiinávlejuvvon ja bajásčuožžilan Jesus Kristus lea du lonistan ja gohččon du su máhttájeaddjin.

Báhppa joatká:

Árbmugas Ipmil lea Bártnis Jesusa Kristusa bokte dahkan du friddjan suttu, jápmima ja bahá válldis. Addos son sutnje fámu juohke beaivve jápmi eret suttus ja callit Kristusis.

## DAHJE

Báhppa dadjá:

Árbmugas Ipmil. Don okto beasttát min buot bahás. Luoitte NN (ovdanamat) luovusin seavdnjatvuoda válldis. Čále su nama callima girjái ja láide su čuovggastat.

Báhppa dahká ruossamearkka máná gállui ja raddái ja dadjá:

Váldde bassi ruossamearkka du gállui + ja du raddái + duodaštussan das, ahte russiinávlejuvvon ja bajásčuožžilan Jesus Kristus lea du lonistan ja gohččon du su máhttájeaddjin.

## 7. Rohkos

---

Rohkosávžžuhusa ja searvegotti ámena lea vejolaš lohkat dahje lávlut. Ávžžuhusa manjá sáhtá leat oanehis jaskes rohkos.

### **B** Rohkadallot.

#### 1. Buotveagalaš Ipmil.

Gásttas don divttát du árpmu šávvat badjelasamet.

Gástta bokte don dagat min friddjan

suttu, jápmima ja bahá válldis

ja čanat min Kristusii.

Mii rohkadallat:

Skenje Bassi Vuoinŋat dán mánnái,

guhte lea buressivdniduvvon bestojumi mearkkain.

Veahket su oskut dutnje,

nu ahte son calášii mánnánat

ja beasašii oktii du lusa.

Gula min Beastámet Jesusa Kristusa dihtii.

2. Ipmil, almmálaš Áhččámet,  
mii rámidit du eallima attáldagas.  
Gásttas don attát midjiide du árpmu ja ráhkisvuoda.  
Váldde oapminat dán máná, guhte lea buressivdniduvvon  
ruossamearkkain.  
Lehkos Bártnát Jesusa Kristusa soabahanbargu su suodjin.  
Divtte Bassi Vuoiŋŋa ássat sus,  
nu ahte son rávásmuvašii oskkus ja ráhkisvuodas.  
Gula min Jesusa Kristusa dihtii.
3. Buotveagalaš Ipmil.  
Mii giitit du dán mánás,  
du sivdnidanbarggu attáldagas.  
Mii giitit boahttevuodas ja doaivvus, man don attát sutnje.  
Giitu das, ahte almmi riika gullá mánáide.  
Gásttas don válddát min suodjásat ja searvegottát oktavuhtii.  
Don láidet min Bassi Vuoiŋŋainat ja sániinat.  
Divtte dán máná šaddat oasálažžan buot bestojumi attáldagain  
ja veahket su rávásmiit Jesusa Kristusa máhttájeaddjin.  
Doarjjo su fámuinat  
ja várjal su oskkus.  
Divtte su árbet agálaš eallima.  
Dán mii rohkadallat Hearrámet Jesusa Kristusa namas.
4. Árbmugas Ipmil, almmálaš Áhččámet.  
Mii giitit du gástta attáldagas.  
Mii giitit, ahte gásttas suddut sihkkovuođot eret Jesusa nammii  
ja du Vuoiŋŋa riegádahtta min oddasis.  
Mii rohkadallat:  
Váldde dán máná bassi gásttas du oktavuhtii.  
Divtte, ahte son friddjan suddu, jápmima ja seavdnjadasa válddis  
bálvalivččii mánnánat du oppa eallimis áigge.  
Atte sutnje oktii ruovttu du luhtte almmis.  
Gula min Jesusa Kristusa dihtii.

5. Ipmil, almmálaš Áhččámet,  
mii giitit du,  
ahte don juo eallima álggus  
leat addán dán mánnái valljugas attáldagaidat.  
Dál mii rohkadallat:  
Gárvvot su Bártnistat Jesusis gástta lihtu buhtisvuhtii ja šearratvuhtii.  
Divtte su oahppat dovdat  
Beasti jápmima ja bajásčuožžileame fámu,  
mii birasta min juo gásttas.  
Veahket su bálvalit eallimisttis du ja lagamuččaidis.  
Divtte bassi engeliiddát mieduštít su beivviid nogadettiin  
šearratvuoda ruktui.  
Dán mii bivdit Bártnát Jesusa Kristusa namas.
6. Ipmil, Áhččámet.  
Don attát midjiide eallima attáldahkan.  
Giitu dutnje das,  
ahte don áittardat ja suodjalat dán máná.  
Váldde su gástta árbmolihttui,  
mas Jesusa ráhkisvuohta lea duodalaš  
eallima juohke muttus.  
Son lea rašši ja headju,  
leage don suinna ja guotte su salastat.  
Čuvge oppa su eallima.  
Gula min rohkosa Jesusa Kristusa dihte.
- S** Ámen.

# II Sáni

---

## 8. Biiballohkan

---

Mánáid evangeliuma (Mark. 10: 13–16) ovdal lea vejolaš lohkat mannu čuovvovaš čálabihtáin. Sáhtá atnit maid girkojagi čuovvu dahje eará čálabihtáid.

Lohkki almmuha čálabihtá.

Biiballohkamii lea vejolaš laktit vástádusa (biibbalsálbma, sálbma, lávlla, čuojanas-musihkka dahje jaskes mediteren).

Jes 43: 1

Rom 6: 3–4

Ehpetgo dii diede, ahte mii buohkat geat gásttašuvvuimet Kristusii Jesusii, gásttašuvvuimet su jápmimii? Mii nappo hávdáduvvuimet suinna go gásttašuvvuimet jápmimii, vai beasašeimmet eallit odđa eallima, nugo Áhči hearvásvuohta bajás-čuožžáldahtii Kristusa jábmiid luhtte.

Gal 3: 26–28

Dasgo dii lehpet buohkat Ipmila mánát go oskubehitet Kristusii Jesusii. Buohkat dii, geat lehpet gásttašuvvon Kristusii, lehpet gárvodan Kristusiin. Dás ii leat juvddálaš dahje greikalaš, šlávva dahje isit, olmmái iige nisu, dasgo dii lehpet buohkat okta Kristusis Jesusis.

Tit 3: 4–5

Muhto go min Ipmila ja beasti buorre vuotta ja ráhkisvuotta olbmuide almmustuvai, de son besttii min, ii min vanhurskkis daguid dihtii, muhto váibmoládisvuodas dihtii; son besttii min dainna lágguin mas Bassi Vuoigŋa riegádahtta min oddasis ja odasmahtta min.

Dušše soapmásat, namalassii gávccis, bestojuvvojedje árkkas, go čáhci guttii dan. Dát čáhci vástida gástta mii dál beastá din. Dat ii buhtis rupmaša olgguldas duolvvas, muhto lea buori oamedovddu lihttu Ipmiliin.

Sii gudde uhca mánážiid Jesusa lusa vai son guoskkahivččii daid, muhto máhttájeaddjit šiggo sin. Go Jesus oinnii dan, de moaráhuvai ja celkkii sidjiide: ”Diktet uhca mánážiid boahtit mu lusa, alletge hehte sin! Dasgo Ipmila riika gullá dakkáraččaide. Duodaid, mun cealkkán didjiide: Dat guhte ii vuostáiváldde Ipmila riikka nugo uhca mánáš, ii eisege beasa dan sisa.” Ja son válddii sin sallas, bijai giedaidis sin ala ja buressivdnidii sin.

## 9. Sárdni

---

Báhppa doallá friddja sárdni dahje goappánu čuovvovaš molssaeavttuin. Báhppa sáhtá ovtas vanhemiiguin válljet mánnái biibbalvearssa dahje gurgadasa, mii giehtadallovuođi sárdnis ja mii čállojuvvo bajás gástaduodaštussii. Gástasárdnis galggašii váldit vuhtii iešguhtege gástadilálašvuoda ja giehtadallat ovdamearkka dihte čuovvovaš fáttáid:

- eallima attáldat (sivdnideapme), Kristusa soabahanbargu (lonástus), Bassi Vuoiŋŋa attáldat (basuheapme)
- searvegotti oktavuhtii čatnan
- Jesusa maŋisboahttin rávásmuvvan ja eallin
- kristtalaš bajásgeassin vanhemiid ja risvánhemiid bargun

Ráhkis ustibat. Odne mii giitit dán mánáš. Nubbi erenoamáš ilu fáddá dán ávvubottus lea dat attáldat, man mánná oažžu gásttas: Golbmaoktalaš Ipmil váldá su oapminis ja dahká suinna agálaš lihtu. Gásttašuvvon olmmožin son oažžu oppa eallimis áigge dorvvastit almmálaš Áhči ráhkisvuhtii. Apoasttal Bávlos cealká: ”Buohkat dii, gudet lehpēt Kristusii gásttašuvvon, lehpēt gárvodan Kristusá badjalasadet.” (Gal 3: 27) Kristusá attáldagas ja su lagašvuodas muitala vilges gástabivttas. Gásttas doaibmá

Ipmila Bassi Vuoiŋŋa. Bassi Vuoiŋŋa veagas dát mánná rávásmuvvá Kristusa máhttájeaddjin ja searvegotti lahttun.

Gásta lea attáldat ja bargu. Gásta geatnegahtta din, vanhemat ja risvánhemat, fuolahit máná kristtalaš bajásgeassimis. Go mánná oahpahallá hál-  
lat, oahpahehket su dalle maiddá rohkadallat. Searvegoddi doarju dudno, NN ja NN (vánhemiid ovdanamat), mánáde bajásgeassimis. Ovttas mii ohcat Ipmila ja rávásmuvvat su máhttájeaddjin. Dii/doai risvánhemat lehpel/-leahppi ožžon barggu leat dán máná rávis ustibat ja kristtalaš ovdagovat. Doalli/doallet oktavuoda rismánáin ja su bearrašiin. Risvánhema dehálaš bargun lea maiddá rohkadallat rismáná ja su bearraša ovddas.

Unna mánáš eallá juohke láhkai vanhemiid veagas. Son dárbbáša oppa áigge ráhkisvuoda ja divššu. Ipmil lea gohččon dudno vanhenguovttos bargoguoibminis ráhkistit máná ja atnit fuola sus.

Árgan bohtet dilálašvuodat, goas iežas fámuiguin ja dáidduiguin ii ceavzze. Muiti, ahte gásta addá maiddá dudnuide, vanhenguovttos, nana dorvvu: máná eallin ii leat dušše dudno veagas. Son lea almmálaš Áhči oapmi. Osku golbmaoktalaš Ipmilii, guhte sivdnida odđa eallima, dahká min friddjan illudit ja roahkasmahtta min doivui ja luohtámuššii. Dat osku láide min agálaš eallima geainnu mielde.

## **DAHJE**

Ráhkis ustibat. Ipmil lea addán dudnuide, NN ja NN (vánhemiid ovdanamat), stuorra attáldaga. Dát mánná lea oskkilduvvon dudnuide, vai divššošeidde ja ráhkistivččiide su. Doai leahppi buktán su gástii ja ná čuvvon Jesusa gohččuma.

Mii dárbbášit bestojumi attáldaga, dasgo mii gullat suddolaš olmmošsohkii. Olmmoš ii sáhte gádjut iežas, muhto Ipmil lea árpmihan ja beastán min, go attii midjiide Jesusa Kristusa Beastin. Vánhemiiddiska mánnán riegádan olmmoš riegáda gásttas Bassi Vuoiŋŋa fámuin oddasis, dál Ipmila mánnán. Gásta čatná min Kristusii ja su searvegotti oktavuhtii.

Gásta gohčču min beaivválaččat eallit Ipmila ándagassiiaddojumis ja bálvalit guhtet guimmiideamet. Min gállui ja raddái sárgojuvvon ruossa-

mearka muittuha das, ahte bestojupmi lea ollásit Kristusa soabahanbarggu veagas. Ná ruossa roahkasmahtá min eallit kristtalažžan dán máilmmis. Jesus Kristus lea lohpadusas mielde minguin buot beivviid gitta dálá máilmmi loahpa rádjái.

Odne mii bivdit dudno máná eallimii Ipmila buressivdnádusa ja várjalusa. Ipmil váldá su árbmolihttosis. Doai vanhenguovttos sáhttibeahti beaivválaččat máhccat gástta lohpadusaide. Bivdi Ipmilis viisodaga ja ráhkisvuoda fápmun bearrašeatte eallimii. Buorit risvánhemat, [NN, NN,], doai leahppi/dii lehpet gohččojuvvon vanhemiidda veahkkin atnit fuola dán mánás. Illudeahkki/illudehket dán ustivuodas ja dikšu dan. Rohkadalli/rohkadallet rismáná ovddas ja láidejeahkki/láidejehket su eallit searvegotti oktavuodas.

Odne ovtas oppa Kristusa girkuin mii dovddastit oskomet. Buohkat gásttašuvvon olbmot gullet máilmmiviidosas Ipmila bearrašii, gos mii sáhttit rávásmuvvat oskkus golbmaoktalaš Ipmilii.

## 10. Sálbma

---

Sálmma sajis sáhtá leat eará heivvolaš musihkka.

# III Gásttašeapme

---

## 11. Gástagohččun

---

**B** Hearrámet Jesus Kristus lea ieš ásahan bassi gástta. Son celkkii máhttájeaddjiidasas: ”Munnje lea addojuvvon buot fápmu almmis ja eatnama alde. Vulget dan dihtii ja dahket buot álbmogiid máhttájeaddjin gásttašettiin sin Áhči ja Bártne ja Bassi Vuoiŋŋa nammii ja oahpahettiin sin doallat buot dan maid mun lean gohččon din doallat. Ja gehččet, mun lean dinguin buot beivviid gitta dálá máilmmi loahpa rádjái.” (Matt 28: 18–20)



## DAHJE

### B Rohkadallot.

Buotveagalaš ja árbmugas Ipmil. Álggos don sivdnidit almmi ja eatnama ja du eallima addi Vuoignja jodii čáziid bajábealde. Čáhci lea du attáldat, mii áhpásmahtta ja doallá bajás oppa luondduriikka. Dulvademiin don heavahit suttu, muhto gádjot Noa ja su bearraša. Ná don addet midjiide ovdagova gásttas. Don jodihit álbmogat Ruksesmeara rastá ja dahket dan friddjan fárao šlávuvuodas. Du dáhtu mielde Johannes gásttašii Bártnát Jesusa Jordaneanu čázis, ja don vuidet su Bassi Vuoignain. Ruossa alde son golggahii erttegisttis vara ja čázi, ja bajásčuožžilettiin son ieš ásahii bassi gástta, go celkkii máhttájeaddjiidasas:

”Munnje lea addojuvvon buot fápmu almmis ja eatnama alde. Vulget dan dihtii ja dahket buot álbmogiid máhttájeaddjin gásttašettiin sin Áhči ja Bártni ja Bassi Vuoignja nammii ja oahpahettiin sin doallat buot dan maid mun lean gohččon din doallat. Ja gehččet, mun lean dinguin buot beivviid gitta dálá máilmmi loahpa rádjái.” (Matt 28: 18–20)

Gulolažžan du Bártni gohččumii mii rohkadallat: Geahča dál girkot beallái ja raba dasa gástta gáldu. Vuolggat Bassi Vuoignjat riegádahttit odđa eallima, nu ahte son, guhte dán árpmu gáldus hávdáduvvo Kristusa jápmimii, maiddái suinna bajásčuožžilivččii odđa eallimii. Muittuhehkos dát čáhci min gásttasteamet ja goallostehkos dat min oktasaš ilus buot daidda vieljaide ja oappáide, gudet leat gásttas čadnojuvvon Kristusa rupmašii. Dán mii bivdit Kristusa, Hearrámet dihtii.

**S** Ámen.

## DAHJE

### B Rohkadallot.

Ipmil, eallima addi. Don sivdnidit čázi addit eatnamii šattu ja áhpásmahttit ja buhtistit min. Don gádjot Noa ja su bearraša árkkas. Mii giitit du das, ahte gásta lea midjiide bestojumi árka. Du álbmot jodii čázi čada friddjavuhtii Egypta šlávuvuodas. Bárdnát Jesus oáččui gástta

Jordaneanu čázis. Jápmimiinnis ja bajásčuožžilemiinis son čovddii min suttu ja jápmima čatnasiin. Jápmimis bajásčuožžilettiin son ieš ásahii bassi gástta, go celkkii máhttájeaddjiidasas:

”Munnje lea addojuvvon buot fápmu almmis ja eatnama alde. Vulget dan dihtii ja dahket buot álbmogiid máhttájeaddjin gásttašettiin sin Áhči ja Bártne ja Bassi Vuoiŋŋa nammii ja oahpahettiin sin doallat buot dan maid mun lean gohččon din doallat. Ja gehččet, mun lean dinguin buot beivviid gitta dálá máilmmi loahpa rádjái.” (Matt 28: 18–20)

Mii rohkadallat: Vuolggat Bassi Vuoiŋŋat, nu ahte son, guhte gásttašuvvo dán čázis, oažžu odđa eallima. Daga sus agálaš riikkat árbejeaddji. Gula min rohkosa Jesusa Kristusa, Hearrámet dihtii.

**S** Ámen.

## \*12. Oskkudovddastus

---

Oskkudovddastus lohkkovuođđas ovttá jítne.

**B** Dovddastehkot ovttas min kristtalaš oskomet.

**S** Mun oskkun Ipmilii, Áhččái, Buotveagalažžii, almmi ja eatnama Sivdnideaddjái,

ja Jesusii Kristusii,

Ipmila áidnoriegádan Bárdnái, min Hearrái,

guhte sahkanii Bassi Vuoiŋŋas,

riegádii nieida Márjjás,

gillái Pontius Pilatusa áigge,

russiinávlejuvvui, jámii ja hávdáduvvui,

manai vuolás jábmiid riikii,

bajásčuožžilii jábmiid luhtte goalmmát beaivve,

manai bajás albmái,

čohkká Ipmila, buotveagalaš Áhči, olgeš gieda bealde,

ja bohtá fas doppe dubmet calliid ja jábmiid,

ja Bassi Vuoiŋŋii,

bassi oktasaš girku,  
bassi olbmuid searvivuoda,  
suttuid ándagassii addojumi,  
oačči bajásčuožžileame  
ja agálaš eallima.

**B** Dán oskui ja buot dan lohpadusaid oamasteapmái mii gásttašit dán máná golbmaoktalaš Ipmila nammii.

## \*13. Gásta

---

Báhppa goive čázi golbmii máná oaivvi ala ja cealká:

*NN (ovdanamat), mun gásttašan du Áhči ja Bártni ja  
Bassi Vuoiŋŋa nammii.*

Báhppa bidjá gieda máná oaivvi ala. Son sáhtá bivdit vanhenguovtto ja risvánhemiid dahkat seammaláhkai.

**B** Hearrámet Jesusa Kristusa árbmu ja Ipmila ráhkisvuohta ja Bassi Vuoiŋŋa oasálašvuohta lehkos duinna.

**S** Ámen.

Báhppa dollesta gástabiktasis ja cealká:

Apoasttal Bávlos cealká: ”Buohkat dii, geat lehpēt gásttašuvvon Kristusii, lehpēt gárvodan Kristusiiin.” (Gal 3: 27)

Báhppa cahkkeha gástagintala áltára dahje gástabeavddi gintalis dahje beassášgintalis, geige dan vanhemiidda ja cealká:

Jesus cealká: ”Mun lean máilmmi čuovggas. Dat guhte čuovvu mu, ii goassege vadjol seavdnjadasas, muhto sus lea eallima čuovggas.” (Joh 8: 12)

Báhppa váldá máná sallasis ja cealká:

Bassi gásttas NN lea váldojuvvon Kristusa girku ja X searvegotti lahttun. Mii muitit su ja su ruovttu min ráhkisvuodain ja ovddasrohkosiiguin. Jesus válddii máná sallasis ja celkkii: ”Dat

guhte vuostáiváldá dákkár uhca mánáža mu nammii, vuostáiváldá mu.” (Mark 9: 37)

Báhppa addá máná goappánu vánhemii dahje risvánhemii.

## 14. Sálbma

---

Sálmma sajis sáhtta leat eará heivvolaš musihkka.

## 15. Oktasaš ovddasrohkos

---

Ávvuboddui oassálastit sáhttet ovtta ráhkadit ja ollašuhttit rohkosa.

**B** Rohkadallot.

### Ovddasrohkos

1. Buotveagalaš Ipmil, ráhkis almmálaš Áhčči. Mii giitit du das, ahte don anát du girku nanusin ja buressivdnidat dan. Mii giitit maid das, ahte don leat gásttas čatnan NN du oktavuhtii, addán sutnje oddasisriegádeame árpmu ja dahkan su árbbolažžan agálaš eallimii. Mii rohkadallat du: Várjal su ja divtte su rávásmuvvat viissisvuodas ja árpmus. Mii giitit du buorre vuodas, maid leat čájehan su vánhemiidda. Divtte sudno váldit ovddasvástádusa, atte sudnuide áddejumi ja fámu. Veahket maiddái risvánhemiid ráhkistit ja doarjut NN. Veahket min buohkaid eallit du dáhtu mielde ja beassat oktii du lusa šearratvuhtii. Gula min Bártnát Jesusa Kristusa, min Hearrámet bokte.
2. Ipmil, Buotveagalaš Áhčči, mii giitit du NN ovddas, gean leat addán NN:i ja NN:i. Mii rámidit du das, ahte don leat váldán su bassi gásttas oapminat, du searvegotti lahttun ja agálaš eallima árbejeaddjin. Buresivdnit NN dál ja su eallima buot beivviid. Vuolggat bassi engeliiddát várjalit su. Veahket eatni ja áhči, áhkuguovtto ádjáin ja risvánhemiid ráhkistit ja láidet su du dáhtu mielde. Divššot su sániinat ja árpmuinat du searvegotti oktavuodas. Várjal su oskkus nu, ahte son ii goassige luobaše dus, muhto beasašii oktii du lusa šearratvuhtii. Gula min rohkosa Bártnát Jesusa Kristusa dihtii.

3. Buotveagalaš, agálaš Ipmil. Don leat eallima ája. Mii giitit du buorre-  
vuodas, maid don leat čájehan dán bearrašii. Atte vánhemiidda fámu ja  
ráhkisvuoda bajásgeassit máná. Mii giitit du das, ahte don leat gásttas  
váldán NN oapminat. Mii rohkadallat du: Oro su lahka ja atte du árpmu  
ja ráhkisvuoda sutnje dorvun. Suodjal ja nanne su juohke beaivve.  
Buessivdnit dán bearraša olbmuid. Veahket sin dovdat du almmálaš  
Áhččin ja čuovvut eallimis du sáni oahpahusaid. Veahket sin arvvos-  
mahttit guhtet guoimmiset ja bisuhit sin gaskasaš oktavuoda. Bures-  
sivdnit maiddái áhkuguovtto ádjáin ja risvánhemiid sin barggus máná  
buorrin. Atte midjiide buohkaide dán eallima nogadettiin agálaš eal-  
lima almmálaš ruovttus. Gula min rohkosa Hearrámet Jesusa Kristusa  
dihtii.

4.

**B** Ráhkis almmálaš Áhččámet. Mii giitit du das, ahte don leat váldán NN  
du mánnán, searvegotti lahttun ja agálaš eallima árbejeaddjin. Oro álo  
su lahka ja atte du árpmu ja ráhkisvuoda sutnje dorvun.

Áhčči dahje eadni:

Moai giite min máná ovddas. Atte munnuide ráhkisvuoda ja viisodaga,  
nu ahte moai máhtášeimme bajásgeassit su du dáhtu mielde. Ane sus  
fuola oppa eallima áigge. Atte min ruktui ándagassiiaddi ja jálosmahtti  
miela. Veahket min váttisvuodaid siste nu, ahte mii ealášeimmet lahka  
guhtet guoibmámet ja du.

Giinu risvánhemiin:

Veahket min risvánhemiid dikšut min barggu nu, ahte ustivuoha dán  
mánái lassánivččii ja nanosmuvašii. Oahpat min doarjut bearraša  
máná bajásgeassimis kristtalašvuhtii ja ohcat ovttas du veahki.

Giinu oappáin dahje vieljain:

Giitu dán uhcaoappás/uhcavieljas. Giitu das, ahte moai ožžo ráväs-  
muvvat ovttas. Veahket munno bissut álo lagažin.

Áhkku dahje áddjá:

Mun giittán du dán áhkkubis/áddjubis. Giitu, ahte mii oažžut oaidnit sus du sivdnidanbarggu oavdduid. Várjal su buot beivviid. Divtte min muosáhit ovttas ilu, lagašvuoda ja gierisvuoda. Oro min dorvun.

**B** Almmálaš Áhčči. Giitu, ahte don gulat min rohkosiid. Mii guoddit dán máná ja iežamet du háldui. Gula min Bártnát Jesusa Kristusa, Hearrámet bokte.

5. Buohcci máná gásttašettiin.

Buotveagalaš Ipmil. Mii giitit du das, ahte don leat váldán dán máná gástta lihttui, mas du árbmu ja ráhkisvuolta birastahtta su. Don oainnat vanhemiid fuola ja balu, go buohcuvuolta ja mánga dovdameahttun ášši čatnasit dán máná eallimii. Mii rohkadallat: Oro sudno lahka. Atte sudnuide fámuid ja roahkasmahte sudno luohttit dasa, ahte NN eallin lea du diedus ja hálddus. Vuolggat bassi engeliiddát su dorvun. Veahket vanhenguovtto, oappáid ja vieljaid, áhkuguovtto ádjáin ja risvánhemiid báhcit du suodjái. Mii giitit du juohke beaivvis, man midjiide attát. Leš dal beivviideamet lohku mii ihkinassii, veahket min dorvvastit Beasti árbmui, vai mii oktii beassat almmálaš ruktui. Dán mii bivdit Bártnát Jesusa Kristusa namas.

6. (Ođđa) ruovttu buressivdnidettiin.

Bassi Ipmil. Mii giitit du attáldagain ja das, ahte don láidet min eallima buot bottuin. Mii rohkadallat odne NN ovddas, guhte lea čadnojuvvon gásttas du searvegotti oktavuhtii. Buressivdnit su eallima buot beivviid. Vuolggat bassi engeliiddát várjalit su. Atte vanhemiidda ja risvánhemiidda návccaid ja viisodaga bajásgeasedettiin dán máná. Doarjjo min buohkaid árpmuinat ja láide min viimmat du lusa almmálaš ruktui.

Ipmil, odne mii giitit du maiddái dán [ođđa] ruovttus. Basut dan Vuoiŋnainat. Buressivdnit buohkaid, guđet dáppe ássat ja galledit. Veahket bearašlahtuid ráhkistit ja bálvalit guhtet guoimmiset. Buressivdnit dán ruovttu Bassi Vuoiŋnainat, don golbmaoktalaš Ipmil, Áhčči, ja (+) Bárdni ja Bassi Vuoigŋa.

**S** Ámen.

## 16. Áhččámet

---

Herrá rohkos celkojuvvo ovttá jítne.

**S** Áhččámet, don guhte leat almmis.

Basuhuvvos du namma.

Bohtos du riika.

Šaddos du dáhttu,

mo almmis nu maiddái eatnama alde.

Atte midjiide odne min beaivválaš láibbi.

Ja atte midjiide min suttuid ándagassii,

nugo miige ándagassii addit velggolaččaidasamet.

Alege doalvvo min geahččalussii,

muhto beastte min bahás eret.

Dasgo du lea riika ja fápmu ja gudni agálašvuhtii.

Ámen.

## IV Loahpaheapme

---

### 17. Buressivdnáduš

---

**B** Herrá buressivdnidivččii din ja várjalivččii din.

Herrá čuvgešii muođuidis didjiide

ja livččii didjiide árbmugas.

Herrá jorgalivččii muođuidis din beallái

ja attášii didjiide ráfi.

Áhči ja + Bártne ja Bassi Vuoiŋŋa nammii.

**S** Ámen.

### 18. Sálbma

---

Sálmma maŋŋá báhppa juohká gásta- ja risvánhenduodaštusaid ja bovde oassálastiid ipmilbálvalussii, mas rohkadallojuvvo gásttašuvvon máná sihke su vánhemiid ja risvánhemiid ovddas.

# Heahtegásta

Juos ballojuvvo, ahte mánná jápmá iige báhppa leat dalán fidnemis doaimmahit gástta, galgá giinu girku lahttu gásttašit máná. Heahtegástta sáhtá doaimmahit maid eará kristtalaš. Gásttas galget leat duodašteaddjit, juos vejolaš. Heahtegásttas galgá ájahalakeahtá almmuhit áššái-gullelaš girkohearrádoaimmahahkii. Heahtegásta nannejuvvo girkogiehtagirjji mearrádusaid mielde. (GO 2: 14.) Seammá láhkai meannuduvvo, go heahtegásta addojuvvo gásttašmeahtun ollesolbmui.

Heahtegástta oktavuodas sáhtá lávlut sálmma (omd. 35–38, 434, 455, 456 dahje 459).

## 1. Gásta

---

Báhppa goive čázi golbmii máná oaivvi ala ja cealká:

*[NN (ovdanamat), ] mun gásttášan du Áhči ja Bártni ja  
Bassi Vuoiŋŋa nammii.*

## 2. Áhččámet

---

Herrá rohkos celkojuvvo ovttá jitnii.

**S** Áhččámet, don guhte leat almmis.

Basuhuvvos du namma.

Bohtos du riika.

Šaddos du dáhttu,

mo almmis nu maddái eatnama alde.

Atte midjiide odne min beaivválaš láibbi.

Ja atte midjiide min suddid ándagassii,

nugo miige ándagassii addit velggolaččaidasamet.

Alege doalvo min geahččalussii,

muhto beastte min bahás eret.

Dasgo du lea riika ja fápmu ja gudni agálašvuhtii.

Ámen.



### 3. Buressivdnáduš

---

Gásttašeaddji cealká:

Herrá buressivdnidivččii din ja várjalivččii din.

Herrá čuvgešii muođuidis didjiide

ja livččii didjiide árbmugas.

Herrá jorgalivččii muođuidis din beallái

ja attášii didjiide ráfi.

Áhči ja + Bártni ja Bassi Vuoiŋŋa nammii.

**S** Ámen.

# Heahtegástta nannen

Dát minsttar geavahuvvo máná heahtegástta nannedettiin. Dan oktavuodas heivehuvvojit dat rávvagat, mat leat addojuvvon máná gásttas.

Ollesolbmo heahtegástta nannema oktavuodas heivehuvvojit Nuora ja olles olbmo gástta materiálat.

Juos heahtegástta oktavuodas ii leat addojuvvon namma, dat addojuvvo heahtegástta nannedettiin.

## I Álggahus

---

### 1. Sálbma

---

### 2. Álgosivdnideapme

---

Buessivdnádusa ja vuorrodearvvahusa lea vejolaš lohkat dahje lávlut.

#### Buessivdnádus

**B** Áhči ja + Bártni ja Bassi Vuoiŋŋa nammii.

**S** Ámen.

#### Vuorrodearvvahus

**B** Hearrá lehkos dinguin.

**S** Nu son lehkos maddái du vuoiŋŋain.

### 3. Álggahansánit

---

Álggahansániid lea vejolaš ráhkadit ieš.

**B** Ráhkis ustibat. Eallin lea stuorra Ipmila attáldat. Bassi gásttas Ipmil lea váldán dán máná oktavuohtasis ja skeŋken sutnje agalaš eallima. Mii guoddit su giitosiiguin, rohkosiiguin ja buressivdnádusain Ipmila ovdii.

## DAHJE

**B** Ráhkis kristtalaččat. Jesus gohčui mánáid lusas ja buressivdnidii sin. Bassi gásttas son lea váldán dán máná sallasis ja skenken sutnje bestojumi. Luohttámušas Beastáseamet mii rohkadallat dudno NN ja NN (váhnemiid namat) ja dudno máná ovddas. Jesus cealká: ”Mun lean dinguin buot beivviid gitta dálá máilmmi loahpa rádjái.” (Matt 28: 20)

## 4. Biibbalsálbma

---

Sáhtta atnit maiddái girkojagi čuovvu dahje eará biibbalsálmmaid. Sálmmaid sajis sáhtta geavahit bearraša sotnabeaivve sálbmavuorrolávlaga (geahča Ipmilbálvalusaid girji).

Biibbalsálmma sáhtta lohkat dahje lávlut. Dan álggus ja loahpas sáhtta leat antifona.

Biibbalsálbmii laktojuvvo Uhca gudni. Dan sajis sáhtta atnit čuovvovaš sálmmaid vearssaid: 5:4, 66:3, 136:7, 218:7, 336:8, 340:8, 341:10, 348:6, 379:6. Uhca gudni guddojuvvo eret 5. fástoáiggi sotnabeaivvi rájes.

### Antifona

Bohtet geahččat Ipmila daguid,  
su imašlaš daguid olbmuid gaskkas.

Sál 66: 5

## DAHJE

Dát lea dat beaivi man Hearrá lea dahkan,  
ávvuehkot ja illudehkot!

Sál 118: 24

### Biibbalsálbma

Hearrá, Ipmileamet,  
man hearváí lea du namma miehtá eatnama,  
don lebbet hearvásvuodat albmái.

Uhcahaččaid ja njuoratmánáid njálmmis  
don leat vuoddudan alcesat suoji vašálaččaidat vuostái,  
bissehit juohke vuostálasti ja mávssaheaddji.

Go mun oainnán du almmi, du suorpmaid dagu,  
mánu ja násttiid maid don leat ráhkadan,

de mii lea dalle olmmoš, go don muittát su,  
olbmománna, go don anát sus fuola?  
Don dahket su goasii Ipmila láhkásažžan  
ja kruvnnidit su hearvásvuodain ja gudniin.  
Hearrá, Ipmileamet,  
man hearváii lea du namma miehtá eatnama.

Sáil 8: 2–6, 10

### **DAHJE**

Rámidehket Hearrá, oppa eanan.  
Bálvalehket Hearrá ilus,  
bohtet su muoduid ovdii ávuin!  
Dovdet ahte Hearrá lea Ipmil!  
Son lea sivdnidan min, ja mii leat su,  
su olbmot ja su sávzzat maid son geahččá.  
Mannet su poarttaid čada giittoslávlagiin,  
mannet su ovdašiljuide máidnunlávlagiin.  
Giitet su ja máidnot su nama.  
Dasgo Hearrá lea buorre,  
su árbmugasvuohta bistá agálaš áigái,  
su oskkáldasvuohta sogas sohki.

Sáil 100

### **DAHJE**

Mun bajidan čalmmiidan váriid guvlui:  
Gos bohtá munnje veahkki?  
Mu veahkki bohtá Hearrás,  
almmi ja eatnama sivdnideaddjis.  
Ii son divtte du juolggi suoibut,  
du goziheaddji ii oadestuva.  
Ii son oadestuva iige nohka,  
son lea Israela goziheaddji.  
Hearrá lea du goziheaddji,  
Hearrá lea du suoivvan du olgeš gieda bealde.

Beaivváš ii vahágahte du beaivet  
iiige mánnu ihkku.

Hearrá várjala du buot bahás,  
son várjala du heakka.

Hearrá várjala du vuolgima ja du boahtima  
dálážis gitta agálaš áigái.

Sál 121

## **DAHJE**

Hearrá, don leat sivdnidan mu monemuččaid,  
don goddet mu eatniheakka siste.

Mun giittán du go lean sivdniduvvon ovddolaš láhkái.

Ovddolaččat leat du dagut, mu siellu diehtá dan sakka bures.

Mu dávttit eai lean čihkkojuvvon du ovddas  
go mun sivdniduvvojin čiegusvuodas,  
go mun duddjojuvvojin eatnama čieŋalvuodas.

Don oidnet mu juo dalle go ledjen ohki,  
du girjái ledje juo čállojuvvon buot mu beaivvit  
ovdal go oktage dain lei boah tán.

Sál 139: 13–16

## **Uhca gudni**

Gudni Áhččái ja Bárdnái  
ja Bassi Vuignii,

nugo lei álggus, dál lea ja álo  
agálašvuodas agálašvuhtii. Ámen.

**Antifona geardduhuvvo.**

## **5. Gažaldat dahje ávžžuhus**

---

### **Gažaldat**

**B** Vánhenguovttos, man nama doai leahppi addán mánnái?

Vástáduš:

NN (ovdanamat).

**B** NN lea gásttašuvvon Kristusá girku oktavuhtii. Vánhenguovttos ja risvánhemat, dáhttubehtetgo ovttas searvegottiin fuolahit das, ahte son oažžu kristtalaš bajásgeassima?

Vástáduš:

De dáhtun.

## DAHJE

**B** Doai, vánhenguovttos, leahppi addán mánnái namman NN (ovdanamat) ja son lea gásttašuvvon Kristusá girku oktavuhtii. Vánhenguovttos ja risvánhemat, dáhttubehtetgo ovttas searvegottiin fuolahit das, ahte son oažžu kristtalaš bajásgeassima?

Vástáduš:

De dáhtun.

## Ávžžuhus

**B** Doai, vánhenguovttos, leahppi addán mánnái namman NN (ovdanamat). NN lea gásttašuvvon Kristusá girku oktavuhtii. Vánhenguovttos ja risvánhemat, bassi gásta geatnegahtá din ovttas searvegottiin fuolahit su kristtalaš bajásgeassimis.

## 6. Ruossamearka

---

Báhppa dahká ruossamearka máná gállui ja raddái ja dadjá:

Váldde bassi ruossamearka du gállui + ja du raddái + duodaštussan das, ahte russiinávlejuvvon ja bajásčuožžilan Jesus Kristus lea du lonistan ja gohččon du su máhttájeaddjinis.

Báhppa joatká:

Árbmugas Ipmil lea Bártnis Jesusa Kristusá bokte dahkan du friddjan suttu, jápmima ja bahá válddis. Addos son sutnje fámu juohke beaivve jápmi eret suttus ja eallit Kristusis.

## 7. Rohkos

---

Rohkosávžžuhusa ja searvegotti ámena lea vejolaš lohkat dahje lávlut. Ávžžuhusa manjá sáhtá leat oanehis jaskes rohkos.

### **B** Rohkadallot.

#### 1. Buotveagalaš Ipmil.

Gásttas don divttát du árpmu šávvat badjelasamet,  
dagat min friddjan suttu, jápmima ja bahá válddis  
ja čanat min Kristusii.

Mii giitit du das,  
ahte leat váldán dán máná oapminat  
ja skenken sutnje Bassi Vuoiŋŋat.

Veahket su oskut dutnje,  
nu ahte son ealášii mánnánat  
ja beasašii oktii du lusa.

Gula min Beastámet Jesusa Kristusa dihtii.

#### 2. Ipmil, Áhččámet.

Don attát midjiide eallima attáldahkan.

Giitu dutnje das,  
ahte don áittardat ja suodjalat dán máná.

Giitit du, ahte leat váldán su gástta árbmolihttui,  
mas Jesusa ráhkisvuohta

lea duodalaš eallima juohke bottus.

Son lea dál rašši ja headju,  
leage don suinna ja guotte su salastat.

Čuvge oppa su eallima.

Gula min Jesusa Kristusa dihte.

### **S** Ámen.

## II Sáni

---

### 8. Biiballohkan

---

Mánáid evangeliuma (Mark. 10: 13–16) ovdal lea vejolaš lohkat mannu čuovvovaš čálabihtáin. Sáhtá atnit maid girkojagi čuovvu dahje eará čálabihtáid.

Lohkki almmuha čálabihtá.

Biiballohkamii lea vejolaš laktit vástádusa (biibbalsálbma, sálbma, lávlla, čuojanas-musihkka dahje jaskes mediteren).

Jes 43: 1

Rom 6: 3–4

Ehpetgo dii dieđe, ahte mii buohkat geat gásttašuvvuimet Kristusii Jesusii, gásttašuvvuimet su jápmimii? Mii nappo hávdáduvvuimet suinna go gásttašuvvuimet jápmimii, vai beasašeimmet eallit odđa eallima, nugo Áhči hearvásvuohta bajásčuožžáldahtii Kristusa jábmiid luhtte.

Gal 3: 26–28

Dasgo dii lehpet buohkat Ipmila mánát go oskubehtet Kristusii Jesusii. Buohkat dii, geat lehpet gásttašuvvon Kristusii, lehpet gárvodan Kristusiin. Dás ii leat juvddálaš dahje greikalaš, šlávva dahje isit, olmmái iige nisu, dasgo dii lehpet buohkat okta Kristusis Jesusis.

Tit 3: 4–5

Muhto go min Ipmila ja beasti buorre vuoha ja ráhkisvuoha olbmuide almmustuvai, de son besttii min, ii min vanhurskkis daguid dihtii, muhto váibmoládisvuodas dihtii; son besttii min dainna lávgguin mas Bassi Vuoigna riegádahtta min oddasis ja odasmahtta min.



Dušše soapmásat, namalassii gávccis, bestojuvvojedje árkkas, go čáhci guttii dan. Dát čáhci vástida gástta mii dál beastá din. Dat ii buhtis rupmaša olggaldas duolvvas, muhto lea buori oamedovddu lihttu Ipmiliin.

Sii gudde uhca mánážiid Jesusa lusa vai son guoskkahivččii daid, muhto máhttájeaddjit šiggo sin. Go Jesus oinnii dan, de moaráhuvai ja celkkii sidjiide: ”Diktet uhca mánážiid boahit mu lusa, alletge hehte sin! Dasgo Ipmila riika gullá dakkáraččaide. Duodaid, mun cealkkán didjiide: Dat guhte ii vuostáiváldde Ipmila riikka nugo uhca mánáš, ii eisege beasa dan sisa.” Ja son válddii sin sallasis, bijai giedaidis sin ala ja buressivdnidii sin.

## 9. Sárdni

---

### 10. Sálbma

---

Sálmma sajis sáhtta leat eará heivvolaš musihkka.

## III Gástta nannen

---

### 11. Gástagohččun

---

**B** Hearrámet Jesus Kristus lea ieš ásahan bassi gástta. Son celkkii máhttájeaddjiidasas: ”Munnje lea addojuvvon buot fápmu almmis ja eatnama alde. Vulget dan dihtii ja dahket buot álbmogiid máhttájeaddjin gásttašettiin sin Áhči ja Bártne ja Bassi Vuoiŋŋa nammii ja oahpahettiin sin doallat buot dan maid mun lean gohččon din doallat. Ja gehččet, mun lean dinguin buot beivviid gitta dálá máilmmi loahpa rádjái.” (Matt 28: 18–20)

## DAHJE

### **B** Rohkadallot.

Ipmil, callima addi. Don sivdnidit čázi addit eatnamii šattu ja áhpásmahttit ja buhtistit min. Don gádjot Noa ja su bearraša árkkas. Mii giitit du das, ahte gásta lea midjiide bestojumi árka. Du álbmot jodii čázi čada friddjavuhtii Egypta šlávuvuodas. Bárdnát Jesus oaččui gástta Jordaneanu čázis. Jápmimiinnis ja bajásčuožžilemiinis son čovddii min suttu ja jápmima čatnasiin. Bajásčuožžileame maŋŋil son ieš ásahii bassi gástta, go celkkii máhttájeaddjiidasas:

”Munnje lea addojuvvon buot fápmu almmis ja eatnama alde. Vulget dan dihtii ja dahket buot álbmogiid máhttájeaddjin gásttašettiin sin Áhči ja Bárti ja Bassi Vuoiŋŋa nammii ja oahpahettiin sin doallat buot dan maid mun lean gohččon din doallat. Ja gehččet, mun lean dinguin buot beivviid gitta dálá máilmmi loahpa rádjái.” (Matt. 28: 18–20)

Mii rohkadallat: Nanne Bassi Vuoiŋŋainat su, guhte lea gásttas ožžon odda callima attáldaga. Láide su viimmat agálaš riikasat. Gula min rohkosa Jesusa Kristusa, min Hearrámet dihte.

### **S** Ámen.

## \*12. Oskkudovddastus

---

Oskkudovddastus lohkkovuođo ovttá jitnii.

**B** Dovddastehkot ovttas min kristtalaš oskomet.

**S** Mun oskkun Ipmilii, Áhččái, Buotveagalažžii,  
almmi ja eatnama Sivdnideaddjái,

ja Jesusii Kristusii,

Ipmila áidnoriegádan Bárdnái, min Hearrái,

guhte sahkanii Bassi Vuoiŋŋas,

riegádii nieida Márjjás,

gillái Pontius Pilatusa áigge,

russiinávlejuvvui, jámii ja hávdáduvvui,

manai vuolás jábmiid riikii,  
bajásčuožžilii jábmiid luhtte goalmmát beaivve,  
manai bajás albmái,  
čohkká Ipmila, buotveagalaš Áhči, olgeš gieda bealde,  
ja bohtá fas doppe dubmet ealliid ja jábmiid,  
ja Bassi Vuignii,  
bassi oktasaš girku,  
bassi olbmuid searvivuoda,  
suttuid ándagassii addojumi,  
oačči bajásčuožžileame  
ja agálaš eallima.

## \*13. Nannensánit

---

**B** Ipmila ja su searvegotti bálvaleaddjin nannen, ahte NN (ovdanamat) lea Jesusa Kristusa gohččuma mielde gásttašuvvon čáziin Áhči ja Bártni ja Bassi Vuoiŋŋa nammii.

Báhppa bidjá gieda máná oaivvi ala. Son sáhtá bivdit vanhenguovtto ja risvánhemiid dahkat seammaláhkai.

**B** Hearrámet Jesusa Kristusa árbmu ja Ipmila ráhkisvuohta ja Bassi Vuoiŋŋa oasálašvuohta lehkos duinna.

**S** Ámen.

Báhppa cahkkeha gástagintala áltára dahje gástabeavddi gintalis dahje beassášgintalis, addá dan vanhemiidda ja cealká:

Jesus cealká: ”Mun lean máilmmi čuovggas. Dat guhte čuovvu mu, ii goassege vadjol seavdnjadasas, muhto sus lea eallima čuovggas.” (Joh 8: 12)

Báhppa váldá máná sallasis ja cealká:

Bassi gásttas NN (ovdanamat) lea váldojuvvon Kristusa girku ja X searvegotti lahtun. Mii muitit su ja su ruovttu min ráhkisvuodain ja ovddasrohkosiiguin. Jesus válddii máná sallasis ja

celkkii: ”Dat guhte vuostáiváldá dákkár uhca mánáža mu nammii, vuostáiváldá mu” (Mark 9: 37).

Báhppa addá máná goappánu vánhemii dahje risvánhemii.

## 14. Sálbma

---

Sálmma sajis sáhttá leat eará heivvolaš musihkka.

## 15. Oktasaš ovddasrohkos

---

Ávvuboddui oassálastit sáhttet ovttas ráhkadit ja ollašuhttit rohkosa.

**B** Rohkadallot.

### Ovddasrohkos

1. Buotveagalaš Ipmil, ráhkis almmálaš Áhčči. Mii giitit du das, ahte don anát du girku nanusin ja buressivdnidat dan. Mii giitit maid das, ahte don leat gásttas čatnan NN du oktavuhtii, addán sutnje oddasisriegádeame árpmu ja dahkan su árbbolažžan agálaš eallimii. Mii rohka-dallat du: várjal su ja divtte su rávásmuvvat viissisvuodas ja árpmus. Mii giitit du buorrevuodas, maid leat čájehan su vánhemiidda. Divtte sudno váldit ovddasvástádusa, atte sudnuide áddejumi ja fámu. Veahket maiddái risvánhemiid ráhkistit ja doarjut NN. Veahket min buohkaid eallit du dáhtu mielde ja beassat oktii du lusa šearratvuhtii. Gula min Bártnát Jesusa Kristusa, min Hearrámet bokte.
2. Ipmil, Buotveagalaš Áhčči, mii giitit du NN ovddas, gean leat addán NN:i ja NN:i. Mii rámidit du das, ahte don leat váldán su bassi gásttas oapminat, du searvegotti lahttun ja agálaš eallima árbejeaddjin. Bures-sivdnit NN dál ja su eallima buot beivviid. Vuolggat bassi engeliiddát várjalit su. Veahket eatni ja áhči, áhkuguovtto ádjáin ja risvánhemiid ráhkistit ja láidet su du dáhtu mielde. Divššot su sániinat ja árpmuinat du searvegotti oktavuodas. Várjal su oskkus nu, ahte son ii goassige luobaše dus, muhto beasašii oktii du lusa šearratvuhtii. Gula min rohkosa Bártnát Jesusa Kristusa dihtii.

3. Buotveagalaš, agálaš Ipmil. Don leat eallima ája. Mii giitit du buorre-  
vuodas, maid don leat čájehan dán bearrašii. Atte vanhemiidda fámu ja  
ráhkisvuoda bajásgeassit máná. Mii giitit du das, ahte don leat gásttas  
váldán NN oapminat. Mii rohkadallat du: Oro su lahka ja atte du árpmu  
ja ráhkisvuoda sutnje dorvun. Suodjal ja nanne su juohke beaivve.  
Buessivdnit dán bearraša olbmuid. Veahket sin dovdat du almmálaš  
Áhččin ja čuovvut eallimis du sáni oahpahusaid. Veahket sin arvvos-  
mahttit guhtet guoimmiset ja bisuhit sin gaskasaš oktavuoda. Bures-  
sivdnit maiddái áhkuguovtto ádjáin ja risvánhemiid sin barggus máná  
buorrin. Atte midjiide buohkaide dán eallima nogadettiin agálaš eal-  
lima almmálaš ruovttus. Gula min rohkosa Hearrámet Jesusa Kristusa  
dihtii.

4.

**B** Ráhkis almmálaš Áhččámet. Mii giitit du das, ahte don leat váldán NN  
du mánnán, searvegotti lahttun ja agálaš eallima árbejeaddjin. Oro álo  
su lahka ja atte du árpmu ja ráhkisvuoda sutnje dorvun.

Áhčči dahje eadni:

Moai giite du dán máná ovddas. Atte munnuide vanhemiidda ráhkis-  
vuoda ja viisodaga, nu ahte moai máhtášeimme bajásgeassit su du  
dáhtu mielde. Ane sus fuola oppa eallima áigge. Atte min ruktui  
ándagassiiaddi ja jálosmahtti miela. Veahket min váttisvuodaid siste  
nu, ahte mii ealášeimmet lahka guhtet guoibmámet ja du.

Giinu risvánhemiin:

Veahket min risvánhemiid dikšut min barggu nu, ahte ustítvuohta dán  
mánái lassánivččii ja nanosmuvašii. Oahpat min doarjut bearraša  
máná bajásgeassimis kristtalašvuhtii ja ohcat ovttas du veahki.

Giinu oappáin dahje vieljain:

Giitu dán uhcaoappás/uhcavieljas. Giitu das, ahte moai ožžo rávásmuv-  
vat ovttas. Veahket munno bissut álo lagažin.

Áhkku dahje áddjá:

Mun giittán du dán áhkkubis/áddjubis. Giitu, ahte mii oažžut oaidnit sus du sivdnidanbarggu oavdduid. Várjal su buot beivviid. Divtte min muosáhit ovttas ilu, lagašvuoda ja gierisvuoda. Oro min dorvun.

**B** Almmálaš Áhčči. Giitu, ahte don gulat min rohkosiid. Mii guoddit dán máná ja iežamet du háldui. Gula min Bártnát Jesusa Kristusa, Hearrámet bokte.

5.

Buohcci máná gásttašettiin.

Buotveagalaš Ipmil. Mii giitit du das, ahte don leat váldán dán máná gástta lihttui, mas du árbmu ja ráhkisvuolta birastahttá su. Don oainnát vanhemiid fuola ja balu, go buohcuvuolta ja mánga dovdameahttun ášši čatnasit dán máná eallimii. Mii rohkadallat: Oro sin lahka. Atte sidjiide fámu ja roahkasmahte sin luohttit dasa, ahte NN eallin lea du diedus ja hálddus. Vuolggat bassi engeliiddát su dorvun. Veahket vanhenguovtto, oappáid ja vieljaid, áhku ja ádjáguovtto ja risvánhemiid báhecit du suodjái. Mii giitit du juohke beaivvis, man midjiide attát. Leš dal beivviideamet lohku mii ihkinassii, veahket min dorvvastit Beasti árbmui, vai mii oktii beassat almmálaš ruktui. Dán mii bivdit Bártnát Jesusa Kristusa namas.

6.

(Ođđa) ruovttu buressivdnidettiin.

Bassi Ipmil. Mii giitit du attáldagain ja das, go don láidet min eallima buot bottuin. Mii rohkadallat odne NN ovddas, guhte lea čadnojuvvon gásttas du searvegotti oktavuhtii. Buressivdnit su eallima buot beivviid. Vuolggat bassi engeliiddát várjalit su. Atte vanhemiidda ja risvánhemiidda návccaid ja viisodaga bajásgeasedettiin dán máná. Doarjjo min buohkaid árpmuinat ja láide min viimmat du lusa almmálaš ruktui.

Ipmil, odne mii giitit du maddái dán [odda] ruovttus. Basut dan Vuoiŋnainat. Buressivdnit buohkaid, gudet dáppe ássat ja galledit. Veahket bearašlahtuid ráhkistit ja bálvalit guhtet guoimmiset. Buressivdnit dán

ruovttu Bassi Vuoiŋnainat, don golbmaoktalaš Ipmil, Áhčči, ja (+)  
Bárdni ja Bassi Vuoigŋa.

**S** Ámen.

## 16. Áhččámet

---

Herrá rohkos celkojuvvo ovttá jitnii.

**S** Áhččámet, don guhte leat almmis.

Basuhuvvos du namma.

Bohtos du riika.

Šaddos du dáhttu,

mo almmis nu maiddái eatnama alde.

Atte midjiide odne min beaivválaš láibbi.

Ja atte midjiide min suttuid ándagassii,

nugo miige ándagassii addit velggolaččaidasamet.

Alege doalvo min geahččalussii,

muhto beastte min bahás eret.

Dasgo du lea riika ja fápmu ja gudni agálašvuhtii.

Ámen.

## IV Loahpaheapme

---

### 17. Buressivdnáduš

---

**B** Herrá buressivdnidivččii din ja várjalivččii din.

Herrá čuvgešii muođuidis didjiide

ja livččii didjiide árbmugas.

Herrá jorgalivččii muođuidis din beallái

ja attášii didjiide ráfi.

Áhči ja + Bárdni ja Bassi Vuoiŋŋa nammii.

**S** Ámen.

## 18. Sálbma

---

Sálmma maŋŋá báhppa juohká gásta- ja risvánhenduodaštusaid ja bovde oassálastiid ipmilbálvalussii, mas rohkadallovuo gástašuvvon máná sihke su vanhemiid ja risvánhemiid ovddas.



# Nuora ja ollesolbmo gásta

Dát minsttar geavahuvvo gásttašettiin 15 jagi deavdán nuora. Dan sáhtta guorahallama manjá geavahit maidái árranuora gásttašettiin. (Vuollái 15-jahkásaš máná oskkolaš dillái guoski mearrádusain gč. máná gástta minstara.)

Dat nuorat ja ollesolbmot, guđet eai leat gásttašuvvon rievttuid, váldojuvvojit girku oktavuhtii dainna lágiin, ahte sii dárbbášlaš oahpahusa manjá ožžot bassi gástta. (GO 1: 3.)

Vihhtanuplot jagi deavdán mánná sáhtta fuolaheaddjiidis girjjálaš lobiin ieš searvat oskkoldatovttastupmái dahje earránit das. Son galgá ovdan buktit girku searvama bivdaga searvegotti girkohearrái.

Olbmos galget leat ankke guokte risvánhema, guđet leat konfirmerejuvvon evangelalaš-luteralaš oskku dovddasteaddji girku lahtut. Dáid lassin risvánhemin sáhtta leat maid eará kristtalaš girku dahje oskkoldatovttastupmái gulli olmmoš, guhte dohkkeha evangelalaš-luteralaš girku doaimmahan gástta. Uhcimustá guovttis risvánhemiin galget leat mielde gástadoaimmahusas. (Girkoortnet 2: 17.) Eará kristtalaš girku dahje oskkoldatovttastumi lahtus lea riekti doaimmat risvánhemin, juos girkolaščoahkkin lea dohkkehan duoinna girkuin dahje oskkoldatovttastumiin dahkkojuvvon soahpamuša. (GO vuosttas logu 4 § 2 mom.)

Nuora ja ollesolbmo gásta vástida maid konfirmašuvvna. Gásttašuvvon olbmos lea goittotge riekti oassálastit oktasaš konfirmašuvdnii ovdamearkka dihtii rihppaskuvlajoavkkuin.

Gásta doaimmahuvvo girkus, ruovttus dahje eará heivvolaš sajis (Girkoortnet 2: 16).

Gástadoaimmahusa boddii sáhtta cahkkehit beassášgintala.

Musihka válljemis galgá váldit vuhtii doaimmahusa ipmilbálvaluslágan luonddu.

Olmmoš coggá badjelis, juos vejolaš, alba. Alba sáhtta gárvvohuvvot juogo ovdal doaimmahusa dahje čuoggá 14 (gásta) buohta.

## I Álggahus

---

### 1. Sálbma

---

### 2. Álgosivdnideapme

---

Buressivdnádusa lea vejolaš lávlut dahje lohkat.

**Buressivdnádus**

**B** Áhči ja + Bártni ja Bassi Vuoiŋŋa nammii.

**S** Ámen.

## Vuorodearvvahus

**B** Hearrá lehkos dinguin.

**S** Nu son lehkos maddái du vuoiŋŋain.

### 3. Álggahansánit

---

Báhppa ráhkada álggahansániid ieš dahje geavaha čuovvovačča.

**B** Ráhkis ustibat. Odne mii illudit Ipmila beasti árpmus. Gásttas almmálas Áhčči váldá du, NN (ovdanamat), mánnánis, searvegotti lahttun ja agálas eallima árbejeddjin. Jesus cealká: ”Dat guhte osku ja gásttašuvvo, bestojuvvo.” (Mark 16: 16)

### 4. Biibbalsálbma

---

Sáhtta atnit maddái girkojagi čuovvu dahje eará biibbalsálmmaid.

Biibbalsálmma sáhtta lohkat dahje lávlut. Dan álggus ja loahpas sáhtta leat antifona.

Biibbalsálbmii laktojuvvo Uhca gudni. Dan sajis sáhtta atnit čuovvovaš sálmmaid vearssaid: 5:4, 66:3, 136:7, 218:7, 336:8, 340:8, 341:10, 348:6, 379:6. Uhca gudni guđđojuvvo eret 5. fástoáiggi sotnabeaivvi rájes.

#### Antifona

Bohtet geahččat Ipmila daguid,  
su imašlaš daguid olbmuid gaskkas.

Sál 66: 5

#### DAHJE

Dát lea dat beaivi man Hearrá lea dahkan,  
ávvudehkot ja illudehkot!

Sál 118: 24

#### Biibbalsálbma

Hearrá, Ipmileamet,  
man hearváí lea du namma miehtá eatnama,  
don lebbet hearvásvuodat albmái.

Uhcahaččaid ja njuoratmánáid njálmmis

don leat vuoddudan alcesat suoji vašálaččaidat vuostái,  
bissehit juohke vuostálasti ja mávssaheaddji.  
Go mun oainnán du almmi, du suorpmaid dagu,  
mánu ja násttiid maid don leat ráhkadan,  
de mii lea dalle olmmoš, go don muittát su,  
olbmománna, go don anát sus fuola?  
Don dahket su goasii Ipmila láhkásažžan  
ja kruvnnidit su hearvásvuodain ja gudniin.  
Hearrá, Ipmileamet,  
man hearváii lea du namma miehtá eatnama.

Sál 8: 2–6, 10

### **DAHJE**

Mun máinnun álo Hearrá,  
mu njálbmi rávida su čadat.  
Mu siellu addá gudni Hearrái,  
vuollegaš olbmot gullet dan ja illudit.  
Gudnejahttot Hearrá,  
rávidehket ovttas su nama.  
Mun ohcen Hearrá ja son vástidii munnje,  
son besttii mu eret buot balus.  
Sii geat gehččet su guvlui, báitet ilus,  
eaige sin muodut goassege ruvsot heahpanemiin.

Sál 34: 2–6

### **DAHJE**

Rámidehket Hearrá, oppa eanan.  
Bálvolehket Hearrá ilus,  
bohtet su muoduid ovdii ávuin!  
Dovdet ahte Hearrá lea Ipmil!  
Son lea sivdnidan min, ja mii leat su,  
su olbmot ja su sávzzat maid son geahččá.  
Mannet su poarttaid čada giittoslávlagiin,  
mannet su ovdašiljuide máidnunlávlagiin.

Giitet su ja máidnot su nama.

Dasgo Hearrá lea buorre,  
su árbmugasvuohta bistá agálaš áigái,  
su oskkáldasvuohta sogas sohkkii.

Sál 100

## **DAHJE**

Mun bajidan čalmmiidan váriid guvlui:

Gos bohtá munnje veahkki?

Mu veahkki bohtá Hearrás,  
almmi ja eatnama sivdnideaddjis.

Ii son divtte du juolggi suoibut,  
du goziheaddji ii oadestuva.

Ii son oadestuva iige nohka,  
Son, guhte lea Israela goziheaddji.

Hearrá lea du goziheaddji,

Hearrá lea du suoivvan du olgeš gieda bealde.

Beaivváš ii vahágahte du beaivet  
iige mánnu ihkku.

Hearrá várjala du buot bahás,  
son várjala du heakka.

Hearrá várjala du vuolgima ja du bohtima  
dálážis gitta agálaš áigái.

Sál 121

## **Uhca Gudni**

Gudni Áhččái ja Bárdnái

ja Bassi Vuignii,

nugo lei álggus, dál lea ja álo  
agálašvuodas agálašvuhtii. Ámen.

**Antifona geardduhuvvo.**

## 5. Ruossamearka

---

Báhppa dahká ruossamearka nuora/ollesolbmo gállui ja raddái ja dadjá:

Váldde bassi ruossamearka du gállui + ja du raddái + duodaštussan das, ahte russiinávlejuvvon ja bajasčuožžilan Jesus Kristus lea du lonistan ja gohččon du máhttájeaddjinis.

Báhppa joatká:

Árbmugas Ipmil lea Bártnis Jesusa Kristusa bokte dahkan du friddjan suttu, jápmima ja bahá válddis. Addos son sutnje fámu juohke beaivve jápmit eret suttus ja eallit Kristusis.

### **DAHJE**

Báhppa cealká:

Árbmugas Ipmil. Don okto beasttát min buot bahás. Luoitte NN (ovdanamat) luovusin seavdnjatvuoda válddis. Čále su nama eallima girjái ja láide su čuovggastat.

Báhppa dahká ruossamearka nuora / ollesolbmo gállui ja raddái ja dadjá:

Váldde bassi ruossamearka du gállui + ja du raddái + duodaštussan das, ahte russiinávlejuvvon ja bajasčuožžilan Jesus Kristus lea du lonistan ja gohččon du máhttájeaddjinis.

## 6. Rohkos

---

Rohkosávžžuhusa ja searvegotti ámena lea vejolaš lohkat dahje lávlut. Ávžžuhusa manjá sáhtá leat oanehis jaskes rohkos.

### **B** Rohkadallot.

1. Ipmil, almmálaš Áhččámet,  
mii rámidit du eallima attáldagas.  
Gásttas don attát midjiide du árpmu ja ráhkisvuoda.  
Váldde oapminat NN,  
guhte lea buressivdniduvvon ruossamearkkain.  
Lehkos Bártnat Jesusa Kristusa soabahanbargu su suodjin.  
Divtte Bassi Vuoiŋŋa ássat sus,

nu ahte son rávásmuvašii oskkus ja ráhkisvuodas.

Gula min Jesusa Kristusa dihtii.

## 2. Buotveagalaš Ipmil, ráhkis almmálaš Áhčči.

Mii giitit du gástta attáldagas.

Mii giitit, ahte gásttas suddut sihkkovuođot eret Jesusa nammii ja du Bassi Vuoiŋŋa riegeáhtta min oddasis.

Mii rohkadallat:

Váldde oapminat NN,

guhte lea buressivdniduvvon ruossamearkkain.

Váldde su bassi gásttas du oktavuhtii.

Divtte, ahte son suddu, jápmima ja seavdnjadasa válddi vuoitin bálvalivččii mánnánat du oppa eallimis áigge.

Atte sutnje oktii ruovttu du luhtte almmis.

Gula min Jesusa Kristusa dihtii.

**S** Ámen.

## II Sáni

---

### 7. Biibbalohkan

---

Evangeliuma ovdal lea vejolaš lohkat mannu čuovvovaš čálabihtáin. Sáhtá atnit maid girkojagi čuovvu dahje eará čálabihtáid.

Lohkki almmuha čálasaji.

Biibbalohkamii lea vejolaš laktit vástádusa (biibbalsálbma, sálbma, lávlla, čuojanas-musihkka dahje jaskes mediteren).

Jes 43: 1

Apd 2: 38–39

Jorgalehket, ja diktet buohkat iežadet gásttašuvvot Jesusa Kristusa nammii, juohkehaš dis, vai oažžubehtet sudduid ándagassii addojumi ja Bassi Vuoiŋŋa attáldahkan. Dasgo lohpadus

gullá didjiide ja din mánáide ja buohkaide geat leat guhkin eret, nu olusiidda go Hearrá Ipmileamet rávká.

Rom 6: 3–11

Ehpetgo dii diede ahte mii buohkat, geat gásttašuvvuimet Kristusii Jesusii, gásttašuvvuimet su jápmimii? Mii nappo hávdáduvvuimet suinna go gásttašuvvuimet jápmimii, vai beasašeimmet eallit odđa eallima, nugo Áhči hearvásvuohta bajásčuoččáldahtii Kristusa jábmiid luhte. Dasgo juos mii leat ovttahttojuvvon suinna go jápmit nugo son, de mii maiddáii ovttahttojuvvot suinna go bajásčuoččáldahttojuvvot nugo son.

Mii diehtit ahte min boares luondu russiinávlejuvvui suinna, vai suddolaš rumaš duššaduvvo, amamet mii leat šat suddu šlávvan. Dasgo dat guhte lea jápmán, lea beassan suddu fámus. Juos mii leat jápmán Kristusiin, de oskut ahte mii maiddáii eallit suinna. Miihan diehtit ahte go Kristus lea bajásčuoččáldahtton jábmiid luhte, de ii šat jáme, iige jápmin šat rádde su. Go son jámii, de son jámii ovttá geardde eret suddus. Go son dál eallá, de eallá Ipmilii. Seammá láhkái diige galgabehtet atnit iežadet: Dii lehpēt jápmán eret suddus, muhto eallibehtet Ipmilii Kristusis Jesusis.

Gal 3: 26–28

Dii lehpēt buohkat Ipmila mánát go oskubehitet Kristusii Jesusii. Buohkat dii, geat lehpēt gásttašuvvon Kristusii, lehpēt gárvodan Kristusiin. Dás ii leat juvddálaš dahje greikalaš, šlávva dahje isit, olmmái iige nisu, dasgo dii lehpēt buohkat okta Kristusis Jesusis.

Tit 3: 4–5

Go min Ipmila ja beasti buorre vuoha ja ráhkisvuoha olbmuide almmustuvai, de son besttii min, ii min vanhurskkis daguid

dihtii, muhto váibmoládisvuodas dihtii; son besttii min dainna lágguin mas Bassi Vuoigŋa riegádahtta min oddasis ja odasmahtta min.

1 Biet 3: 20–21

Dušše soapmásat, namalassii gávccis, bestojuvvojedje árkkas, go čáhci guttii dan. Dát čáhci vástida gástta mii dál beasta din. Dat ii buhtis rupmaša olgguldas duolvvas, muhto lea buori oamedovddu lihttu Ipmiliin.

Mark 16: 15–16

Jesus cealká:

”Vulget oppa máilbmái ja sárdnidehket evangeliuma buot sivdnádusaide! Dat guhte osku ja gásttašuvvo, bestojuvvo, muhto dat guhte ii oskko, dubmejuvvo.”

## **DAHJE**

Joh 3: 5–8

Jesus celkkii Nikodemosii:

”Duodaid, duodaid, mun cealkkán dutnje: Dat guhte ii riegát čázis ja Vuoigŋas, ii beasa Ipmila riikii. Dat mii lea riegádan oaččis, lea oažži, muhto dat mii lea riegádan Vuoigŋas, lea vuoigŋa. Ale ovddoš go mun celken ahte dii fertebehtet riegádit oddasis. Biegga bossu gosa dáhttu; don gulat dan šuvvamin, muhto it diede gos bodeš ja gosa manaš. Nu lea maddái juohkehaččas gii lea riegádan Vuoigŋas.”



## 8. Sárdni

---

Báhppa doallá friddja sártni dahje atná čuovvovaš gástasártni. Báhppa sáhtá ovttas gástii boahhti olbmuiin válljet biibbalvearssa dahje gurgadasa, mii giehtadallovuođas sártnis ja mii čállojuvvo bajás gástaduodašussii. Gástasártnis galggašii váldit vuhtii iešguhtege gástadilálašvuoda ja giehtadallat ovdamearkka dihte čuovvovaš fáttáid:

- eallima attáldat (sivdnideapme), Kristusa soabahanbargu (lonástus), Bassi Vuoiŋŋa attáldat (basuheapme)
- searvegotti oktavuhtii laktin
- rávásmuvvan ja eallin Jesusa čuovvun
- vánhemat ja risvánhemat gásttašuvvon olbmo vuoiŋŋalaš láidesteadjin.

Ráhkis ustibat. Hearrámet Jesus Kristus lea ásahan bassi gástta. Dat lea uksa kristtalaš girku. Don, NN, leat ožžon oahpahusa oskku vuoddoáššiin. Dan oskku min girku lea doložis buktán ovdan oskkudovddastusas, man mii farga ovttas lohkat. Gásta bissu áli fámus. Juos álggát eahpidit Ipmila ráhkisvuoda, muite dán bottu ja cealkke mielastat: mun lean gásttašuvvon, mun lean Ipmila mánná.

Ipmil addá midjiide gásttas Bassi Vuoiŋŋa, mii veahkeha min luohit Ipmilii ja eallit kristtalažžan. Mii oažžut gástta árpmu ollásit attáldahkan. Gástii lea čihkkojuvvon olles bestojupmi, eallin ja ávdugasvuoha.

Lea dehálaš eallit searvegotti oktavuodas. NN, don leat buresboahčan oktasaš ipmilbálvalussii. Sáhtát boahit dohko giitit, rohkadallat ja vásihit oktavuoda. Boade eahkedaččaide, gos Jesus ieš bálvala du ja dikšu árpmuinis. Loga Biibbala ja rohkadala, ná kristtalaš osku guoddá du beaivválaččat ja oaččut fámu bargat barggu daid áššiid ovddas, mat Jesusii ledje dehálaččat. Dii/doai, risvánhemat, lehpit/leahppi bovdejuvvon doarjut NN. Muiet su rohkosiinnádet. Ohccet ovttas eallima geainnu.

Gásta gohčču min beaivválaččat eallit ándagassiiaddojumis, ráhkistit ja bálvalit lagamuččaideamet.

Don leat aiddo ožžon ruossamearkka gállosat ja raddásat. Dat bissu mis ja roahkasmahtá čuovvut Kristusa. Son lea lohpidan orrut minguin čuovgan seavdnjatvuodas buot beivviid máilmmi loahpa rádjái.

## 9. Sálbma

Sálmma sajis sáhttá leat eará heivvolaš musihkka.

# III Gásttašeapme

---

## 10. Gástagohččun

---

**B** Hearrámet Jesus Kristus lea ieš ásahan bassi gástta. Son celkkii máhttájeaddjiidasas: ”Munnje lea addojuvvon buot fápmu almmis ja eatnama alde. Vulget dan dihtii ja dahket buot álbmogiid máhttájeaddjin gásttašettiin sin Áhči ja Bártni ja Bassi Vuoiŋŋa nammii ja oahpahettiin sin doallat buot dan maid mun lean gohččon din doallat. Ja gehččet, mun lean dinguin buot beivviid gitta dálá máilmmi loahpa rádjái.” (Matt 28: 18–20)

### DAHJE

**B** Rohkadallot.

Buotveagalaš ja árbmugas Ipmil. Álggos don sivdnidit almmi ja eatnama ja du eallima addi Vuoiŋŋa jodii čáziid alde. Čáhči lea du attáldat, mii áhpásmahtta ja doallá bajás oppa luondduriikka. Dulvaddettiin don heavahit suttu, muhto gádjot Noa ja su bearraša. Ná don addet midjiide ovdagova gásttas. Don jodihit álbmogat Ruksesmeara rastá ja dahket dan friddjan farao šlávavuodas. Du dáhtu mielde Johanas gásttašii Bártnát Jesusa Jordaneanu čázis, ja don vuoiddedit su Bassi Vuoiŋŋain. Ruossa alde son golggahii erttegisttis vara ja čázi, ja jápmimis bajásčuožžilettiin son ieš ásahii bassi gástta cealkkedettiin máhttájeaddjiidasas:

”Munnje lea addojuvvon buot fápmu almmis ja eatnama alde. Vulget dan dihtii ja dahket buot álbmogiid máhttájeaddjin gásttašettiin sin Áhči ja Bártni ja Bassi Vuoiŋŋa nammii ja oahpahettiin sin doallat buot dan maid mun lean gohččon din doallat. Ja gehččet, mun lean dinguin buot beivviid gitta dálá máilmmi loahpa rádjái.” (Matt 28: 18–20)

Gulolažžan Bártnát gohččumii mii rohkadallat: Geahča dál girkot beallái ja raba dasa gástta gáldu. Vuolggat Bassi Vuoiŋnat riegádahttit odđa eallima, nu ahte dat, guhte dán árpmu gáldus hávdáduvvo Kristusa jápmimii, maiddái suinna bajásčuožžilivččii odđa eallimii. Muittuhehkos dát čáhci min gásttasteamet ja goallostehkos dat min oktasaš ilus buot daidda vieljaide ja oappáide, gudet leat gásttas čadnojuvvon Kristusa rupmašii. Dán mii rohkadallat Kristusa, Hearrámet, dihtii.

**S** Ámen.

## **DAHJE**

**B** Rohkadallot.

Ipmil, eallima addi. Don sivdnidit čázi addit eatnamii šattu ja áhpásmahttit ja buhtistit min. Don gádjot Noa ja su bearraša árkkas. Mii giitit du das, ahte gásta lea midjiide bestojumi árka. Du álbmot jodii čázi čada friddjavuhtii Egypta šlávavuodas. Bárdnát Jesus oaččui gástta Jordaneanu čázis. Jápmimiinnis ja bajásčuožžilemiinis son čovddii min suttu ja jápmima čatnasiin. Jápmimis bajásčuožžilettiin son ieš ásahii bassi gástta cealkkedettiin máhttájeaddjiidasas:

”Munnje lea addojuvvon buot fápmu almmis ja eatnama alde. Vulget dan dihtii ja dahket buot álbmogiid máhttájeaddjin gásttašettiin sin Áhči ja Bártni ja Bassi Vuoiŋna nammii ja oahpahettiin sin doallat buot dan maid mun lean gohččon din doallat. Ja gehččet, mun lean dinguin buot beivviid gitta dálá máilmmi loahpa rádjái.” (Matt 28: 18–20)

Mii rohkadallat: Vuolggat Bassi Vuoiŋnat, nu ahte son, guhte gásttašuvvo dán čázis, oažžu odđa eallima. Daga su agálaš riikkat árbejeaddjin. Gula min rohkosa Jesusa Kristusa, Hearrámet dihtii.

**S** Ámen.

## \*11. Oskkudovddastus

---

Oskkudovddastus lohkkovuo ovttá jittii.

**S** Mun oskkun Ipmilii, Áhččái, Buotveagalažžii,  
almmi ja eatnama Sivdnideaddjái,  
ja Jesusii Kristusii,  
Ipmila áidnoriegádan Bárdnái, min Hearrái,  
guhte sahkanii Bassi Vuoinŋas,  
riegádii nieida Márjjás,  
gillái Pontius Pilatusa áigge,  
russiinávlejuvvui, jámii ja hávdáduvvui,  
manai vuolás jábmiid riikii,  
bajásčuožžilii jábmiid luhtte goalmmát beaivve,  
manai bajás albmái,  
čohkká Ipmila, buotveagalaš Áhči, olgeš gieda bealde,  
ja bohtá fas doppe dubmet calliid ja jábmiid,  
ja Bassi Vuignii,  
bassi oktasaš girku,  
bassi olbmuid searvivuoda,  
suttuid ándagassii addojumi,  
oačči bajásčuožžileame  
ja agálaš callima.

## \*12. Gažaldat

---

**B** Dáhtutgo, ahte don gásttašuvvot dán oskui ja buot dan lohpadusaid  
oamasteapmái?

Vástáduš:

De dáhtun.

## \*13. Gásta

---

**B** Kristusa báhkkoma mielde mii gásttašit du golbmaoktalaš Ipmila nammii.

Báhppa goive čázi golbmii olbmo oaivvi ala ja cealká:

*NN (ovdanamat), mun gásttašan du Áhči ja Bártni ja Bassi Vuoiŋŋa nammii.*

Báhppa bidjá gieda olbmo oaivvi ala. Son sáhtá bivdit (vánhenguovtto ja) risvánhemiid dahkat seammaláhkai.

**B** Hearrámet Jesusa Kristusa árbmu ja Ipmila ráhkisvuohta ja Bassi Vuoiŋŋa oasálašvuohta lehkos duinna.

**Gásttašuvvon olmmoš Ámen.**

Risvánhemat gárvvohit gásttašuvvon olbmo albain, juos dat ii leačča leamaš su badjelis juo doaimmahusa álggu rájes.

Báhppa cealká:

Vilges alba muittuha min apoasttal Bávlosa sániin: ”Buohkat dii geat lehpet gásttašuvvon Kristusii, lehpet gárvodan Kristusiin.” (Gal 3: 27)

Juos geavahuvvo gástaginttal, báhppa cahkkeha dan áltára dahje gástabeavddi gintalis dahje beassášgintalis, geige dan gásttašuvvon olbmui ja cealká:

Jesus cealká: ”Mun lean máilmmi čuovggas. Dat guhte čuovvu mu, ii goassege vádjol seavdnjadasas, muhto sus lea eallima čuovggas.” (Joh 8: 12)

**B** Bassi gásttas mii leat váldán du Kristusa girku ja X searvegotti lahttun. Mii muitit su ja su ruovttu min ráhkisvuodain ja ovddasrohkosiiiguin. Apoasttal Bávlos cealká: ”Dii ehpet leat šat amas olbmot ja vierrásat, muhto dii lehpet Ipmila olbmuid siidaguoimmit ja gullabehtet Ipmila dáluolbmuide.” (Ef 2: 19)

## 14. Sálbma

---

Sálmma sajis sáhttá leat eará heivvolaš musihkka.

## 15. Oktasaš ovddasrohkos

---

Ávvuboddui oassálastit sáhttet ovtta ráhkadit ja ollašuhttit rohkosa.

**B** Rohkadallot.

1. Buotveagalaš Ipmil, Herrámet Jesusa Kristusa Áhčči. Mii giitit du das, ahte don leat gohččon NN girkot oktavuhtii ja váldán su gásttas oapminat. Nanne su Bassi Vuoiŋgainat. Divtte su beaivválaččat dorvvastit dutnje. Veahket maid risvánhemiid doarjut su. Divtte min buohkaid rávásmiit oskkus ja ráhkisvuodas, eallit searvegottát oktavuodas ja árbeht oktii du luhtte agalaš eallima. Gula min Bárnát Jesusa Kristusa, Herrámet bokte.
2. Almmálaš Áhččámet. Mii giitit du das, ahte gásttas don leat láiden min seavdnjadasas čuovgatvuhtii. Mii rohkadallat odne gásttašuvvon oabbámet/vielljemet ovddas. Divtte su ahtanuššat oskkus. Nanne su sániin ja sakramentaiguin. Veahket su rohkosis dorvvastit dutnje. Roahkasmahte min buohkaid ollašuhttit bargguideamet du dáhtu mielde. Dán mii bivdit Jesusa Kristusa dihtii.

**S** Ámen.

## 16. Áhččámet

---

Herrá rohkos celkojuvvo ovtta jitnii.

**S** Áhččámet, don guhte leat almmis.

Basuhuvvos du namma.

Bohtos du riika.

Šaddos du dáhttu,

mo almmis nu maddái eatnama alde.

Atte midjiide odne min beaivválaš láibbi.

Ja atte midjiide min suttuid ándagassii,

nugo miige ándagassii addit velggolaččaidasamet.  
Alege doalvvo min geahččalussii,  
muhto beastte min bahás eret.  
Dasgo du lea riika ja fápmu ja gudni agálašvuhtii.  
Ámen.

## IV Loahpaheapme

---

### 17. Buressivdnádus

---

- B** Hearrá buressivdnidivččii din ja várjalivččii din.  
Hearrá čuvgešii muođuidis didjiide  
ja livččii didjiide árbmugas.  
Hearrá jorgalivččii muođuidis din beallái  
ja attášii didjiide ráfi.  
Áhči ja + Bártne ja Bassi Vuoiŋŋa nammii.
- S** Ámen.

### 18. Sálbma

---

Sálmma maŋŋá báhppa juohká gásta- ja risvánhenduodaštusaid ja bovde oassálastiid ipmilbálvalussii, mas rohkadalloyvvo gásttašuvvon olbmo ja su vánhemiid ja risvánhemiid ovddas.

# Gásta ipmilbálvalusa oktavuodas

Go gásta doaimmahuvvo searvegotti ipmilbálvalusas, dasa laktojuvvojit dás ovdanboahtti oasis. Sártni manjá vanhemat ja risvánhemat sirdásit gástii bukton mánáin gástageara gurrii.

Nuora ja ollesolbmo gásttašettiin materiála heivehuvvo.

Ipmilbálvalusa boddii sáhtta cahkkehit beassášgintala.

Gástačáhci sáhtta leat gárvvisin gástagearas, dahje čázi sáhtta njojret dasa ovdalaš gástagohččuma ja rohkosa.

## Álggahansánit

---

Báhppa ráhkada álggahansániid ieš dahje geavaha čuovvovačča.

- L** Ráhkis kristtalaččat. Mii leat boahtán ávvudit searvegotti oktasaš allabottu.

Juohke ipmilbálvalusas mii ávvudit gástta muitima. Ná lea erenoamážit odne, go meassus/ipmilbálvalusas doaimmahuvvo bassi gásta. Gásttas mii šaddat Kristusa máhttájeaddjin ja kristtalaš girku lahttun. Gásttas skeaŋkan ožžojuvvon Bassi Vuoigŋa veahkeha juohke gásttašuvvon olbmo callit kristtalažžan.

Kristtalaš callá Kristusa čuovggas. Dát čuovga vuoitá suttu ja jápmima seavdnjatvuoda.

Gásttas mii leat gohčohallan luohhtit duššefal Kristusii ja callit su ovdamearkka mielde. Mii gártat almmatge juohke beaivve miedehit, ahte mii eat leat čuvvon su dáhtu. Liikká mii oažžut máhccat gástta árbmui. Dása mii dorvvastit, go mii dál dovddastit Ipmilii suttuideamet.

--

## Suttudovddastus

---

Suttudovddastussan sáhtta atnit čuovvovačča:



Almmálaš Áhčči.

Mun lean gásttašuvvon du mánnán.

Don leat jodihan mu seavdnjadadas čuovgasii,  
beastán mu gádohusas almmi árbbolažžan.

In leat almmatge eallán nugo du mánná galgá.

In leat guldalan du jiena inge jeagadan du dáhtu.

Ipmil, árpmil mu du Bártni Jesusa Kristusa dihtii.

Basa mu buhtisin ja atte buot mu sudduid ándagassii.

--

## Beaivvi rohkos

---

Sáhtta geavahit maidái girkojagi čuovvu beaivvi rohkosa.

### L Rohkadallot.

#### 1. Ipmil, almmálaš Áhččámet.

Don skeŋket midjiide eallima ja válldát min gásttas mánnánat.

Nanne min Bassi Vuoiŋŋainat,

nu ahte mii rávásmil oskkus ja ráhkisvuodas.

Gula min Jesusa Kristusa dihtii.

#### 2. Buotveagalaš Ipmil, ráhkis almmálaš Áhčči.

Mii giitit gásttas,

mas don basat min buhtisin suddus

ja skeŋket Bassi Vuoiŋŋat.

Veahket min eallit mánnánat oppa eallimeamet áigge.

Gula min Jesusa Kristusa dihtii.

#### 3. Almmálaš Áhččámet,

mii giitit du das,

ahte don leat addán bassi gástta

ja čatnan das min

ráhkis Bártnat jápmima ja bajásčuožžileame oasálašvuhtii.

Láide min Bassi Vuoiŋŋainat,

nu ahte mii ealášeimmet gástta árpmus.

Veahket min bálvalit du oskkus  
ja skeŋke midjiide viimmat  
du luhtte agálaš eallima.  
Dán mii rohkadallat Jesusa Kristusa,  
min Hearrámet namas.

**S** Ámen.

---

## Evangelium

---

Lohkkojuvvo beaivvi evangelium. Molssaeaktun sáhtá lohkat maidái mánáid evangeliuma.

Mark 10: 13–16

Sii gudde uhca mánážiid Jesusa lusa vai son guoskkahivččii daid, muhto máhttájeaddjit šiggo sin. Go Jesus oinnii dan, de moaráhuvai ja celkkii sidjiide: ”Diktet uhca mánážiid boahit mu lusa, alletge hehte sin! Dasgo Ipmila riika gullá dakkáraččaide. Duodaid, mun cealkkán didjiide: Dat guhte ii vuostáiváldde Ipmila riikka nugo uhca mánáš, ii eisege beasa dan sisa.” Ja son válddii sin sallasis, bijai giedaidis sin ala ja buressivdnidii sin.

[**L** Dát lea bassi evangelium.

**S** Rámádus dutnje, Kristus.]

---

## Sárdni

---

Sárdni dollojuvvo lohkkojuvvon evangeliuma dahje goappánu čálabihtá vuodul.

---

## Gažaldagat dahje ávžžuhus

---

Vánhemat ja risvánhemat sirdásit gástii bukton mánáin gástageara gurrii.

### Gažaldagat

**L** Vánhenguovttos, man nama doai leahppi addán mánnái?

Vástáduš:

NN (ovdanamat).

- L** Vánhenguovttos, dáhttubeahttigo, ahte son gásttašuvvo kristtalaš oskui?

Vástáduš:

De dáhtun.

- L** Vánhenguovttos ja risvánhemat, dáhttubehtetgo ovttas searvegottiin fuolahit das, ahte NN oažžu kristtalaš bajásgeassima?

Vástáduš:

De dáhtun.

## **DAHJE**

- L** Doai, vánhenguovttos, leahppi addán mánnái namman NN (ovdanamat). Dáhttubeahttigo, ahte son gásttašuvvo dán oskui?

Vástáduš:

De dáhtun.

- L** Vánhenguovttos ja risvánhemat, dáhttubehtetgo ovttas searvegottiin fuolahit das, ahte NN oažžu kristtalaš bajásgeassima?

Vástáduš:

De dáhtun.

## **Ávžžuhus**

- L** Doai, vánhenguovttos, leahppi addán dudno mánnái namman NN (ovdanamat).

Odne son gásttašuvvo kristtalaš oskui.

Vánhenguovttos ja risvánhemat, bassi gásta geatnegahtá din ovttas searvegottiin fuolahit su kristtalaš bajásgeassimis.

## Ruossamearka

---

Báhppa dahká ruossamearkka máná gállui ja raddái ja dadjá:

Váldde bassi ruossamearkka du gállui + ja du raddái + duodaštussan das, ahte russiinávlejuvvon ja bajásčuožžilan Jesus Kristus lea du lonistan ja gohččon du máhttájeaddjinis.

Báhppa joatká:

Árbmugas Ipmil lea Bártnis Jesusa Kristusa bokte dahkan du friddjan suttu, jápmima ja bahá válddis. Addos son dutnje fámu juohke beaivve jápmit eret suttus ja callit Kristusis.

### DAHJE

Báhppa cealká:

Árbmugas Ipmil. Don okto beasttát min buot bahás. Luoitte NN (ovdanamat) luovusin seavdnjatvuoda válddis. Čále su nama eallima girjái ja láide su čuovggastat.

Báhppa dahká ruossamearkka máná gállui ja raddái ja dadjá:

Váldde bassi ruossamearkka du gállui + ja du raddái + duodaštussan das, ahte russiinávlejuvvon ja bajásčuožžilan Jesus Kristus lea du lonistan ja gohččon du su máhttájeaddjin.

## Gástagohččun

---

**L** Hearrámet Jesus Kristus lea ieš ásahan bassi gástta. Son celkkii máhttájeaddjiidasas: ”Munnje lea addojuvvon buot fápmu almmis ja eatnama alde. Vulget dan dihtii ja dahket buot álbmogiid máhttájeaddjin gásttašettiin sin Áhči ja Bártni ja Bassi Vuoiŋga nammii ja oahpahettiin sin doallat buot dan maid mun lean gohččon din doallat. Ja gehččet, mun lean dinguin buot beivviid gitta dálá máilmmi loahpa rádjai.”

### DAHJE

**L** Rohkadallot.

Buotveagalaš ja árbmugas Ipmil. Álggos don sivdnidit almmi ja eatnama ja du eallima addi Vuoignja jodii čáziid bajábealde. Čáhci lea du attáldat, mii áhpásmahtta ja doallá bajás luondduriikka. Dulvademiin don heavahit suttu, muhto gádjot Noa ja su bearraša. Ná don addet midjiide ovdagova gásttas. Don jodihit álbmogat Ruksesmeara rastá ja dahket dan friddjan fárao šlávuvuodas. Du dáhtu mielde Johanas gásttašii Bártnát Jesusa Jordaneanu čázis, ja don vuidet su Bassi Vuoignain. Ruossa alde son golggahii erttegisttis vara ja čázi ja bajásčuožžilettiin son ieš ásahii bassi gástta, go celkkii máhttájeaddjiidasas:

”Munnje lea addojuvvon buot fápmu almmis ja eatnama alde. Vulget dan dihtii ja dahket buot álbmogiid máhttájeaddjin gásttašettiin sin Áhči ja Bártni ja Bassi Vuoignja nammii ja oahpahettiin sin doallat buot dan maid mun lean gohččon din doallat. Ja gehččet, mun lean dinguin buot beivviid gitta dálá máilmmi loahpa rádjái.” (Matt 28: 18–20)

Gulolažžan du Bártni gohččumii mii rohkadallat: Geahča dál girkot beallái ja raba dasa gástta gáldu. Vuolggat Bassi Vuoignat riegádahttit odđa eallima, nu ahte son, guhte dán árpmu gáldus hávdáduvvo Kristusa jápmimii, maiddái suinna bajásčuožžilivččii odđa eallimii. Muittuhehkos dát čáhci min gásttasteamet ja goallostehkos dat min oktasaš ilus buot daidda vieljaide ja oappáide, guđet leat gásttas čadnojuvvon Kristusa rupmašii. Dán mii bivdit Kristusa, Hearrámet, dihtii.

**S** Ámen.

## **DAHJE**

**L** Rohkadallot.

Ipmil, eallima addi. Don sivdnidit čázi addit eatnamii šattu ja áhpásmahttit ja buhtistit min. Don gádjot Noa ja su bearraša árkkas. Mii giitit du das, ahte gásta lea midjiide bestojumi árka. Du álbmot jodii čázi čada friddjavuhtii Egypta šlávuvuodas. Bárdnát Jesus oaččui gástta Jordaneanu čázis. Jápmimiinnis ja bajásčuožžilemiinis son čovddii min suttu ja jápmima čatnasiin. Bajásčuožžileamis maŋná son ieš ásahii bassi gástta, go celkkii máhttájeaddjiidasas:

”Munnje lea addojuvvon buot fápmu almmis ja eatnama alde. Vulget dan dihtii ja dahket buot álbmogiid máhttájeaddjin gásttašettiin sin Áhči ja Bártni ja Bassi Vuoiŋŋa nammii ja oahpahettiin sin doallat buot dan maid mun lean gohččon din doallat. Ja gehččet, mun lean dinguin buot beivviid gitta dálá máilmmi loahpa rádjái.” (Matt 28: 18–20)

Mii rohkadallat: Vuolggat Bassi Vuoiŋŋat, nu ahte son, guhte gásttašuvvo dán čázis, oažžu odđa eallima. Daga sus agálaš riikkat árbejeaddji. Gula min rohkosa Jesusa Kristusa, min Hearrámet dihtii.

**S** Ámen.

## \*Oskkudovddastus

---

Oskkudovddastus lohkkovuođo ovtta jitnii.

**L** Dovddastehkot ovtta min oktasaš kristtalaš oskomet.

**S** Mun oskkun Ipmilii,  
Áhččái, Buotveagalažžii,  
almmi ja eatnama Sivadnideaddjái,  
ja Jesusii Kristusii,  
Ipmila áidnoriegádan Bárdnái, min Hearrái,  
guhte sahkanii Bassi Vuoiŋŋas,  
riegádii nieida Márjjás,  
gillái Pontius Pilatusa áigge,  
russiinávlejuvvui, jámii ja hávdáduvvui,  
manai vuolás jábmiid riikii,  
bajásčuožžilii jábmiid luhtte goalmmát beaivve,  
manai bajás albmái,  
čohkká Ipmila, buotveagalaš Áhči, olgeš gieda bealde,  
ja bohtá fas doppe dubmet calliid ja jábmiid,  
ja Bassi Vuoiŋŋii,  
bassi oktasaš girku,  
bassi olbmuid searvivuoda,

suttuid ándagassii addojumi,  
oačči bajásčuožžileame  
ja agálaš eallima.

**L** Dán oskui ja buot dan lohpadusaid oamasteapmái mii gásttašit dán máná golbmaoktalaš Ipmila nammii.

## \*Gásta

---

Báhppa goive čázi golbmii máná oaivvi ala ja cealká:

*NN (ovdanamat), mun gásttašan du Áhči ja Bártni ja Bassi  
Vuoijña nammii.*

Báhppa bidjá gieda máná oaivvi ala. Son sáhtá bivdit vánhenguovtto ja risvánhemiid dahkat seammaláhkai.

**L** Hearrámet Jesusa Kristusa árbmu ja Ipmila ráhkisvuohta ja Bassi Vuoijña oasálašvuohta lehkos duinna.

**S** Ámen.

Báhppa dollesta gástabiktasis ja cealká:

Apoasttal Bávlos cealká: ”Buohkat dii geat lehpet gásttašuvvon Kristusii, lehpet gárvodan Kristusiin”. (Gal 3: 27)

Báhppa cahkkeha gástagintala áltára dahje gástabeavddi gintalis dahje beassášgintalis, geige dan vánhemiidda ja cealká:

Jesus cealká: ”Mun lean máilmmi čuovggas. Dat guhte čuovvu mu, ii goassege vádjol seavdnjadasas, muhto sus lea eallima čuovggas”. (Joh 8: 12)

Báhppa váldá máná sallasis ja cealká:

Bassi gásttas NN (ovdanamat) lea váldojuvvon Kristusa girku ja X searvegotti lahtun. Mii muitit su ja su ruovttu min ráhkisvuodain ja ovddasrohkosiiguin. Jesus válddii máná sallasis ja celkkii: ”Dat guhte vuostáiváldá dákkár uhca mánáža mu nammii, vuostáiváldá mu”. (Mark 9: 37)

Báhppa addá máná goappánu vánhemii dahje risvánhemii.

Vánhemat ja risvánhemat sirdásit gásttašuvvon mánáin iežaset sajiide.

## Sálbma

---

Sálmma sajis sáhtta leat lávlla dahje čuojanasmusihkka.

## Oktasaš ovddasrohkos

---

Oktasaš ovddasrohkosis rohkadalloyuvvo ipmilbálvalusas máná/mánáid ja su/sudno/sin lagaš olbmuid ovddas.

--

## Eahkedašrohkos

---

--

### Prefašuvvna loahppa gástameassus

Gásttas don gohčut min mánnánat

ja láidet min seavdnjatvuodas čuovgasii ja jápmimis eallimii.

Mii giitit du dán almmálaš attáldagas

ja lávlut dutnje rámadusa engeliiguin ja buot basiiguin:



**KONFIRMAŠUVDNA**

# Konfirmašuvdnameassu A

Konfirmašuvdnii sáhttet oassálastit dat girku lahtut, geain rihppaskuvlla vázzima vuodul lea dasa riekti. Konfirmašuvnnas dovddastuvvo girku osku ja fidnejuvvo riekti iehčanassii fitnat rihpain. Konfirmašuvnna doaimmaha báhppa dahje lektor. (GO 3: 5.)

Konfirmašuvdnameassu A vuodđuduvvá meassu minstarii. Dat gárvvistuvvo ovttas rihppaskuvlalaččaiguin.

Dát minsttar heivehuvvo go konfirmánta lea ollesolmmoš.

Oassálastit bohtet girku ruossamihtošis. Njunnošis bohtet ruossaguoddi ja ginttalguoddit, dasto konfirmánttat, rihppaskuvllas vástideaddji olbmot sihke sierra bálvalanbargguin doaibmit, mañimužžan liturga.

## I Álggahus

---

### \*1. Álggahansálbma

---

Sálmma sajis lea vejolaš geavahit biibbalsálmma, goarralávлага dahje čuojanasmusihka. Álgomusihka áigge lea ruossamieduš.

### 2. Álgosivdnideapme

---

Buessivdnádusa ja vuorodearvhusa lea vejolaš lávlut dahje lohkat.

#### Buessivdnádus

Nuohttaráidu 1



L Áh - či ja + Bárt - ni ja Bas-si Vuoiŋ-ŋa nam - mii.



S Á - men, á - men, á - men.

## Vuorodearvvahus

Nuohttaráidu 1



**L** Hear-rá leh-kos din - guin.




**S** Nu son leh-kos maid-dái du vuoij - ñain.

## DAHJE

## Buressivdnádus

Nuohttaráidu 2



**L** Áh - či ja + Bárt-ni ja Bas - si Vuoij-ña nam-mii.



**S** Á - men, á - men, á - men.

## Vuorodearvvahus

Nuohttaráidu 2



**L** Hear-rá leh-kos din-guin.



**S** Nu son leh-kos maid-dái du vuoij-ñain.

## 3. Álggahansánit

---

Báhppa ráhkada álggahansániid ieš dahje geavaha čuovvovačča.

**L** Ráhkis kristtalaččat. Mii ávvudit odne konfirmašuvdnameassu ovttas dáid nuoraiguin. Mii gullat Ipmila sáni, dovddastit oktasaš oskomet, rohkadallat ja giitit Ipmila. Mii bovdejuvvot maiddái Hearrá bassi eahkedaččaide.

Buorit nuorat. Álggu rájes Ipmila ráhkisvuohta lea leamaš dinguin eallimisttádet. Odne mii giitit gásttas, oktasaš rávásmuvvama jagiin ja rihppaskuvlaáiggis. Mii bivdit buressivdnádusa boahteáigái ja rohka-dallat, ahte Ipmil nannešii din oskkus ja roahkasmahtášii din eallit kristtalažžan.

Kristus lea máilmmi čuovggas. Dát čuovggas vuoitá suttu ja jápmima seavdnjatvuoda. Kristusa árbmui dorvvastemiin mii dovddastit dál ovttas suttuideamet.

## 4. Oktasaš rihpat

---

### Suttudovddastus

Suttudovddastusa sáhtá lohkat ovta jitnii. Dan boddii sáhtá luoitádit čippiid ala. Suttudovddastusa lea vejolaš boatkut searvegotti rohkodajaldagain dahje –lávlagiin, dahje dan gaskkas sáhtá leat jaskes boddu. Suttudovddastusas sáhtá leat maiddái jaskes rohkos, masa lea vejolaš ávžžuhit ovdamearka dihte: Gula maiddái mu/min jaskes ánda-gassiiátnuma.

Eará suttudovddastusat Ipmilbálvalusaid girjjis.

#### 1. Almmálaš Áhčči.

Mun lean gásttašuvvon du mánnán.

Don leat jodihan mu seavdnjadasas čuovgasii,

beastán mu gáđohusas almmi árbbolažžan.

In leat almmatge eallán nugo du mánná galgá.

In leat guldalan du jiena inge jeagadan du dáhtu.

Ipmil, árpmi mu du Bártni Jesusa Kristusa dihtii.

Basa mu buhtisin ja atte buot mu suttuid ándagassii.

#### 2. Hearrá,

don leat čuovga, muhto mun in leat geahččan dutnje.

Don leat geaidnu, muhto mun in leat čuvvon du.

Don leat duohtavuohta, muhto mun in leat bisson dus.

Don leat eallin, muhto mun in leat dovddastan dan.

Don leat mu oahpisteaddji, muhto mun in leat jeagadan du.

Ja almmatge, Hearrá,

go mun dagan boastut ja bilidan ealliman,  
de mun lean lihkoheapme ja sivahalan du.  
Hearrá, atte munnje ándagassii.  
Dán mun ánun Jesusa Kristusa,  
mu Beasti dihtii.

## Suttubeastin

Suttubeastima ámena sáhtá lávlut dahje lohkat.

Eará suttubeastimat lpmilbálvalusaid girjjis.

### 1. Ná cealká Hearrá:

”Ale bala, dasgo mun lean du lonistan.  
Mun lean du nama mielde gohččon, don leat mu.  
Várit gáidoset ja duoddarat doarggistehekset,  
muhto mu ráhkisvuohta dutnje ii rievdda  
iige mu ráfilihttu suoibbo.”

### 2. Jesus cealká:

”Ustiban, leage dorvvolaš mielain,  
du suttut leat dutnje ándagassii addojuvvon.”  
[Dán suttubeastima mun gulahan dutnje  
Áhči ja (+) Bártni ja Bassi Vuoiŋŋa nammii.]

**S** Ámen.

## 5. Beavvi biibbalsálbma

---

Sáhtá atnit maiddái girkojagi čuovvu dahje eará biibbalsálmmaid.

Juos álggahansálmma sajis (čuokkis 1) lea geavahuvvon biibbalsálbma, dát  
čuokkis báhcá eret.

Biibbalsálmma sáhtá lávlut dahje lohkat. Dan álggus ja loahpas sáhtá leat  
antifona.

Biibbalsálbmii laktojuvvo Uhca gudni. Dat guđđojuvvo eret 5. fástoáiggi  
sotnabeavvi rájes.

### Antifona

Hearrá, don válldahalat munnje eallima geainnu,  
du muoduid ovddas lea ilu dievasvuohta,  
agálaš ávvu du olgeš gieda bealde.

Sál 16: 11

## DAHJE

Bohtet, ávvudehkot Hearrá gudnin  
ja rávidehkot min bestojumi bávtti.

Sál 95: 1

## Biibbalsálbma

Hearrá lea mu báimman,  
ii mus váillo mihkkege.

Ruonas gittiide son livvuda mu,  
vuoigadusa čázi lusa son láide mu.

Son áhpásmahtá mu sielu.

Son doalvu mu vanhurskkisvuoda bálgáid mielde namas dihtii.

Vaikko mun vádjolivččen jápminsuoivana leagis,  
de in balaše mange bahás.

Dasgo don leat mu mielde.

Du soabbi ja báimmansoabbi jeddejit mu.

Don ráhkadat munnje beavddi  
mu vašálaččaid čalmmiid ovddas.

Don vuoiddat mu oaivvi oljjuin,  
mu juhkanlihti golgá badjel.

Aivvefal buorre vuolta ja árbmugas vuolta  
doarridit mu buot mu eallinbeivviid,  
ja mun beasan ássat Hearrá viesus guhkes áiggiid čada.

Sál 23

## DAHJE

Bohtet, ávvudehkot Hearrá gudnin  
ja rávidehkot min bestojumi bávtti.

Loaiddastehkot su muoduid ovdii giitosiin,  
rávidehkot su lávlumiin ja čuojahemiin!

Bohtet, gopmirdehkot ja rohkadallot,  
sodjalahttot čippiideamet Hearrá, min sivdnideaddji, muoduid  
ovddas.

Dasgo son lea min Ipmil,

mii leat su álbmot,  
dat eallu man son geahččá.

Sál 95: 1–2, 6–7

## DAHJE

Herrá, don suokkardat mu ja dovddat mu.  
Čohkkážanba vai čuččožan,  
de don diedát dan,  
don árvidat mu jurdagiid guhkkin juo.

Váccežanba vai veallážan, de don oainnát dan,  
don dovddat buot mu geainnuid.

Herrá, ovdal go mus lea sátni njuokčama alde,  
de don diedát dan ollásit.

Maŋábeale ja ovddabeale don birastahtát mu,  
don leat bidjan giedat mu ala.

Dat lea munnje menddo ovddolaš,  
dat lea ilá allat, mun in árvit dan.

Sál 139: 1–6

## Uhca gudni

Gudni Áhččái ja Bárdnái  
ja Bassi Vuignii,  
nugo lei álggus, dál lea ja álo  
agálašvuodas agálašvuhtii. Ámen.

Antifona geardduhuvvo.

## 6. Hearrá, árpmit (Kyrie)

---

### MOLSSAEAKTU A

#### Kyrie-litania

Kyrie-litania sáhtta lávlut dahje lohkat.

Eará kyrie-litaniat ja litania-nuohtat lpmilbálvalusaid girjjis.

- O** Rohkadallot Hearrá,  
guhte attii eallima,  
ahte son doarjjošii min fámuinis.  
[Rohkadallot Hearrá.]
- S** Hearrá, árpmit min. [Kristus, árpmit min. Hearrá, árpmit min.]
- O** Rohkadallot Hearrá,  
guhte vuolggahii Kristusa,  
ahte son gárvvohivččii min árpmuinis.  
[Rohkadallot Hearrá.]
- S** Hearrá, árpmit min. [Kristus, árpmit min. Hearrá, árpmit min.]
- O** Rohkadallot Hearrá,  
guhte golggahii Vuoiŋgas,  
ahte son attášii midjiide attáldagaidis.  
[Rohkadallot Hearrá.]
- S** Hearrá, árpmit min. [Kristus, árpmit min. Hearrá, árpmit min.]

### DAHJE

- O** Rohkadallot Hearrá,  
ahte son vuolggahivččii Vuoiŋgas odasmahttit min.  
[Rohkadallot Hearrá.]
- S** Hearrá, árpmit min. [Kristus, árpmit min. Hearrá, árpmit min.]
- O** Rohkadallot Hearrá,  
ahte son vuolggahivččii Vuoiŋgas nannet Kristusii gásttašuvvon  
olbmuid oktavuoda.  
[Rohkadallot Hearrá.]



**S** Hearrá, árpmit min. [Kristus, árpmit min. Hearrá, árpmit min.]

**O** Rohkadallot Hearrá,  
ahte son vuolggahivččii Vuoinŋas dahkat mis su duodašteaddjiid.  
[Rohkadallot Hearrá.]

**S** Hearrá, árpmit min. [Kristus, árpmit min. Hearrá, árpmit min.]

## MOLSSAEAKTU Á

Hearrá, árpmit

**S** Hearrá, árpmit min.  
Kristus, árpmit min.  
Hearrá, árpmit min.

## \*7. Gudni (Gloria) ja giittossálbma Bassi Golbmaoktavuhtii

Gudni ja giittossálbma Bassi Golbmaoktavuhtii gahččá eret fástoáigge (gutnagaskavahku rájes) ja adveantaáigge (vuossárgga rájes 1. adveantasotnabeaivvi maŋná ).

### Gudni

Nuohttaráidu 1

**O** Ip - mi - lii leh - kos gud - ni al - la - ga - sas.

### DAHJE

Nuohttaráidu 2

**O** Ip - mi - lii leh - kos gud - ni al - la - ga - sas.

**S** eatnama alde ráfi olbmuide, geaid Ipmil árpmiha.

### Giittossálbma

Giittossálbman sáhtá geavahit čuovvovaš Bassi Golbmaoktavuhtii oamastuvvon sálmmaid: 11: 2,3,5, 17: 4, 51, 71, 72, 136: 7, 236, 395, 396 ja 424.

## 8. Beaivvi rohkos

---

Sáhttá atnit maiddái girkojagi čuovvu beaivvi rohkosa.

Rohkosávžžuhusa ja searvegotti ámena lea vejolaš lávlut dahje lohkat. Ávžžuhusa manjá sáhttá leat oanehis jaskes rohkos.

Nuohttaráidu 1



### DAHJE

Nuohttaráidu 2



### 1. Ráhkis Ipmil, almmálaš Áhčči.

Don leat gásttas váldán min oapminat ja bearrašat lahttun.  
Ane mis álo fuola ja oro minguin,  
nu ahte mii roahkka dovddastit iežamet du máhttájeaddjin.  
Veahket min ráhkistit du ja guhtet guimmiideamet.  
Dán mii rohkadallat Hearrámet Jesusa Kristusa namas.

### 2. Ipmil, Áhččámet,

gásttašettiin min gállui ja raddái dahkkojuvvui ruossamearka,  
mii čájeha, ahte mii gullat dutnje.  
Ovttas dáid konfirmánttaiguin mii giitit du das.  
Jálosmahte min dáistaleames bahá válddi vuostái.  
Veahket min ahtanuššat oskkus  
ja ráhkistit guhtet guimmiideamet du dáhtu mielde.  
Gula min Bártnát Jesusa Kristusa,  
min Hearrámet dihtii.

### 3. Boade, Bassi Vuoigŋa.

Nuppástuhte balu doaivun,  
eahppeoskku ja eahpádusa luohttámuššan,

headjuvuoda fápmun.

Boade dohkoge, gos bahávuohta rádde.

Boade, ráfi ja ráhkisvuoda Vuoigna.

Boade ja buressivdnit min konfirmašuvnna,  
daga das ilu ja ráhkisvuoda ávvudeame.

Nuohttaráidu 1



**DAHJE**

Nuohttaráidu 2



## II Sátni

---

Sátneosi sáhtta doaimmahit maiddá meassu minstara mielde (meassu minstara čuoggát 9-15).

### 9. Čálabihtá

---

Lohkkojuvvo girkojagi čuovvu čálabihtá. Molssaeaktun sáhtta atnit čuovvovaš biibbaldeavsttaid: 1 Tim 6: 11-12, 2 Tim 3: 14-17.

Lohkki almmuha čálasaji. Searvegoddi guldala čohkut.

Čálabihtá dahje dan oasi lea vejolaš lávlut.

Vástádussániid lea vejolaš lohkat dahje lávlut (nuohat Ipmilbálvalusaid girjjis).

- čálabihtá

[O Dát lea Ipmila sátni.

S Ipmilii giittus.]

### 10. Beaivvi sálbma dahje graduála (Graduale)

---

## \*11. Evangelium

---

Evangelium almmuhuvvo ovdamearkka dihte ná: Čuožžilehkot guldalit bassi evangeliuma. Lohkkojuvvo girkojagi čuovvu evangelium. Molssaeaktun sáhtá atnit čuovvovaš biibaldeavsttaid: Matt. 4: 18–20, Mark. 8: 34–37.

Ovdal evangeliuma ja/dahje dan maŋŋá lea vejolaš lávlut halleluja. Halleluja–lávlagii, mii lea evangeliuma ovddabealde, sáhtá laktit hallelujagurgadasa. (gč. Evangeliumgirjji). Hallelujalávлага nuohat Ipmilbálvalusaid girjjis.

Halleluja gahččá eret fástoáigge gutnagaskavahku rájes. Dalle hallelujalávлага sajis lea vejolaš geavahit sálbmadajaldaga (gč. Evangeliumgirji).

Evangeliuma dahje dan oasi lea vejolaš lávlut.

Vástádussániid lea vejolaš lohkat dahje lávlut (nuohat Ipmilbálvalusaid girjjis).

- evangelium

[**L** Dát lea bassi evangelium.

**S** Rámádus dutnje, Kristus.]

## 12. Sárdni

---

Sárdni sáhtá sistsidoallat ávžžuhussániid konfirmánttaide, vanhemiidda ja risvánhe-  
miidda.

## III Konfirmašuvdna

---

Ovdal konfirmašuvdna sáhtá leat sálbma dahje eará musihkka.

## 13. Oskkudovddastus (Credo)

---

Konfirmánttat sirdásit áltára gurrii.

**L** Ráhkis nuorat. Din gástta olis din vanhemat ja risvánhemat celke oskkudovddastusa. Dat ovdanbukta, maid Ipmil addá midjiide ja maid son dahká min buorrin. Mii dovddastit dál ovttas searvegottiin kristtalaš oskomet:

### \* Oskkudovddastus

**S** Mun oskkun Ipmilii, Áhččái, Buotveagalažžii,  
almmi ja eatnama Sivdnideaddjái,

ja Jesusii Kristusii,  
Ipmila áidnoriegádan Bárdnái, min Hearrái,  
guhte sahkanii Bassi Vuoinḡas,  
riegáadii nieida Márjjás,  
gillái Pontius Pilatusa áigge,  
russiinávlejuvvui, jámii ja hávdáduvvui,  
manai vuolás jábmiid riikii,  
bajásčuožžilii jábmiid luhtte goalmmát beaivve,  
manai bajás albmái,  
čohkká Ipmila, buotveagalaš Áhči, olgeš gieda bealde,  
ja bohtá fas doppe dubmet calliid ja jábmiid,  
ja Bassi Vuignii,  
bassi oktasaš girku,  
bassi olbmuid searvivuoda,  
suttuid ándagassii addojumi,  
oačči bajásčuožžileame  
ja agálaš callima.

## 14. Gažaldat dahje ávžžuhus

---

### Gažaldat

**L** Ráhkis nuorat. Dii lehpēt gásttašuvvon dán oskui ja lehpēt oahpahuvvon dan mielde. Dáhttubehtetgo Ipmila árpmu vehkiin čájehit dán oskku din callimis?

Vástádus:

De dáhtun.

**L** Ipmil nannejekkos din lohpadusasteattet ja čatnos din Kristusii.

## Ávžžuhus

**L** Ráhkis nuorat. Dii lehpet gásttašuvvon dán oskui ja lehpet oahpahuvvon dan mielde. Ipmil addos didjiide árpmu, vai sáhtášeiddet čájehit dán oskku din eallimis. Son čatnos din Kristusii.

## 15. Buressivdnideapme

---

Konfirmánttat luoitádit čippiid ala áltárgurrii buressivdnideame várás. Buressivdnideapme dáhpáhuvvá gieđaid oaivvi ala bidjamiin. Buressivdnideames sáhttet leat fárus maiddái veahkit (omd. risvánhen).

Buressivdnideame áigge sáhttá lávlut omd. sálmma 40.

**L** Váldet vuostái buressivdnádusa.

[**L** NN (ovdanamma),]

Hearrámet Jesusa Kristusa árbmu ja Ipmila ráhkisvuohta ja Bassi Vuoigŋa oasálašvuohta lehkos duinna.

Go konfirmánta lea ožžon buressivdnádusa, son sáhttá cealkit ámena ja dahkat ruossamearkka.

Konfirmánttat máhccet sadjáseaset juogo buressivdnádusa, ávžžuhussániid (čuokkis 16) dahje sálmma (čuokkis 17) maŋŋá.

## 16. Ávžžuhussánit

---

Ávžžuhussánit sáhttet gullat sártnái, ja dalle dat báhcet dás eret.

### Ávžžuhussánit konfirmánttaide

**L** Ráhkis nuorat. Dii lehpet váldán vuostái golbmaoktalaš Ipmila buressivdnádusa. Dii oažžubehtet luohittit dasa, ahte Ipmil ii hilggo din. Bassi Vuoigŋa lea gásttas álggahan dis buori barggu, ja son roahkasmahttá din eallit Kristusaa čuovvun. Ipmil lea addán searvegoddásis bassi sánis, eahkedaččaid ja rohkosa oskku nannehussan. Dás duohko dii oažžubehtet oassálastit iehčanassii eahkedaččaide. Dii oažžubehtet maiddái rievtti doaibmat risvánhemín. Searvegoddi rohkadallá din ovddas ja vuolggaha din johtit eallima geainnu.

## Ávžžuhussánit vanhemiidda ja risvánhemiidda

**L** Buorit vanhemat, risvánhemat ja searvegotti eará lahtut. Dát nuorat dárbbášit olbmuid, guđet rohkadallet sin ovddas ja veahkehit sin rávásmuvvat kristtalažžan. Dorjot dii sin, nu ahte sii nanosmuvašedje oskkus ja jodášedje agálaš eallima geainnu. Ipmil din das veahkehehkos.

### 17. Sálbma

Sálmma sajis sáhtta geavahit nuoraid lávlaga.

### 18. Oktasaš ovddasrohkos

Oktasaš ovddasrohkosa sáhtta ráhkadit ovttas konfirmanttaiguin. Rohkosa lea vejolaš boatkut searvegotti rohkodajaldagain dahje –lávlagiin, dahje dan gaskkas sáhtta leat jaskes boddu.

Oktasaš ovddasrohkosat ja ovddasrohkosfáttát Ipmilbálvalusaid girjjis. Fástoáigge gutnagaskavahku rájes lea vejolaš geavahit litania (omd. sálbma 34 ) dahje Trishagion–rohkosa (gč. Ipmilbálvalusaid girji s. 83).

Rohkosávžžuhusa ja searvegotti ámena lea vejolaš lávlut dahje lohkat.

Ovddasrohkosa oktavuodas dahje dan ovdal almmuhuvvojit gásttašuvvon, gulahuvvon dahje náitalan ja jápmán olbmot. Almmuhusaid oktavuodas sáhtta leat musihkka ja/dahje symbolalaš doaimmat (omd. gintaliid cahkkeheapme). Almmuhusaide gullelaš rohkosat Ipmilbálvalusaid girjjis.

Nuohttaráidu 1



**L** Roh - ka - dal - lot.

#### DAHJE

Nuohttaráidu 2



**L** Roh - ka - dal - lot.

Ráhkis Ipmil, almmálaš Áhččámet. Mii giitit du das, ahte don leat gásttas váldán min mánnánat ja lohpidan orrut minguin buot beivviid máilmmi loahpa rádjai.

Mii rohkadallat dáid nuoraid ovddas, guđet leat odne konfirmerejuvvon. Veahket sin rávásmuvvat oskkus, dorvvastit sátnásat ja oažžut fámu searvegoteoktavuodas. Daga sin miedisin du ráhkisvuhtii ja veahket sin juogadit das earáide. Roahkasmahte sin maiddái váttisvuodaid siste dorvvastit dutnje. Doarjjo sin, go sii dahket välljejumiid eallimis.

Buessivdnit ja várjal searvegottát, dan bargiid, luohttámušolbmuid ja buot searvegotti lahtuid, nu ahte sáhka du ráhkisvuodas gullošii guhkás.

Buessivdnit oappáideamet ja vieljaideamet lahka ja guhkin. Atte máilmmi hoavddaide viisodaga, nu ahte álbmogat sáhtášedje čilget gaskavuodaideaset soadakeahtta.

Buessivdnit ja várjal buohkaid, geaid lea deaividan bárti, moraš dahje buohcuvuohta, ja sin, guđet ellet vártnuhis dilis. Atte sidjiide roahkkatvuoda ja eallinhálu ja atte sin dovdat, ahte don leat lahka ja anát sis fuola.

Buessivdnit ja várjal min ruovttuid, etniid ja áhčiid, oappáid ja vieljaid, áhkuid ja ádjáid, risvánhemiid ja eará ráhkkásiid. Muite maiddái oktoorruid ja atte olbmuid gaskii oktavuoda, ustitvuoda ja veahkehanhálu.

Buotveagalaš Ipmil. Giitu das, ahte mii oažžut guoddit eallimeamet du oskálii. Láide min viimmat agálaš riikasat.

#### Nuohttaráidu 1



#### DAHJE

#### Nuohttaráidu 2





## IV Eahkedaččat

---

### 19. Oaffarsálbma dahje offertorio (Offertorium)

---

Sálmma áigge čoggojuvvo kolleakta ja eahkedaččat lágiduvvojit áltárbeavdái. Ovdalaš sálmma almmuhuvvo, masa kolleakta čoggojuvvo. Sálmma sajis sáhtá leat goarralávlun dahje čuojanasmusihkka. Kolleavtta lea vejolaš buressivdnidit.

### 20. Eahkedašrohkos (Eukaristalaš rohkos)

---

#### Vuorrolávlla

Nuohttaráidu 1



**L** Hear - rá leh - kos din - guin.



**S** Nu son leh - kos maid-dái du vuoiŋ - ŋain.



**L** Ba - ji - deh-ket váim-mui - deat - tet.



**S** Ba - ji - dit dan Hear - rá guv - lui.




**L** Gii - ta - leh-kot Hear - rá, Ip - mi - lea - met.



**S** Nu lea duo-ðaid-ge vuoi-gat ja doh - ká - laš.

## DAHJE

### Nuohttaráidu 2



**L** Hear - rá leh - kos din - guin.




**S** Nu son leh-kos maid - dáí du vuoij - ñain.



**L** Ba - ji - deh - ket váim-mui - deat - tet.



**S** Ba - ji - dit dan Hear-rá guv - lui.



**L** Gii - ta - leh - kot Hear-rá, Ip - mi - lea - met.



**S** Nu lea duo - ðaid-ge doh-ká-laš ja vuoí - gat.

## Prefašuvdna

Prefašuvnna lea vejolaš lávlut dahje lohkat. Prefašuvnna nuohtta Ipmilbálvalusaid girjjis.

### Prefašuvnna álgu

**L** Duodaid lea riehta ja árvvolaš,  
ahte mii giitit du álo ja juohke sajis,  
bassi Hearrá, buotveagalaš Áhčči, agálaš Ipmil,  
Jesusa Kristusa, min Hearrá bokte.

### Prefašuvnna loahppa

Girkojagi áigemuttuid mielde molsašuddi prefašuvnnaid loahpat Ipmilbálvalusaid girjjis.

Gásttas don leat gohččon min mánnánat  
ja lohpidan orrut minguin buot beivviid.  
Mii giitit du dán almmálaš attáldagas  
ja lávlut dutnje rámadusa engeliiguin ja buot basiiguin:

## \* Bassi (Sanctus)

Searvegoddi sáhtta čuožžut Bassi–hymnna rájes Ipmila Láppis –hymnna rádjai.

**S** Bassi, bassi, bassi Hearrá Sebaot!

Albmi ja eana dievva lea du šearratvuodainat.

Hosianna allagasas!

Sivdniduvvon lehkos son, guhte boahtá Hearrá nammii.

Hosianna allagasas!

## Rohkos ja áсахansánit

Eará eahkedašrohkosat Ipmilbálvalusaid girjjis.

Almmálaš Áhčči, buot Sivdnideaddji,

mii muitit giitevažžan, maid don leat dahkan min ovddas:

Don sáddejít Bártnát beastit máilmmi.

Son šattai olmmožin, lei okta mis muhto sudduhaga.

Son devddii du dáhtu buot áššiin

ja miedai gillámuššii ja jápmimii

vai son lonistivččii min friddjan.

*Hearrámet Jesus Kristus, dan ija go son behttojuvvui,*

*válddii láibbi, buressivdnidii (+) ja doadjalii dan,*

*attii máhttájeaddjiidasas ja celkkii:*

*Váldet ja borret. Dát lea mu rumaš,*

*mii addojuvvo din ovddas.*

*Dahket dan mu muitun.*

*Nu son válddii maddái geara, giittii (+) ja celkkii:*

*Juhket dás buohkat.*

*Dát gearra lea odđa lihttu mu varas,*

*mii golggahuvvo din ovddas*

*suttuid ándagassii addojupmin.*

*Nu dávjá go dii das juhkabehtet,  
dahket dan mu muitun.*

Árpmolaš Áhčči,  
mii dáhttut deavdit dán gohččuma  
ja doallat bassi eahkedaččaid Bártnát muitun  
ja nu gulahit su jápmima dassáži, go son bohtá.

[**S** Mii gulahit su jápmima.

Mii duodaštit su bajásčuožžileame.

Mii vuordit su bohtima iežas gudniin.]

Mii rohkadallat du:

Sádde Bassi Vuoiŋnat,

vai mii luohittit lohpadussii suttuid ándagassiiaddojumis  
ja váldit oskkus vuostá Bártnát rupmaša ja vara min bestojupmin,  
dassáži go oktii beassat deaivvadit sinna du riikkas.

Su bokte, sinna ja sus  
gullá dutnje, buotveagalaš Áhčči  
Bassi Vuoiŋna oktavuodas  
gudni ja šearratvuohta álo ja agálaččat.

**S** Ámen.

## 21. Áhččámet (Pater noster)

---

Herrá rohkos celkojuvvo ovttá jitnii.

**S** Áhččámet, don guhte leat almmis.

Basuhuvvos du namma.

Bohtos du riika.

Šaddos du dáhttu,

mo almmis nu maiddái eatnama alde.

Atte midjiide odne min beaivválaš láibbi.

Ja atte midjiide min suttuid ándagassii,

nugo miige ándagassii addit velggolaččaidasamet.  
Alege doalvvo min geahččalussii,  
muhto beastte min bahás eret.  
Dasgo du lea riika ja fápmu ja gudni agálašvuhtii.  
Ámen.

## 22. Hearrá ráfi (Pax)


---

Vuorrolávlaga manjá lea vejolaš ávžžuhit ráfi sávaldahkii. Searvegotte olbmot buorástahttet nuppiideaset ja celket ovdamearkka dihte: Kristusa ráfi dahje Ipmila ráfi.

Nuohttaráidu 1




**L** Hear - rá rá - fi leh-kos din - guin.



**S** Nu son leh-kos maid-dái du vuoig - ñain.

### DAHJE

Nuohttaráidu 2



**L** Hear - rá rá - fi leh - kos din - guin.



**S** Nu son leh-kos maid - dái du vuoig - ñain.

## \*23. Ipmila Láppis (Agnus Dei)

---

Liturga sáhtta doadjit eahkedašláibbi Ipmila Láppis –hymna áigge.

**S** Ipmila Láppis don, guhte guottát máilmmi suttu,  
árpmi min, árpmi.

Ipmila Láppis don, guhte guottát máilmmi suttu,  
árpmi min, árpmi.

Ipmila Láppis don, guhte guottát máilmmi suttu,  
atte midjiide ráfi.

## 24. Eahkedaččaid juohkin

---

### Eahkedašbovdehus

**L** Bohtet, váldet vuostái Kristusa rupmaša.

Bohtet, juhket jápmemeahttunvuoda ádjagis.

### Eahkedaččat (Communio)

Eahkedaččaid juogadeame áigge sáhtá leat sálbmalávlun dahje eará musihkka.

Láibbi juogadettiin celkojuvvo:

[Min Hearrá Jesusa] Kristusa rumaš, du ovddas addojuvvon.

Rihppaguossi sáhtá vástidit: Ámen.

Viinni juogadettiin celkojuvvo:

[Min Hearrá Jesusa] Kristusa varra, du ovddas golggahuvvon.

Rihppaguossi sáhtá vástidit: Ámen.

### Loahpahansánit

Loahpahansániid maŋŋá eahkedašlihtit gokčojuvvojit [ja sirdojuvvojit veahkkebeavddi ala].  
Ovdal giittosrohkosa (čuokkis 25) sáhtá leat jaskes boddu.

**L** Mii leat vuostáiváldán Hearrá Jesusa Kristusa.

Várjalehkos son min agálaš eallimii.

**S** Ámen.

### DAHJE

**L** Min Hearrá Jesusa Kristusa rumaš ja varra  
vurkejhkos oppa min vuoiŋŋa, sielu ja rupmaša  
agálaš eallimii.

**S** Ámen.

## 25. Giittosrohkos

Rohkosávžžuhusa, rohkosa ja searvegotti ámena lea vejolaš lávlut dahje lohkat.

Giittosrohkosin lea vejolaš geavahit maiddái sálmma (omd. 61:1, 62, 63, 65:1–2 ja 409: 6–7).

Eará giittosrohkosat lpmilbálvalusaid girjjis.

Nuohttaráidu 1



**L** Roh - ka - dal - lot.

### DAHJE

Nuohttaráidu 2



**L** Roh - ka - dal - lot.

Mii giitit du, almmálaš Áhčči,  
eahkedaččaid attáldagas.

Giitu, ahte don ráhkistat min.

Veahket min callit du lahka ja lahka guhtet guoibmámet.

Gula min rohkosa

Bártnát Jesusa Kristusa dihtii.

Nuohttaráidu 1



**S** Á - men, á - men.

### DAHJE

Nuohttaráidu 2



**S** Á - men, á - men.

# V Loahpaheapme

---

## 26. Máidnun

---

Juos giittosrohkosin (čuokkis 25) lea lávlojuvvon sálbma, báhcá máidnun eret.

Máidnumin lea vejolaš geavahit maddái sálmma (omd. 77:4, 118:1–2, 306, 424:3–4 ja 467:7–10).

### Benedicamus

Nuohttaráidu 1



### DAHJE

Nuohttaráidu 1



**\*S** Ipmilii giittus. Halleluja!

Fástoáigge gutnagaskavahku rájes:

**\*S** Ipmilii giittus. Ámen.

## \*27. Buressivdnádus

---

**L** Hearrá buressivdnidivččii din ja várjalivččii din.

Hearrá čuvgešii muođuidis didjiide  
ja livččii didjiide árbmugas.

Hearrá jorgalivččii muođuidis din beallái  
ja attášii didjiide ráfi.

Áhči ja + Bártni ja Bassi Vuoiŋŋa nammii.

**S** Ámen.



## Vuolggapeapme

Ávžžuhus celkojuvvo aiddo ovdalaš vuolgima.

**L/O** Mannet ráfis ja bálvlehket Hearrá iluin.

### **DAHJE**

**L/O** Vulget ráfis.

Lehket roahkkadat,  
dollet gitta buoris,  
[allet vástit bahái baháin.  
Roahkasmahttet árggiid,  
veahkehehket sordojuvvon olbmuid,]  
gudnejahttet buot olbmuid.  
Ráhkistehket ja bálvlehket Hearrá  
illudemiin Bassi Vuoiŋŋa fámus.

## \*28. Loahpahanmusihkka

---

Loahpahanmusihkkan sáhtá leat sálbma, goarralávlla dahje čuojanasmusihkka.

Musihka áigge ruossamieduš máhccá boahinortnegis. Searvegoddi sáhtá searvat mihtošii.

# Konfirmašuvdnameassu Á

Konfirmašuvdnii sáhttet oassálastit dat girku lahtut, geain rihppaskuvlla vázzima vuodul lea dasa riekti. Konfirmašuvnnas dovddastuvvo girku osku ja fidnejuvvo riekti iehčanassii fitnat rihpain. Konfirmašuvnna doaimmaha báhppa dahje lektor. (GO 3: 5.)

Konfirmašuvdnameassu Á vuodđuduvvá vahkkomeassu minstarii. Konfirmašuvdnameassu gárvvistuvvo ovtta rihppaskuvlalaččaiguin.

Dát minsttar heivehuvvo, go konfirmánta lea ollesolmmoš.

Oassálastit bohtet girku ruossamihtosis. Njunnošis bohtet ruossaguoddi ja ginttalguoddit, dasto konfirmánttat, rihppaskuvllas vástideaddji olbmot sihke sierra bálvalanbargguin doaimmit, mañi-mužžan liturga.

## I Álggahus

---

### \*1. Álggahansálbma

---

Sálmma sajis lea vejolaš geavahit biibbalsálmma, goarralávлага dahje čuojanasmusihka. Álgomusihka áigge lea ruossamieduš.

### 2. Álgosivdnideapme

---

Buressivdnádusa ja vuorodearvvahusa lea vejolaš lávlut dahje lohkat.

#### Buressivdnádus

Nuohttaráidu 1



**L** Áh - či ja + Bárt - ni ja Bas-si Vuoiŋ-ŋa nam - mii.



**S** Á - men, á - men, á - men.

## Vuorodearvvahus

Nuohttaráidu 1



**L** Hear-rá leh-kos din - guin.




**S** Nu son leh-kos maid-dái du vuoij - ñain.

## DAHJE

## Buessivdnádus

Nuohttaráidu 2



**L** Áh - či ja + Bárt-ni ja Bas - si Vuoij-ña nam-mii.



**S** Á - men, á - men, á - men.

## Vuorodearvvahus

Nuohttaráidu 2



**L** Hear-rá leh-kos din-guin.



**S** Nu son leh-kos maid-dái du vuoij-ñain.

## 3. Álggahansánit

---

Báhppa ráhkada álggahansániid ieš dahje geavaha čuovvovačča.

**L** Ráhkis kristtalaččat. Mii ávvudit odne konfirmašuvdnameassu ovttas dáid nuoraiguin. Mii gullat Ipmila sáni, dovddastit oktasaš oskomet, rohkadallat ja giitit Ipmila. Mii bovdejuvvot maiddái Hearrá bassi eahkedaččaide.

Buorit nuorat. Álggu rájes Ipmila ráhkisvuohta lea leamaš dinguin eallimisttádet. Odne mii giitit gásttas, oktasaš rávásmuvvama jagiin ja rihppaskuvlaáiggis. Mii bivdit buressivdnádusa boahhteáigái ja rohka-dallat, ahte Ipmil nannešii din oskkus ja roahkasmahtášii din eallit kristtalažžan.

Kristus lea máilmmi čuovggas. Dát čuovga vuoitá suttu ja jápmima seavdnjatvuoda. Kristusa árbmui dorvvastemiin mii dovddastit dál ovttas suttuideamet.

## 4. Oktasaš rihpat

---

### Suttudovddastus

Suttudovddastusa sáhtá lohkat ovttá jitnii. Dan boddii sáhtá luoitádit čippiid ala. Suttudovddastusa lea vejolaš boatkut searvegotti rohkodajaldagain dahje –lávlagiin, dahje dan gaskkas sáhtá leat jaskes boddu. Suttudovddastusas sáhtá leat maiddái jaskes rohkos, masa lea vejolaš ávžžuhit ovdamearka dihte: Gula maiddái mu/min jaskes ándagassiiátuma.

Eará suttudovddastusat Ipmilbálvalusaid girjjis.

#### 1. Almmálaš Áhčči.

Mun lean gásttašuvvon du mánnán.

Don leat jodihan mu seavdnjadasas čuovgasii,  
beastán mu gáđohusas almmi árbbolažžan.

In leat almmatge eallán nugo du mánná galgá.

In leat guldalan du jiena inge jeagadan du dáhtu.

Ipmil, árpmi mu du Bártni Jesusa Kristusa dihtii.

Basa mu buhtisin ja atte buot mu suttuid ándagassii.

#### 2. Hearrá,

don leat čuovga, muhto mun in leat geahččan dutnje.

Don leat geaidnu, muhto mun in leat čuvvon du.

Don leat duohtavuohta, muhto mun in leat bisson dus.

Don leat eallin, muhto mun in leat dovddastan dan.

Don leat mu oahpisteaddji, muhto mun in leat jeagadan du.

Ja almmatge, Hearrá,

go mun dagan boastut ja bilidan ealliman,  
de mun lean lihkoheapme ja sivahalan du.  
Hearrá, atte munnje ándagassii.  
Dán mun ánun Jesusa Kristusa,  
mu Beasti dihtii.

## Suttubeastin

Suttubeastima ámena sáhtá lávlut dahje lohkat.

Eará suttubeastimat lpmilbálvalusaid girjjis.

### 1. Ná cealká Hearrá:

”Ale bala, dasgo mun lean du lonistan.  
Mun lean du nama mielde gohččon, don leat mu.  
Várit gáidoset ja duoddarat doarggistehkoset,  
muhto mu ráhkisvuohta dutnje ii rievdda  
iige mu ráfilihttu suoibbo.”

### 2. Jesus cealká:

”Ustiban, leage dorvvolaš mielain,  
du suttut leat dutnje ándagassii addojuvvon.”  
[Dán suttubeastima mun gulahan dutnje  
Áhči ja (+) Bártni ja Bassi Vuoiŋŋa nammii.]

**S** Ámen.

## 5. Sálbma

---

Sálmma sajis sáhtá leat eará musihkka dahje jaskes mediteren.

## 6. Beaivvi rohkos

---

Sáhtá atnit maidái girkojagi čuovvu beaivvi rohkosa.

Rohkosávžžuhusa ja searvegotti ámena lea vejolaš lávlut dahje lohkat. Ávžžuhusa maŋŋá sáhtá leat oanehis jaskes rohkos.


Nuohttaráidu 1



**L** Roh - ka - dal - lot.

## DAHJE

### Nuohttaráidu 2



#### 1. Ráhkis Ipmil, almmálaš Áhčči.

Don leat gásttas váldán min oapminat ja bearrašat lahttun.  
Ane mis álo fuola ja oro minguin,  
nu ahte mii roahkka dovddastit iežamet du máhttájeaddjin.  
Veahket min ráhkistit du ja guhtet guimmiideamet.  
Dán mii rohkadallat Hearrámet Jesusa Kristusa namas.

#### 2. Ipmil, Áhččámet,

gásttašettiin min gállui ja raddái dahkkojuvvui ruossamearka,  
mii čájeha, ahte mii gullat dutnje.  
Ovttas dáid konfirmánttaiguin mii giitit du das.  
Jálosmahte min dáistaleames bahá válddi vuostái.  
Veahket min ahtanuššat oskkus  
ja ráhkistit guhtet guimmiideamet du dáhtu mielde.  
Gula min Bártnát Jesusa Kristusa,  
min Hearrámet dihtii.

#### 3. Boade, Bassi Vuoigŋa.

Nuppástuhte balu doaivun,  
eahppeoskku ja eahpádusa luohttámuššan,  
headjuvuoda fápmun.  
Boade dohkoge, gos bahávuohta rádde.  
Boade, ráfi ja ráhkisvuoda Vuoigŋa.  
Boade ja buressivdnit min konfirmašuvnna,  
daga dás ilu ja ráhkisvuoda ávvudeame.

### Nuohttaráidu 1



## DAHJE

Nuohttaráidu 2



## II Sátni

---

### 7. Biibbalohkan ja sárdni

---

Lohkkojuvvo girkojagi čuovvu evangelium. Evangeliuma lassin sáhtá lohkat čálabihtá Boares dahje Ođđa testamenttas. Sáhtá atnit maiddá čuovvovaš biibbaldeavstaid: 1 Tim 6: 11–12, 2 Tim 3: 14–17, Matt 4: 18–20, Mark 8: 34–37.

Biibbalohkamii lea vejolaš laktit vástádusa (biibbalsálbma, sálbma, lávlla, čuojanas-mushkka dahje jaskes mediteren).

Sárdni sáhtá sisttisoallat ávžžuhussániid konfirmánttaide, vanhemiidda ja risvánhe-miidda.

## III Konfirmašuvdna

---

Ovdal konfirmašuvdna sáhtá leat sálbma dahje eará musihkka.

### 8. Oskudovddastus (Credo)

---

Konfirmánttat sirdásit áltára gurrii.

**L** Ráhkis nuorat. Din gástta olis din vanhemat ja risvánhemat celke oskudovddastusa. Dat ovdanbuktá, maid Ipmil addá midjiide ja maid son dahká min buorrin. Mii dovddastit dál ovttas searvegottiin kristtalaš oskomet:

#### \* Oskudovddastus

**S** Mun oskkun Ipmilii, Áhččái, Buotveagalažžii,  
almmi ja eatnama Sivdnideaddjái,  
ja Jesusii Kristusii,  
Ipmila áidnoriegádan Bárdnái, min Hearrái,

guhte sahkanii Bassi Vuoiŋnas,  
riegádii nieida Márjjás,  
gillái Pontius Pilatusa áigge,  
russiinávlejuvvui, jámii ja hávdáduvvui,  
manai vuolás jábmiid riikii,  
bajásčuožžilii jábmiid luhtte goalmát beaivve,  
manai bajás albmái,  
čohkká Ipmila, buotveagalaš Áhči, olgeš gieda bealde,  
ja bohtá fas doppe dubmet calliid ja jábmiid,  
ja Bassi Vuigŋii,  
bassi oktasaš girku,  
bassi olbmuid searvivuoda,  
suttuid ándagassii addojumi,  
oačči bajásčuožžileame  
ja agálaš callima.

## 9. Gažaldat dahje ávžžuhus

---

### Gažaldat

**L** Ráhkis nuorat. Dii lehpet gásttašuvvon dán oskui ja lehpet oahpahuvvon dan mielde. Dáhttubehtetgo Ipmila árpmu vehkiin čájehit dán oskku din callimis?

Vástáduš:

De dáhtun.

**L** Ipmil nannejehkos din lohpadusasteattet ja čatnos din Kristusii.

### Ávžžuhus

**L** Ráhkis nuorat. Dii lehpet gásttašuvvon dán oskui ja lehpet oahpahuvvon dan mielde. Ipmil addos didjiide árpmu, vai sáhtášeiddet čájehit dán oskku din callimis. Son čatnos din Kristusii.



## 10. Buressivdnideapme

---

Konfirmánttat luoitádit čippiid ala áltárgurrii buressivdnideame várás. Buressivdnideapme dáhpáhuvvá giedaid oaivvi ala bidjamiin. Buressivdnideames sáhttet leat fárus maiddái veahkit (omd. risvánhen)

Buressivdnideame áigge sáhtta lávlut sálmma 40.

**L** Váldet vuostái buressivdnádusa.

[**L** NN (ovdanamma),]

Hearrámet Jesusa Kristusa árbmu ja Ipmila ráhkisvuohta ja Bassi Vuoigŋa oasálašvuohta lehkos duinna.

Go konfirmántta lea ožžon buressivdnádusa, son sáhtta cealkit ámena ja dahkat ruossamearkka.

Konfirmánttat máhcet sadjáseaset juogo buressivdnideame, ávžžuhussániid (čuokkis 11) dahje nuoraid lávlaga (čuokkis 12) maŋŋá.

## 11. Ávžžuhussánit

---

Ávžžuhussánit sáhttet gullat sárdnái, ja dalle dat báhcet dás eret.

### Ávžžuhussánit konfirmánttaide

**L** Ráhkis nuorat. Dii lehpēt váldán vuostái golbmaoktalaš Ipmila buressivdnádusa. Dii oažžubehtet luohittit dasa, ahte Ipmil ii hilggo. Bassi Vuoigŋa lea gásttas álggahan dis buori barggu, ja son roahkasmahtta din eallit Kristusa čuovvun. Ipmil lea addán searvegoddásis bassi sánis, eahkedaččaid ja rohkosa oskku nannehussan. Dás duohko dii oažžubehtet oassálastit iehčanassii eahkedaččaide. Dii oažžubehtet maiddái rievtti doaibmat risvánhemín. Searvegoddi rohkadallá din ovddas ja vuolggaha din johtit eallima geainnu.

### Ávžžuhussánit vánhemiidda ja risvánhemiidda

**L** Buorit vánhemat, risvánhemat ja searvegotti cará lahtut. Dát nuorat dárbbášit olbmuid, gudet rohkadallet sin ovddas ja veahkehit sin rávámuvvat kristtalažžan. Dorjot dii sin, nu ahte sii nanosmuvašedje oskku ja jodášedje agálaš eallima geainnu. Ipmil din das veahkehehkos.

## 12. Sálbma

Sálmma sajis sáhtta geavahit nuoraid lávlaga.

## 13. Oktasaš ovddasrohkos

Oktasaš ovddasrohkosasa sáhtta ráhkadit ovtta konfirmanttaiguin. Rohkosa lea vejolaš boaktut searvegotti rohkodajaldagain dahje –lávlagiin, dahje dan gaskkas sáhtta leat jaskes boddu.

Oktasaš ovddasrohkosat ja ovddasrohkosfáttát Ipmilbálvalusaid girjjis. Fástoáigge (gutnagaskavahku rájes) lea vejolaš geavahit litanía (omd. sálbma 34 ) dahje Trishagion-rohkosa.


Rohkosávžžuhusa ja searvegotti ámena sáhtta lávlut dahje lohkat.

Nuohttaráidu 1



### DAHJE

Nuohttaráidu 2



Ráhkis Ipmil, almmálaš Áhččámet. Mii giitit du das, ahte don leat gásttas váldán min mánnánat ja lohpidan orrut minuin buot beivviid máilmmi loahpa rádjai.

Mii rohkadallat dáid nuoraid ovddas, guđet leat odne konfirmerejuvvon. Veahket sin rávásmuvvat oskkus, dorvvastit sátnásat ja oažžut fámu searvegotteoktavuodas. Daga sin miedisin du ráhkisvuhtii ja veahket sin juogadit das earáide. Roahkasmahte sin maiddái váttisvuodaid siste dorvvastit dutnje. Doarjjo sin, go sii dahket válllejumiid eallimis.

Buessivdnit ja várjal searvegottát, dan bargiid, luohttámušolbmuid ja buot searvegotti lahtuid, nu ahte sáhka du ráhkisvuodas gullošii guhkás.

Buressivdnit oappáideamet ja vieljaideamet lahka ja guhkkin. Atte máilmmi hoavddaide viisodaga, nu ahte álbmogat sáhtášedje čilget gaskavuodaidis soadakeahtta.

Buressivdnit ja várjal buohkaid, geaid lea deaividan bárti, moraš dahje buohcuvuohta, ja sin, gudet ellet vártnuhis dilis. Atte sidjiide roahkkatvuoda ja callinhálu ja atte sin dovdat, ahte don leat lahka ja anát sis fuola.

Buressivdnit ja várjal min ruovttuid, etniid ja áhčiid, oappáid ja vieljaid, áhkuid ja ádjáid, risvánhemiid ja eará ráhkkásiid. Muite maidái oktoorruid ja atte olbmuid gaskii oktavuoda, ustitvuoda ja veahkehánhálu.

Buotveagalaš Ipmil. Giitu das, ahte mii oažžut guoddit eallimeamet du oskálii. Láide min viimmat agálaš riikasat.

#### Nuohttaráidu 1



#### DAHJE

#### Nuohttaráidu 2



# IV Eahkedaččat

---

## 14. Oaffarsálbma dahje offertorio (Offertorium)

---

Sálmma áigge čoggojuvvo kolleakta ja eahkedaččat lágiduvvojit áltárbeavdái. Ovdalaš sálmma almmuhuvvo, masa kolleakta čoggojuvvo. Sálmma sajis sáhtá leat goarralávlun dahje čuojanasmusihkka. Kolleavtta lea vejolaš buressivdnidit.

## 15. Eahkedašrohkos (Eukaristalaš rohkos)

---

### Vuorrolávlla, Prefašuvdna ja \*Bassi (Sanctus)

Gč. konfirmašuvnna molssaeavttu A čuoggá 20 (Eahkedašrohkos).

Eará vejolaš Bassi-hymnat lpmilbálvalusaid girjjis.

### Rohkos ja ásahansánit

Eará eahkedašrohkosat lpmilbálvalusaid girjjis.

Almmálaš Áhčči, buot Sivdnideaddji,  
mii muitit giitevažžan, maid don leat dahkan min ovddas:  
Don sáddejit Bárnát beastit máilmmi.  
Son šattai olmmožin, lei okta mis muhto sudduhaga.  
Son devddii du dáhtu buot áššiin  
ja miedai gillámuššii ja jápmimii  
vai son lonistivččii min friddjan.

*Hearrámet Jesus Kristus, dan ija go son behttojuvvui,  
válddii láibbi, buressivdnidii (+) ja doadjalii dan,  
attii máhttájeaddjiidasas ja celkkii:  
Váldet ja borret. Dát lea mu rumaš,  
mii addojuvvo din ovddas.  
Dahket dan mu muitun.*

*Nu son válddii maddái geara, giittii (+) ja celkkii:  
Juhket dás buohkat.*

*Dát gearra lea ođđa lihttu mu varas,  
mii golggahuvvo din ovddas  
suttuid ándagassii addojupmin.  
Nu dávjá go dii das juhkabehtet,  
dahket dan mu muitun.*

Árpmolaš Áhčči,  
mii dáhttu deavdit dán gohččuma  
ja doallat bassi eahkedaččaid Bártnát muitun  
ja nu gulahit su jápmima dassáži, go son bohtá.

[**S** Mii gulahit su jápmima.  
Mii duodaštit su bajásčuožžileame.  
Mii vuordit su bohtima iežas gudniin.]

Mii rohkadallat du:  
Sádde Bassi Vuoiŋat,  
vai mii luohittit lohpadussii suttuid ándagassiiaddojumis  
ja váldit oskkus vuostá Bártnát rupmaša ja vara min bestojupmin,  
dassáži go mii oktii beassat deaivvadit suinna du riikkas.

Su bokte, suinna ja sus  
gullá dutnje, buotveagalaš Áhčči  
Bassi Vuoiŋa oktavuodas  
gudni ja šearratvuohta álo ja agálaččat.

**S** Ámen.

## 16. Áhččámet (Pater noster)

---

Herrá rohkos celkojuvvo ovttá jitnii.

**S** Áhččámet, don guhte leat almmis.  
Basuhuvvos du namma.  
Bohtos du riika.  
Šaddos du dáhttu,

mo almmis nu maiddái eatnama alde.  
Atte midjiide odne min beaivválaš láibbi.  
Ja atte midjiide min sudduid ándagassii,  
nugo miige ándagassii addit velggolaččaidasamet.  
Alege doalvvo min geahččalussii,  
muhto beastte min bahás eret.  
Dasgo du lea riika ja fápmu ja gudni agálašvuhtii.  
Ámen.

## 17. Hearrá ráfi (Pax)

---

Vuorrolávлага маһһа lea vejolaš ávžžuhit ráfi sávaldahkii. Searvegotte olbmot buorástahttet nuppiideaset ja celket ovdamearkka dihte: Kristusa ráfi dahje Ipmila ráfi.

**L** Hearrá ráfi lehkos dinguin.

**S** Nu son lehkos maiddái du vuoiŋŋain.

## \*18. Ipmila Láppis (Agnus Dei)

---

Gč. konfirmašuvdnameassu A, čuoggá 23 (Ipmila Láppis).

Ipmila Láppis –hymna lea vejolaš lávlut eahkedaččaid áigge.

**S** Ipmila Láppis don, guhte guottát máilmmi suddu,  
árpmit min, árpmit.

Ipmila Láppis don, guhte guottát máilmmi suddu,  
árpmit min, árpmit.

Ipmila Láppis don, guhte guottát máilmmi suddu,  
atte midjiide ráfi.

## 19. Eahkedaččaid juohkin

---

### Eahkedašbovdehus

**L** Ávdugasat sii geat leat bovdejuvvon Lábbá headjamállásiidda.  
Bohtet, buot lea juo válmmaštuvvon.

## DAHJE

**L** Jesus cealká: “Bohtet mu lusa,  
buohkat geat rahčabehtet ja guoddibehtet lossa nodiid,  
de attán didjiide vuoigŋadusa.”

## DAHJE

**L** Bohtet, váldet vuostái Kristusa rupmaša.  
Bohtet, juhket jápmemeahttunvuoda ádjagis.

## Eahkedaččat (Communio)

Eahkedaččaid juogadeame áigge sáhttá leat sálbmálavlun dahje eará musihkka.

Láibbi juogadettiin celkojuvvo:

[Min Hearrá Jesusa] Kristusa rumaš, du ovddas addojuvvon.

Rihppaguossi sáhttá vástidit: Ámen.

Viinni juogadettiin celkojuvvo:

[Min Hearrá Jesusa] Kristusa varra, du ovddas golggahuvvon.

Rihppaguossi sáhttá vástidit: Ámen.

## Loahpahansánit

Loahpahansániid maŋŋá eahkedašlihtit gokčojuvvojit [ja sirdojuvvojit veahkkebeavddi ala].  
Ovdal giittosrohkosa (čuokkis 25) sáhttá leat jaskes boddu.

**L** Mii leat vuostáiváldán Hearrá Jesusa Kristusa.  
Várjalehkos son min agálaš callimii.

**S** Ámen.

## DAHJE

**L** Min Hearrá Jesusa Kristusa rumaš ja varra  
vurkejehkos oppa min vuoigŋa, sielu ja rupmaša  
agálaš callimii.

**S** Ámen.

## 20. Giittosrohkos

Rohkosávžžuhusa, rohkosa ja searvegotti ámena lea vejolaš lávlut dahje lohkat. Rohkosa nuohat lpmilbálvalusaid girjjis.

Giittosrohkosin lea vejolaš geavahit maiddái sálmma (omd. 61: 1, 62, 63, 65: 1–2 ja 409: 6–7).

Eará giittosrohkosat lpmilbálvalusaid girjjis.

Nuohhtaráidu 1



**L** Roh - ka - dal - lot.

### DAHJE

Nuohhtaráidu 2



**L** Roh - ka - dal - lot.

Mii giitit du, almmálaš Áhčči,  
eahkedaččaid attáldagas.

Giitu, ahte don ráhkistat min.

Veahket min eallit du lahka ja lahka guoibmámet.

Gula min rohkosa

Bártnát Jesusa Kristusa dihtii.

Nuohhtaráidu 1



**S** Á - men, á - men.

### DAHJE

Nuohhtaráidu 2



**S** Á - men, á - men.



# V Loahpaheapme

---

## 21. Máidnun

---

Gč. konfirmašuvdnameassu A, čuoggá 26 (Máidnun).

Máidnumin lea vejolaš geavahit maiddái sálmma (omd. 77: 4, 118: 1–2, 306, 424: 3–4 ja 467: 7–10).

Juos giittosrohkosin (čuokkis 20) lea lávlojuvvon sálbma, báhcá máidnun eret.

## \*22. Buressivdnáduš

---

**L** Hearrá buressivdnidivččii din ja várjalivččii din.  
Hearrá čuvgešii muođuidis didjiide  
ja livččii didjiide árbmugas.  
Hearrá jorgalivččii muođuidis din beallái  
ja attášii didjiide ráfi.  
Áhči ja + Bártni ja Bassi Vuoiŋŋa nammii.

**S** Ámen.

## Vuolggahapme

Ávžžuhus celkojuvvo aiddo ovdalaš vuolgima.

**L/O** Mannet ráfis ja bálvlehket Hearrá iluin.

### **DAHJE**

**L/O** Vulget ráfis.

Lehket roahkkadat,

dollet gitta buoris,

[allet vástit bahái baháin.

Roahkasmahttet árggiid,

veahkehehket sordojuvvon olbmuid,]

gudnejahttet buot olbmuid.

Ráhkistehket ja bálvlehket Hearrá

illudemiin Bassi Vuoiŋŋa fámus.

## \*23. Loahpahanmusihkka

---

Loahpahanmusihkkan sáhtta leat sálbma, goarralávlla dahje čuojanasmusihkka.

Musihka áigge ruossamiedus máhccá boahthinortnegis. Searvegoddi sáhtta searvat mihtosii.

# GIRKU OKTAVUHTII VÁLDIN

15 jagi deavdán olmmoš, guhte lea rievttuid gásttašuvvon, váldojuvvo girku lahttun dainna lágiin, ahte son dárbbášlaš oahpahusa maŋŋá dovddasta girku oskku (GO 1:3). Juos olmmoš lea vázzán rihppaskuvlla, ii lahttun váldin gáibit eará oahpahusa. Minstara sáhtta heivehit maiddá dalle, go ovdal evangelalaš-luteralaš girkui gullan olmmoš váldojuvvo odđasis girku lahttun.

Guorahallama maŋŋá dán minstara sáhtta geavahit maiddá vuollái 15-jahkásaš árranuora váldimis girku oktavuhtii. Almmolaš rávvagat vuollái 15-jahkásačča váldimis girku lahttun leat máná gástta minstara oktavuodas.

Oahpahus ja giehtagirjji minstara čuovvu girku oktavuhtii váldin vástidit konfirmašuvvna (GO 1:3, čilg. 5).

Girku oktavuhtii váldin dáhpáhuvvá girkus, ruovttus dahje eará sajis dađe mielde mo sohppojuvvo báhpain.

Juos girkohearrá ii mieda girkui searvama guoski bivdagii, son galgá doalvut ášši girkoráđi dahje searvegotteráđi čoahkkimii čoavdima várás (GO 1:3).

## I Álggahus

---

### 1. Sálbma

---

Sálmma sajis sáhtta leat lávlla dahje čuojanasmusihkka.

### 2. Álgosivdnideapme

---

Buressivdnádusa ja vuorrodearvvahusa lea vejolaš lohkat dahje lávlut.

**Buressivdnádus**

**B** Áhči ja + Bártni ja Bassi Vuoiŋŋa nammii.

**S** Ámen.

## Vuorrodearvvahus

**B** Hearrá lehkos dinguin.

**S** Nu son lehkos maddái du vuoiŋnain.

### 3. Álggahansánit

---

Báhppa ráhkada álggahansániid ieš dahje geavaha čuovvovačča.

**B** NN, don dáhtut odne ovttas minguin dovddastit du oskku ja šaddat girkomet lahttun. Mii giitit Ipmila das, ahte son lea váldán du juo gásttas mánnánis. Son gohčču du eallit oskkus Jesusii ja ráhkistit lagamuččaidat su dáhtu mielde. Jesus cealká: ”Buohkat sii, geaid Ipmil munnje addá, bohtet mu lusa, ja su, guhte bohtá mu lusa, mun in áje eret.” (Joh 6: 37)

### 4. Biibbalsálbma

---

Sáhtta atnit maddái girkojagi čuovvu dahje eará biibbalsálmmaid.

Biibbalsálmma sáhtta lávlut dahje lohkat. Dasa laktojuvvo Uhca gudni. Uhca gudni guđđojuvvo eret 5. fástoáiggi sotnabeaivvi rájes.

Rámidehket Hearrá, oppa eanan.

Bálvalehket Hearrá ilus,

bohtet su muoduid ovdii ávuin!

Dovdet ahte Hearrá lea Ipmil!

Son lea sivdnidan min, ja mii leat su,

su olbmot ja su sávzzat maid son geahččá.

Mannet su poarttaid čada giittoslávlagiin,

mannet su ovdašiljuide máidnunlávlagiin.

Giitet su ja máidnot su nama.

Dasgo Hearrá lea buorre,

su árbmugasvuohta bistá agálaš áigái,

su oskkáldasvuohta sogas sohkkii.

Sál 100

## DAHJE

Mun bajidan čalmmiidan váriid guvlui:

Gos bohtá munnje veahkki?

Mu veahkki bohtá Hearrás,  
almmi ja eatnama sivdnideaddjis.

Ii son divtte du juolggi suoibut,  
du goziheaddji ii oadestuva.

Ii son oadestuva iige nohka,  
son lea Israela goziheaddji.

Hearrá lea du goziheaddji,

Hearrá lea du suoivvan du olgeš gieda bealde.

Beaivváš ii vahágahte du beaivet  
iige mánnu ihkku.

Hearrá várjala du buot bahás,  
son várjala du heakka.

Hearrá várjala du vuolgima ja du bohtima  
dálážis gitta agálaš áigái.

Sál 121

## DAHJE

Mun máinnun álo Hearrá,  
mu njálbmi rávida su čadat.

Mu siellu addá gudni Hearrái,  
vuollegaš olbmot gullet dan ja illudit.

Gudnejahttot Hearrá,  
rávidehkot ovttas su nama.

Mun ohcen Hearrá ja son vástidii munnje,  
son besttii mu eret buot balus.

Sii geat gehččet su guvlui, báitet ilus,  
eaige sin muodut goassege ruvsot heahpanemiin.

Sál 34: 2–6

## Uhca gudni

Gudni Áhččái ja Bárdnái

ja Bassi Vuoiŋŋii,

nugo lei álggus, dál lea ja álo

agálašvuodas agálašvuhtii. Ámen.

## 5. Rohkos

---

Ávžžuhusa maŋŋá sáhtá leat oanehis jaskes rohkos.

### **B** Rohkadallot.

#### 1. Beastámet Jesus Kristus.

Mii giitit du das,

ahte don leat gohččon NN du girku oktavuhtii.

Veahket su álo dorvvastit dutnje.

Divtte Bassi Vuoiŋŋat ássat sus,

nu ahte son rávásmuvašii mánnánat

ja beasašii oktii du lusa agálaš šearratvuhtii.

Gula min, don guhte Áhččiin ja Bassi Vuoiŋŋain

ealát ja ráddet álo ja agálaččat.

#### 2. Buotveagalaš Ipmil.

Geahča árbmugasat NN:i,

gean leat gohččon du girku oktavuhtii.

Nanne su Bassi Vuoiŋŋainat.

Divtte su bissut Jesusa Kristusa máhttájeaddjin

ja searvegottát lahttun.

Veahket su bálvalit du ja lagamuččaidis.

Dán mii rohkadallat Jesusa namas.

### **S** Ámen.

## II Sátni

---

### 6. Biiballohkan

---

Lohkkojuvvo okta čuovvovaš čálabihtáin. Sáhtta atnit maid girkojagi čuovvu dahje eará čálabihtáid.

Lohkki almmuha čálasaji.

Ef 2: 19–20

Dii ehpet leat šat amas olbmot ja vierrásat, muhto dii lehpet Ipmila olbmuid siidaguoimmit ja gullabehtet Ipmila dáluolbmuide. Dii lehpet huksejuvvon apoastaliid ja profehťaid vuodu ala, man čiehkageadgi lea Kristus Jesus ieš.

Tit 3: 4–5

Go min Ipmila ja beasti buorrevuohta ja ráhkisvuohta olbmuide almmustuvai, de son besttii min, ii min vanhurskkis daguid dihtii, muhto váibmoládisvuodas dihtii; son besttii min dainna lávgguin mas Bassi Vuoigna riegádahtta min oddasis ja odasmahtta min.

Luk 15: 20–24

De bárdni vulggii áhčis lusa. Go son lei ain guhkin, de áhččis áiccai su, ja sus njuorai váibmu. Son viegai bártnis ovddal, dollii su čeabeha birra ja cummistii su. Bárdni dajai: ”Áhčážan, mun lean suddudan Almmi vuostái ja du vuostái. In mun leat šat dohkálaš gohčoduvvot du bárdnin.” Muhto áhčči dajai bálvaledđjiide: ”Dopmet! Buktet čábbáseamos biktasiid ja gárvvohehket sutnje daid, addet sutnje suorbmasa gihtii ja gápmagiid juolgái. Ja vižžet buoiddes gálbbi ja njuvvet dan, vai mii beassat boradit ja illudit. Dasgo dát mu bárdni lei jápmán ja lea fas šaddan eallin; son lei láhpon ja lea fas gávdnon.” Ja sii ripme ávvudit ja illudit.

Joh 6: 37

Jesus cealká:

”Buohkat geaid Áhčči addá munnje, bohtet mu lusa, ja dat gii boahdá mu lusa, su in eisege áje eret.”

Joh 13: 34–35

Jesus cealká:

”Mun attán didjiide odda báhkkoma: Ráhkistehket guhtet guimmideattet. Nugo mun lean ráhkistan din, nu galgabehtet diige ráhkistit guhtet guimmideattet. Juos dis lea ráhkisvuohta guhtet guoibmáseattet, de buohkat dovdet ahte dii lehpit mu máhttájeaddjit.”

## 7. Sálbma

---

Sálmma sajis sáhtá leat lávlla dahje čuojanasmusihkka.

## 8. Sárdni

---

Báhppa doallá friddja sárdni dahje atná čuovvovaš sárdni. Sárdnis sáhtá váldit ovdan čuovvovaš fáttáid:

- olmmoš Ipmila mánnán, Kristusa soabahanbargu, Bassi Vuoigŋa attáldat
- oskkueallima dikšun
- oktavuoha searvegoddái

Mii leat čoahkkanan Ipmila ovdii, dasgo don, NN, dáhtut boahdit girkomet oktavuhtii. Mii illudit das. Mii hálidit sávvat dutnje buresboahtima, nugo bearašlahttu váldojuvvo vuostái buriin mielain ruoktot. Searvegoddi lea bearaš, mas earálágán olbmot ellet ovtas ja dorvvastit almmálaš Áhččáseaset. Juohkeovttas lea das iežas sadi ja bargu. Mii oahpahallat ovtas eallit Ipmila dáhtu mielde. Ipmil gohčču min oskut sutnje ja ráhkistit lagamuččaideamet. Das lea kristtalačča bovdejupmi.

Osku Kristusa soabahanbargui rahpá midjiide geainnu ándagassii-addojupmái ja odda álgui. Donge, NN, oaččut beaivválaččat šaddat oasálašžan Ipmila árpmus. Bassi Vuoigŋa lea du láidesteadjin. Son nanne du



bargguinat dán máilmmis. Rohkosis don oaččut bivdit Ipmilis veahki ja roahkasmahttima.

Ipmila bearaš čoahkkana ávvudit oktasaš ipmilbálvalussii. Buot searvegotti lahtut bovdejuvvojit girkui giitalit ja rohkadallat almmálaš Áhči. Eahkedaččain Jesus ieš bálvala min ja dikšu árpmuinis. Boade, NN, oheat dáin attáldagain fámu eallimasat. Nu kristtalaš osku guoddá du čada eallima almmálaš ruovttu rádjai.

### III Girku oktavuhtii váldin

---

Girku oktavuhtii ohcan olmmoš sáhtá bohtit áltára ovdii.

#### 9. Gažaldat

---

**B** Dáhtutgo don searvat girkomet oktavuhtii ja dovddastit oktasaš kristtalaš oskomet?

Vástáduš:

De dáhtun.

#### \*10. Oskkudovddastus

---

Oskkudovddastus lohkkovuvvo ovttá jithii.

**S** Mun oskkun Ipmilii, Áhččái, Buotveagalažžii,  
almmi ja eatnama Sivdnideaddjái,  
ja Jesusii Kristusii,  
Ipmila áidnoriegádan Bárdnái, min Hearrái,  
guhte sahkanii Bassi Vuoiŋŋas,  
riegádii nieida Márjjás,  
gillái Pontius Pilatusa áigge,  
russiinávlejuvvui, jámii ja hávdáduvvui,  
manai vuolás jábmiid riikii,  
bajásčuožžilii jábmiid luhtte goalmmát beaivve,

manai bajás albmái,  
čohkká Ipmila, buotveagalaš Áhči, olgeš gieda bealde,  
ja bohtá fas doppe dubmet ealliid ja jábmiid,  
ja Bassi Vuignii,  
bassi oktasaš girku,  
bassi olbmuid searvivuoda,  
suttuid ándagassii addojumi,  
oačči bajásčuožžileame  
ja agálaš callima.

## \*11. Buressivdnideapme

---

**B** Don leat čájehan hálu searvat girkomet oktavuhtii ja dovddastan du oskku.

Ipmila ja su searvegotti bálvleaddjin mun válddán du, NN, girkomet oktavuhtii Áhči ja + Bártni ja Bassi Vuoiŋŋa nammii.

**Girku lahttun váldojuvvon olmmoš**      Ámen.

Girku lahttun váldojuvvon olmmoš luoitáda čippiidis ala. Báhppa bidjá gieđas su oaivvi ala.

**B** Hearrámet Jesusa Kristusa árbmu ja Ipmila ráhkisvuohta ja Bassi Vuoiŋŋa oasálašvuohta lehkos duinna.

**S** Ámen.

## 12. Oktasaš ovddasrohkos

---

Sáhtta atnit maiddái iešráhkaduvvon rohkosa.

**B** Rohkadallot.

Buotveagalaš Ipmil, almmálaš Áhččámet. Mii rohkadallat NN ovddas, guhte lea bohtán girkomet lahttun. Roahkasmahte su ohcat fámu sánistat ja bassi eahkedaččain. Veahket su eallit kristtalažžan du dáhtu mielde. Láide su buot beivviid ja čájjet sutnje geainnu, gokko johtit. Buressivdnit NN ja su lagamuččaid. Divtte searvegotti leat midjiide

ruoktu, gos mii rávásmit ovttas. Ane min mánnánat ja doalvvo min oktii du lusa albmái. Dán mii bivdit Bártnát Jesusa Kristusa, min Hearrámet bokte.

**S** Ámen.

## 13. Áhččámet

---

Hearrá rohkos celkojuvvo ovttá jitnii.

**S** Áhččámet, don guhte leat almmis.

Basuhuvvos du namma.

Bohtos du riika.

Šaddos du dáhttu,

mo almmis nu maddái eatnama alde.

Atte midjiide odne min beaivválaš láibbi.

Ja atte midjiide min sudduid ándagassii,

nugo miige ándagassii addit velggolaččaidasamet.

Alege doalvvo min geahččalussii,

muhto beastte min bahás eret.

Dasgo du lea riika ja fápmu ja gudni agálašvuhtii.

Ámen.

## IV Loahpaheapme

---

### 14. Buressivdnáduš

---

**B** Hearrá buressivdnidivččii din ja várjalivččii din.

Hearrá čuvgešii muođuidis didjiide

ja livččii didjiide árbmugas.

Hearrá jorgalivččii muođuidis din beallái

ja attášii didjiide ráfi.

Áhči ja + Bártni ja Bassi Vuoiŋŋa nammii.

**S** Ámen.

## 15. Sálbma

---

Sálmma sajis sáhtta leat lávlla dahje čuojanasmusihkka.

NÁITALEAPME

# Náittoslihttui vihaheapme

Náittoslihttui vihaheame sáhtta doaimmahit dan manjá, go náittosbárra lea ožžon duodaštusa náittoslihtu eastagiid dutkamis.

Soai, geat áiguba girkus vihahuvvot, galgaba leat rihppaskuvlla vázzán girku lahtut. Juos nubbi guoimmis ii leat girku lahttu, soai sáhttiba vihahuvvot girkus, juos girkui gullameahttun guoibmi gullá mannu eará kristtalaš girkui dahje oskkoldatovttastupmái (GO 2: 18). Náitalit áigu dahje juo vihahuvvon báraid namat almmuhuvvojit searvegotti oktasaš ipmilbálvalusas, juos sii eai leat dan gieldán. Sin ovddas rohkadallo ipmilbálvalusa oktasaš ovddasrohkosis.

Vihaheame doaimmaha báhppa. Son galgá ságastit moarsiin ja irggiin das, mii náittoslihttu lea ja maid lpmila buressivdnideame bivdin dasa mearkkaša.

Musihka válljemis galgá váldit vuhtii doaimmahusa ipmilbálvaluslágan luonddu. Doaimmahusas galggašii leat anjke okta sálbma. Musihkas vástida kántor, ja das galgá ságastit suinna.

Vihaheapme doaimmahuvvo girkus, ruovttus dahje eará sajis dađe mielde go báhppa ja náittosbárra das sohpet (GO 2: 19).

Vihaheames galget leat mielde uhcimustá guokte duodašteaddji. Vihaheames moarsi čuožžu irggi gurot bealde.

## I Álggahus

---

### \*1. Álggahanmusihkka

---

Álggahanmusihkkan sáhtta leat čuojanasmusihkka ja/dahje sálbma.

### 2. Álgosivdnideapme

---

Buressivdnádusa ja vuorodearvvahusa lea vejolaš lohkat dahje lávlut.

#### Buressivdnádus

**B** Áhči ja + Bártni ja Bassi Vuoiŋŋa nammii.

**S** Ámen.

#### Vuorodearvvahus

**B** Hearrá lehkos dinguin.

**S** Nu son lehkos maddái du vuoiŋŋain.

### 3. Álggahansánit

---

Báhppa ráhkada álggahansániid ieš dahje geavaha čuovvovaš molssaeavttuid.

**B** Buorre náittosbárta, NN ja NN (ovdanamat). Doai leahppi bohtán náitalit Ipmila muođuid ovdii. Su sáni guldalemiin ja ovttas rohka-dallamiin mii bivdit dudnuide ja dudno náittoslihttui Ipmila buressivdnádusa. Biibbalis celkojuvvo: ”Ipmil sivdnidii olbmo govvanis, Ipmila govvan son su sivdnidii, olmmájin ja nisun son sivdnidii sudno. Ipmil buressivdnidii sudno”. (1 Mos 1: 27–28)

#### DAHJE

**B** Ráhkis ustibat. Mii leat dál Ipmila ovddas bivdimin NN:i ja NN:i (ovdanamat) su buressivdnádusa. Jesus cealká: ”Sivdnideame álggus Ipmil sivdnidii sudno olmmájin ja nisun. Dan dihtii olmmái guoddá áhčis ja eatnis, ja bissu áhkás luhtte, ja dat guovttis šaddaba oktan oažžin. De eaba leat šat guovttis, muhto okta. Maid Ipmil nappo lea ovttastahtán, dan ii olmmoš galgga earuhit”. (Mark 10: 6–9)

#### DAHJE

**B** Ráhkis ustibat, NN ja NN (ovdanamat). Biibbalis celkojuvvo, ahte Ipmil sivdnidii olbmo olmmájin ja nisun ja oaivvildii sudno goabbat guoim-miska guoibmin. Ipmila sáni guldalemiin ja ovttas rohkadallamiin mii bivdit dudno náittoslihttui su buressivdnádusa.

### 4. Biibbalsálbma

---

Sáhtta atnit maiddái girkojagi čuovvu dahje eará biibbalsálmmaid.

Biibbalsálmma sáhtta lohkat dahje lávlut. Dan álggus ja loahpas sáhtta leat antifona.

Biibbalsálbmii laktojuvvo Uhca gudni. Dan sajis sáhtta atnit čuovvovaš sálmmaid vearssaid: 5:4, 66:3, 136:7, 218:7, 336:8, 340:8, 341:10, 348:6, 379:6. Uhca gudni guđđojuvvo eret 5. fástoáiggi sotnabeaivvi rájes.

#### Antifona

Herrá lea midjiide sakka árbmugas,  
su oskkáldasvuohta bistá agálaš áigái.

Sál 117: 2

## DAHJE

Herrá lea mu báhtaranbáiki ja ladni,  
mu Ipmil geasa dorvvastan.

Sál 91: 2

## Biibbalsálbma

Dat guhte čohkká Alimusa suojis  
ja ássá Buotveagalačča suoivanis, dadjá ná:

”Herrá lea mu báhtaranbáiki ja ladni,  
mu Ipmil geasa dorvvastan.”

Soadjádolggiidisguin son gokčá du,  
su soajáid vuolde don gávnnat suoji.

Su oskkáldasvuohta lea galba ja suodjalus.

Du báhtaranbáiki lea Herrá,  
don leat dahkan Alimusa orrunsadjinat.

Sál 91: 1–2, 4, 9

## DAHJE

Mun bajidan čalmmiidan váriid guvlui:

Gos bohtá munnje veahkki?

Mu veahkki bohtá Herrás,  
almmi ja eatnama sivdnideaddjis.

Ii son divtte du juolggi suoibut,  
du goziheaddji ii oadestuva.

Ii son oadestuva iige nohka,  
son lea Israela goziheaddji.

Herrá lea du goziheaddji,

Herrá lea du suoivvan du olgeš gieda bealde.

Beaivváš ii vahágahte du beaivet  
iige mánnu ihkku.

Herrá várjala du buot bahás,  
son várjala du heakka.



Hearrá várjala du vuolgima ja du boahtima  
dálážis gitta agálaš áigái.

Sál 121

## DAHJE

Hearrá sátni lea álo luohtehahti,  
son lea oskkáldas buot daguinis.

Vuorddašemiin buohkat gehččet dutnje,  
ja don attát sidjiide borramuša rivttes áigái.

Don rabat giedat

ja gallehat buot heakkalaččaid buorrevuodastat.

Vanhurskkis lea Hearrá buot vadjolusastis  
ja oskkáldas buot daguinis.

Hearrá lea buohkaid lahka gudet čurvot su,  
gudet čurvot su duohtavuodas.

Son ollašuhttá ipmilbalolaččaid sávaldagaid,  
son gullá sin čuorvasa ja beastá sin.

Sál 145: 13, 15–19

All 8: 6–7

## Uhca gudni

Gudni Áhččái ja Bárdnái

ja Bassi Vuignii,

nugo lei álggus, dál lea ja álo

agálašvuodas agálašvuhtii. Ámen.

## Antifona gearduhuvvo.

## 5. Rohkos

---

Sáhtta geavahit maiddái moarsemeassu minstara rohkosiid (čuokkis 8).

Rohkosávžžuhusa ja searvegotti ámena lea vejolaš lohkat dahje lávlut. Ávžžuhusa manjá sáhtta leat oanehis jaskes rohkos.

**B** Rohkadallot.

1. Ipmil, almmálaš Áhčči.

Don sivdnidit olbmo olmmájin ja nisun  
ja addet sudnuide náittoslihtu attáldahkan ja fidnun.  
Buessivdnit NN ja NN, guđet odne náitaleaba.  
Giitu, ahte diktet sudno gávdnat goabbat guoimmiska.  
Buessivdnit dán ávvubottu, maid mii dál ávvudit.  
Divtte Kristusa orrut min guossin.  
Dán mii rohkadallat su namas.

2. Kristus, don ráhkisvuoda gáldu.

Don basuhit oktii Kana heajaid, go ledjet doppe guossin.  
Boade maiddái dáid heajaide guossin,  
go NN ja NN náitaleaba.  
Láide min buohkaid oktii stuorra heajaide almmis.  
Gula min buorre vuodat dihtii.

3. Ipmil, máilmmi sivdnideaddji.

Don attát náittoslihtus olbmá ja nissona  
guoibmin goabbat guoibmáseaskka.  
Mii giitit du das,  
ahte maiddái náittoslihttu speadjalastá  
du sivdnidan barggu buorre vuoda ja čábbodaga.  
Atte buressivdnádušat NN ja NN lihttui,  
vai soai sáhtášeigga das ollašuttit du addin barggu  
ja váldit giitevažžan vuostái eallima attáldagaid.  
Gula min don, guhte leat buot buorre vuoda gáldu.

4. Almmálaš Áhčči.

Ráhkisvuodastat don leat ásahan náittoslihtu  
ja gohččon guimmiid eallit sánát mielde.  
Veahket sudno ráhkistit goabbat guoimmiska,  
nu mo Kristus ráhkistii searvegottis.  
Veahket guimmiid atnit náittoslihtuska bassin  
ja čuovvut eallimistiska du dáhtu.  
Atte sudnuide návccaid bissut oskkáldassan goabbat guoibmáseaskka.

Gula min Bártnat Jesusa Kristusa,  
Hearrámet dihtii.

**S** Ámen.

## II Sátني

---

### 6. Biibbalohkan

---

Lohkkojuvvo okta dahje moadde čuovvovaš čálabihtáin. Sáhttá atnit maiddá girkojagi čuovvu dahje eará čálabihtáid.

Lohkki almmuha čálasaji.

Biibbalohkamii lea vejolaš laktit vástádusa (biibbalsálbma, sálbma, lávlla, čuojanas-musihkka dahje jaskes mediteren).

1 Mos 1: 27–28

Ipmil sivdnidii olbmo iežas govvan, Ipmila govvan son sivdnidii su, olmmajin ja nissonin son sivdnidii sudno. Ipmil buressivdnidii sudno ja celkkii suduide: ”Leahkki šattolaččat ja lassaneahkki, deavdi eatnama ja dahkki dan iežade vuolibužžan. Ráddejeahkki meara guliid ja almmi lottiid ja buot elliid mat lihkadit eatnama alde.”

1 Kor 13: 1, 4–8, 13

Vaikko vel sártnošinge olbmuid dahje engeliid gielaiguin, muhto mus ii livčče ráhkisvuohta, de livččen dušše čuoddji biellu dahje skilaid deaddji divga.

Vaikko mus vel livččiige profehtastallanattáldat ja dovddašin buot čie-gusvuodaid ja buot diedu, ja vaikko mus livččii buot osku nu ahte sáhtášin váriid sirdit, muhto ii livčče ráhkisvuohta, de mun in livčče mihkkege. Vaikko vel juogadivččen váivvážiidda buot mii mus leažžá, ja vaikko divttášin iežan boldojuvvot, muhto mus ii livčče ráhkisvuohta, de dat ii livčče munnje ávkin.

Ráhkisvuohta lea gierdavaš, ráhkisvuohta lea ládis, ii dat gádaš iige rábmo iige čeavlástala. Ii dat daga maidege dohkkekemeahttumiid iige

bivdde iežas ávkki, ii dat suhta iige vurke baháid. Ii dat illut vearri-  
vuodas, muhto baicca duohtavuodas. Dat gillá buot, osku buot, doaivu  
buot, gierdá buot. Ráhkisvuohta ii noga goassege.

De dat bissot, dát golmmas: Osku, doaivu ja ráhkisvuohta. Muhto buot  
stuorimus dain lea ráhkisvuohta.

Ef 4: 32–5: 2

Lehket buorit guhtet guimmiidasadet; lehket váibmoláddásat ja addet  
ándagassii guhtet guimmiidasadet nugo Ipmilge lea addán didjiide  
ándagassii Kristusis.

Atnet nappo Ipmila ovdagovvan, dii geat lehpet su ráhkis mánát.  
Vádjolehket ráhkisvuodas, nugo Kristusge lea ráhkistan min ja addán  
iežas min dihtii attáldahkan, njuovvanoaffarin mii lea Ipmila miela  
mielde.

Fil 4: 4–7

Illudehket álelassii Hearrás! Vel oktii cealkkán: Illudehket! Dovdoset  
buot olbmot ahte dii lehpet láddásat. Hearrá lea lahka! Allet ane  
morraša mastege! Buktet baicca buot dárbbuideattet ovdan Ipmilii  
rohkadallamiin ja ánodemiin giitevašvuodain! De Ipmila ráfi, mii  
manná buot jierpmi badjel, várjala din váimmuid ja jurdagiid Kristus  
Jesusis.

Kol 3: 12–14

Go dii lehpet Ipmila välljejuvvon, bassi ja ráhkistuvvon olbmot, de  
gárvodehket dan dihtii njuoras árkkálmastinvuodain, buorrevuodain,  
ustitlašvuodain, vuollegašvuodain ja gierdavašvuodain, nu ahte dii  
gierdabehtet guhtet guimmiideattet ja addibehtet ándagassii guhtet  
guoibmáseattet, juos nuppis leš váidámuš nuppi vuostái. Nugo Hearrá  
lea addán ándagassii didjiide, nu galgabehtet diige addit ándagassii  
guhtet guoibmáseattet. Muhto ovddimustá, gárvodehket ráhkisvuodain  
mii lea ollisvuoda báddi.

Nu lea Ipmila ráhkisvuohta almmustuvvan min gaskii ahte son vuolggahii áidnoriegádan Bártnis máilbmái vai mii ealášcimmamet su bokte. Ráhkásiiddán, juos Ipmil lea ráhkistan min nu, de miige leat geatnegasat ráhkistit guhtet guimmiideamet. Ii oktage leat goassege oaidnán Ipmila, muhto juos mii ráhkistit guhtet guimmiideamet, de Ipmil bissu min siste, ja su ráhkisvuohta ollašuvvá min siste.

Matt 19: 4–6

Jesus cealká:

”Ehpetgo leat lohkan ahte Sivdnideaddji álggus sivdnidii sudno olmmájin ja nisun ja celkkii: Dan dihtii olmmái guoddá áhčis ja eatnis ja bissu áhkás luhtte, ja dat guovttis šaddaba oktan oažžin. De eaba leat šat guovttis, muhto okta. Maid Ipmil nappo lea ovttastahtán, dan ii olmmoš galgga earuhit.”

Joh 2: 1–11

Goalmmát beaivvi ledje náittosheajat Kanas Galileas. Jesusa eadni lei doppe, ja maiddái Jesus máhttájeddjiidiguin lei bovdejuvvon heajaide. De nohkkogohte viinnis, ja Jesusa eadni dajai sutnje: “Sis ii leat šat viidni.” Jesus celkkii: ”Nisu, maid don áiggut muinna? Ii mu diibmu leat velá boahtán.” Muhto su eadni dajai bálvaleddjiide: ”Dahket buot maid son gohčču.”

Das ledje geadgečáhcelihtit, nugo vierru leige juvddálaččaid buhtistanmearrádusaid mielde. Ledje guhtta lihti, mat gesse guokte dahje golbma ánkara guhtege. Jesus celkkii: ”Devdet lihtiid čáziin.” Ja bálvaleddjít devde daid ravddaid dási. Son celkkii sidjiide: ”Goivot das ja guddet heajaid ovddasčužžui.” Sii gudde dan heajaid ovddasčužžui, ja son máisttii čázi mii lei šaddan viidnin. Ii son diehtán gos dat leažžá boahtán, muhto bálvaleddjít geat ledje goivon čázi, sii gal dihte. De son gohčui irggi boahit ja dajai: ”Earát guossohit vuos buori viinni, ja go guossit juhkaluvvagohtet, de buktet fuonibu. Muhto don leat seastán buori viinni dássáži.”

Dán vuosttaš mearkadagus Jesus dagai Kanas Galileas. Son almmustahtii hearvásvuodas, ja su máhttájeaddjit osko sutnje.

Joh 15: 9–12

Jesus cealká:

”Nugo Áhčči lea ráhkistan mu, nu lean munge ráhkistan din. Bissot mu ráhkisvuodas! Juos doallabehtet mu báhkkomiid, de bissubehtet mu ráhkisvuodas, nugo munge lean doallan Áhččán báhkkomiid ja bisun su ráhkisvuodas.

Dán lean sárdnon didjiide, vai mu illu bisošii din siste, ja din illu šattašii ollisin. Dát lea mu báhkkon: Ráhkistehket guhtet guimmideattet nugo mun lean ráhkistan din.”

## 7. Sárdni

---

Báhppa doallá friddja sárdni dahje geavaha goappánu čuovvovaš molssaeavttuin. Sárdnis sáhtá váldit ovdan čuovvovaš fáttáid:

- náittoslihttu Ipmila attáldahkan ja ortnegin
- náittoslihttu beallalaččaid ahtanuššama báikin
- bearaš servodaga vuodđun
- illu ja giitevašvuohta
- ráhkisvuohta ja oskkáldasvuohta
- dovdu ja dáhttu
- ándagassiiátnun ja -addin
- fulkkiid ja ustibiid doarjja

Buorre náittosbárta, NN ja NN (ovdanamat), buorit searvegotti olbmot / buorit headjaguossit. Ipmil ieš lea ásahan náittoslihtu juo máilmmi sivdnidettiin. Hearrámet Jesus Kristus lea deattuhan dan mearkkašumi cealkkedettiin: ”Maid Ipmil lea ovttastahtán, dan ii olmmoš galgga earuhit.” Adni dan dihtii fuola lihtusteatte. Go ná dahkabeahhti, dat sáhtá buktit dudno eallimii lihku ja buressivdnádusa. Leahkki vuollegaččat ja gudnejahtti goabbat guoimmáde, vai dudno gaskasaš oktavuoha bisošii náittoslihtus.

Dikti Kristusa boahit dudno ruktui. Lehkos Ipmila sárdni čuovggasin dudno oktasaš bálgá alde. Dalle su Vuoigŋa sáhtá váikkohit váimmus-

teatte, nu ahte dudno ráhkisvuolta nanosmuvva ja čiekŋu. Muiti rohkosa vejolašvuoda. Rámideahkki buriid beivviid Ipmila buorrevuoda ja dorvasteahkki bahás beivviid su veahkkái.

Apoasttal ávžžuha kristtalaččaid guoddit guhtet guoimmiset nodiid. Juoga-deahkki nappo iluid ja morrašiid, maid doai eallimis vásiheahppi, ádnu ándagassii ja leahkki gárvásat maid addit ándagassii goabbat guoibmáseatte. Bálvaleahkki goabbat guoimmáde daid attáldagaiguin, maid doai leahppi Ipmilis ožžon. Oskkáldasvuolta, ráhkisvuolta ja osku Ipmilii dahket dudno lihttui nana vuodu. Dalle doai oažžubeahtti vásihit dan buressivdnádusa, man Ipmil lea náittosguimmiide lohpidan.

[Fuolkkit ja ustibat! Dii lehpet dál illudeamen NN:in ja NN:in (ovdanamat) ja miedušteamen sudno mátkái lihkusávaldagaiguin ja buressivdnádu-saiguin. Dorjot sudno maiddái eallima árgan. Muitet sudno rohkosiinnádet. ]

## **DAHJE**

Ráhkis ustibat. NN ja NN (ovdanamat). Odne lea dudno eallima stuorra ávvubeaivi. Ipmil lea diktán dudno gávdnat goabbat guoimmáde. Dál doai čatnaseahppi eallit ovttas ja ráhkistit ja gudnejahttit goabbat guoimmáde. Mii illudit dudnuin ja rohkadallat dudno lihttui Ipmila buressivdnádusa.

Ráhkisvuolta lea dovdduin buot fámolamos. Muhto dat ii leat almmatge dušše dovdu. Duohta ráhkisvuolta gohčču dudno atnit fuola goabbat guoimmisteatte árgaeallimis. Ráhkisvuolta sáhtá lassánit, dan buorin sáhtá doaibmat ja dan galgá dikšut.

Ipmil lea ráhkisvuoda gáldu. Son lea ásahan náittoslihtu sivdnidettiin olbmo olmmájin ja nisun. Aiddofal dan lihtus ollašuvvet illu ja lihkku buoremus lági mielde. Velá ainge son diktá min vásihit buorrevuoda ja ráhkisvuoda. Buoremusge náittoslihtus bohtet ovdan váttisvuodat. Olbmuid gaskasaš váttisvuodaid galgá geahččalit čoavdit. Sagastalli maiddái váttis áššiin ja guldaleahkki goabbat guoimmáde. Jesus ieš dohkkehii ustibinis čádjidan ja váilevaš olbmuid. Ná son attii midjiide ovdagova. Ándagassii átnun ja ándagassii addin lea Ipmila attáldat.

[Ruovttu]searvegoddi addá dudnuide dán ávvubeaivve Biibbala. Doppe leat valjis bagadeamet ja rávvagat oktasaš eallima várás. Muhto buot buoremus Biibbalis leat almmatge Ipmila lohpadusat. Son lea lohpidan orrut omiidisguin maiddái árgabeai eallimis.

## III Vihaheapme

---

Searvegoddi sáhtta čuožžut čuoggáid 8–11 buohta.

### 8. Gažaldagat

---

Báhppa jearrá irggis:

Ipmila muođuid ovddas ja dán searvegotti (dáid duodašteaddjiid) ovddas mun jearan dus, NN (oppa namma), dáhtutgo don váldit NN (oppa namma) náittosguoibminat ja leat sutnje oskkáldas ja ráhkistit su buorre ja bahás beivviid, gitta jápmima rádjai?

Vástáduš:

De dáhtun.

Báhppa jearrá moarsis:

Ipmila muođuid ovddas ja dán searvegotti (dáid duodašteaddjiid) ovddas mun jearan dus, NN (oppa namma), dáhtutgo don váldit NN (oppa namma) náittosguoibminat ja leat sutnje oskkáldas ja ráhkistit su buorre ja bahás beivviid, gitta jápmima rádjai?

Vástáduš:

De dáhtun.

#### **DAHJE**

Báhppa jearrá irggis:

Buotdiehti Ipmila muođuid ovddas ja dán searvegotti (dáid duodašteaddjiid) ovddas mun jearan dus, NN (oppa namma), dáhtutgo don váldit NN (oppa namma) náittosguoibminat ja čájehit sutnje oskkáldasvuoda ja ráhkisvuoda miehte- ja vuostegiedageavadiin?



Vástáduš:

De dáhtun.

Báhppá jearrá moarsis:

Buotdiehtti Ipmila muoduid ovddas ja dán searvegotti (dáid duodaš-teaddjiid) ovddas mun jearan dus, NN (oppa namma), dáhtutgo don váldit NN (oppa namma) náittosguoibminat ja čájehit sutnje oskkáldasvuoda ja ráhkisvuoda miehte- ja vuostegiedageavadiin?

Vástáduš:

De dáhtun.

## 9. Suorpmasrohkos

---

Irgi geige báhppii suorbmasa (irggiguovttos moarsiin geigeba báhppii suorbmasa).

Guoimmiguovttos sáhttiba luoitádit čippiid ala.

Báhppa bajida suorbmasa (suorbmasiid) ja cealká:

Rohkadallot dan lihtu ovddas, man mearkan dát suorpmas lea (dát suorbmasat leat).

Buotveagalaš Ipmil.

Don ieš leat ráhkisvuoha ja buressivdnidat sin, gudet dorvvastit dutnje.

Váldde suodjásat dán lihtu,

man mearkan dát suorpmas lea (dát suorbmasat leat).

Veahket NN ja NN (ovdanamat) eallit náittoslihtus du bassi dáhtu mielde,

bissut goabbat guoibmáseaskka oskkáldassan

ja bálvalit goabbat guoimmiska giitevaš mielain.

Dán mii rohkadallat Hearrámet Jesusa Kristusa dihtii.

**S** Ámen.

Báhppa geige suorbmasa irgái, guhte bidjá dan moarsi gurot gieđa orbbežii. Juos geavahuvvojit guokte suorbmasa, báhppa addá guoimmiguoktái suorbmasiid, ja soai bidjaba daid goabbat guoimmiska gurot gieđa orbbežii.

## 10. Suorpmaslohpádusat

---

Juos guoimmiguovttos sávva, doaimmahus sáhtá ovdal suorbmasa (suorbmasiid) bidjama orbbežii joatkašuvvat dainna lágiin, ahte irgi doallá moarsiin suorbmasa (suorbmasiid) ja cealká:

Mun, NN,

válddán du, NN,

dál náittosguoibminan

ja dáhtun ráhkistit du buorre ja bahás beivviid [eallima loahpa rádjái].

Mearkan das mun attán dutnje dán suorbmasa.

Moarsi cealká:

Mun, NN,

válddán du, NN,

dál náittosguoibminan

ja dáhtun ráhkistit du buorre ja bahás beivviid [eallima loahpa rádjái].

Mearkan das mun válddán dus (attán dutnje) dán suorbmasa.

### **DAHJE**

Irgi cealká:

Mun ráhkistan du, NN.

Háliidan juogadit duinna iluid ja morrašiid

ja leat dutnje oskkáldas, dassáži go jápmin munno earuha.

Moarsi cealká:

Mun ráhkistan du, NN.

Háliidan juogadit duinna iluid ja morrašiid

ja leat dutnje oskkáldas, dassáži go jápmin munno earuha.

## 11. Náittoslihtu nannen ja náittosguimmiid buressivdnideapme

---

### Náittoslihtu nannen

**B** Doai leahppi dál váldán goabbat guoimmáde náittosguoibmin ja dovddastan dan almmolaččat Ipmila muoduid ovddas ja dán searvegotti oaidnut. Vihahansuorpmas lea addojuvvon mearkan dudno náittoslihtus. Ipmila ja su searvegotti bálvleaddjin mun nannen dudno lihtu ja cealkkán dál dudno náittosguoibmin.

### Náittosguimmiid buressivdnideapme

Náittosbárra sáhtá luoitádit čippiid ala.

**B** [Ipmil, almmálaš Áhčči,  
addos dudnuide ilus ja buressivdnádusas.  
Ipmila áidna Bárdni  
lehtkos buorrevuodastis dudnuin nu ilu go morraša beivviid.  
Ipmil, Bassi Vuoigŋa,  
orros dudnos ja golggahehtkos álelassii ráhkisvuodas dudno váibmui].  
Buessivdnidehtkos dudno buotveagalaš ja árbmugas Ipmil,  
Áhčči ja (+) Bárdni ja Bassi Vuoigŋa.

### DAHJE

**B** [Ipmila Vuoigŋa láidehehtkos dudno,  
Ipmila fápmu várjalehtkos dudno,  
Ipmila viisodat oahpahehtkos dudno,  
Ipmila giehta suodjalehtkos dudno,  
Ipmila geaidnu čájehehtkos, gosa johtit].  
Buessivdnidehtkos dudno buotveagalaš ja árbmugas Ipmil,  
Áhčči ja (+) Bárdni ja Bassi Vuoigŋa.

### DAHJE

**B** Hearrámet Jesusa Kristusa árbmu ja Ipmila ráhkisvuohta ja Bassi Vuoigŋa oasálašvuohta lehtkos dudnuin.

**S** Ámen.

## 12. Sálbma

---

Sálmma sajis sáhhtá leat eará heivvolaš musihkka.

## 13. Oktasaš ovddasrohkos

---

Sáhhtá geavahit maiddá moarsemeassu minstara rohkosiid (čuokkis 19). Ávvuveahka sáhhtá ovttas ráhkadit ja ollášuhttit rohkosa.

**B/O** Rohkadallot.

1. Ipmil, ráhkis almmálaš Áhčči. Mii rohkadallat buressivdnádusa NN:i ja NN:i, gudet leaba náitalan du muoduid ovddas. Buressivdnit sudno ruovttu. Nanusmahte sudno gaskasaš ráhkisvuoda. Veahket sudno guoddit ovddasvástádusa ja atte sudnuide oskkáldasvuoda. Veahket sudno vuoitit geahččalusaid. Várjal sudno rupmaša ja sielu. Láide sudno oppa eallima áigge ja veahket sudno eallima váttis beivviid. Gievrut sudnos oskku ja doaivvu. Doalvvo sudno oktii agálaš ruktui, šearratvuhtii. Gula min rohkosa Hearrámet Jesusa namas.
2. Buotveagalaš Ipmil. Juos don it hukse viesu, de snihkkárat barget dušši barggu. Čana dáid náittosguimmiid goabbat guoibmáseaskka ráhkisvuodain ja basut sudno náittoslihtu du nama gudnin. Veahket sudno ráhkadit ruovttu, gos osku, doaivu ja ráhkisvuohta rádđejit. Atte sudnuide Bassi Vuoiŋnat, nu ahte soai du buressivdnádusain ealášeigga ráfis. Veahket sudno gilvalit oskkus ja doalvvo sudno oktii almmi ruktui. Gula min Jesusa Kristusa, min Hearrámet dihtii.
3. Buotveagalaš, árbmugas Ipmil, mii giitit du ráhkisvuoda attáldagas. Buressivdnit NN ja NN, gudet leaba náitalan du muoduid ovddas. Mii giitit du das, ahte soai ráhkisteaba, luohttiba ja dáhttuba atnit fuola goabbat guoimmisteaskka oppa eallima áigge. Movttiidahte sudno šaddat oktii ain čavgadabbot, amas mihkkige sudno earuhit. Veahket sudno buot eallima beivviid bisuhit ráhkisvuoda ja oskkáldasvuoda. Divtte sudno ahtanussat almmá buohcuvuoda ja bárttiid, almmá makkárga váraid, mat sáhtásedje vahágahttit sudno. Juos miinu geahččalusaid deaivida sudno, divtte dan lagadit sudno goabbat guimmii-

neaskka ja duinna. Dán mii rohkadallat Hearrámet Jesusa Kristusa bokte.

4. Bassi Ipmil, almmálaš Áhčči. Juo álggu rájis don leat buressivdnidan luondduriikkat valljugas skeaŋkkaiguin. Atte buressivdnádušat dál NN:i ja NN:i, nu ahte soai čatnasivččiiga goabbat guoibmáseaskka sudno gaskasaš ráhkisvuodas ja guoibmevuodas. Veahket sudno atnit náittoslihtuska bassin ja čatnasit das goabbat guoibmáseaskka. Mii rohkadallat dán Bártnát Jesusa Kristusa, Hearrámet dihtii, guhte eallá ja rádde duinna ja Bassi Vuoiŋŋain áli ja agálaččat.

5.

**B/O** Ipmil, almmálaš Áhčči. Don leat ásahan náittoslihtu. Don basuhat ruovttuideamet Vuoiŋŋainat. Mii rohkadallat du: čana dáid náittosguimmiid goabbat guoibmáseaskka ráhkisvuodain ja buressivdnit sudno náittoslihtu namat gudnin. Mii rohkadallat du.

Áhčči dahje eadni

Don addet midjiide oktii min mánáid. Mii giitit dan ilus, maid soai leaba buktán min eallimii. Buressivdnit sudno, go soai vuoddudeaba iežaska ruovttu ja bearraša. Várjal sudno buot bahás. Atte sudnuide soabalaš miela ja oahpat sudno átnut ja addit ándagassii. Mii rohkadallat du.

Giinu oappáin dahje vieljain

Odne mii giitit du mánnávuoda ruovttusteamet. Oro NN:in ja NN:in ja várjal sudno dan mátkkis, masa soai leaba dál ráhkkaneamen. Veahket min bissut lagažin guhtet guimmiineamet. Mii rohkadallat du.

Giinu risvánhemiin

Gásttas don lohpidit buressivdnádušat mu rismánnái. Buressivdnit ainge su ja sutnje ráhkis olbmo. Veahket sudno muitit, ahte gástta árbmui oažžu máhccat ain oddasis. Mii rohkadallat du.

Giinu ustibiin

Don leat jodihan NN ja NN oktii. Buressivdnit sudno ráhkisvuoda. Veahket sudno bissut ovttas eallima loahpa rádjai. Atte midjiide ilu min ustitvuodas maiddái boahtte áigge. Mii rohkadallat du.

**B/O** Almmálaš Áhčči. Giitu, ahte don gulat min rohkosiid. Mii guoddit dán náittosbárra ja iežamet du háldui. Doalvvo min oktii almmi ruktui. Gula min Bártnát Jesusa Kristusa, min Hearrámet bokte.

**S** Ámen.

## 14. Áhččámet

---

Hearrá rohkos celkojuvvo ovttá jitnii.

**S** Áhččámet, don guhte leat almmis.

Basuhuvvos du namma.

Bohtos du riika.

Šaddos du dáhttu,

mo almmis nu maiddái eatnama alde.

Atte midjiide odne min beaivválaš láibbi.

Ja atte midjiide min suttuid ándagassii,

nugo miige ándagassii addit velggolaččaidasamet.

Alege doalvvo min geahččalussii,

muhto beastte min bahás eret.

Dasgo du lea riika ja fápmu ja gudni agálašvuhtii.

Ámen.

## IV Loahpaheapme

---

### 15. Buressivdnádus

---

Buressivdnádusa manŋá báhppa addá náittosbárrii Biibbala.

**B** Hearrá buressivdnidivččii din ja várjalivččii din.

Hearrá čuvgešii muođuidis didjiide

ja livččii didjiide árbmugas.

Hearrá jorgalivččii muođuidis din beallái

ja attášii didjiide ráfi.

Áhči ja + Bártni ja Bassi Vuoiŋŋa nammii.

**S** Ámen.

### 16. Vuolggaheapme

---

Ávžžuhus celkojuvvo aiddo ovdalaš vuolgima.

**B** Mannet ráfis ja bálvolehket Hearrá iluin.

### \*17. Loahpahanmusihkka

---

Loahpahanmusihkkan sáhtá leat sálbma ja/dahje čuojanasmusihkka. Sálmma dahje lávlaga sáhtá lávlut maiddái čuoggá 15 ovddabealde.

# Moarsemeassu

Rávvagat náittoslihttui vihaheames ja dasa ráhkkaneames leat náittoslihttui vihaheame minstara álggus.

Guoimmiguovttos bohtiba álggahanmusihka áigge áltára ovdii, luoitádeaba čippiid ala ja sirdáseaba dan maŋná iežaska sajiide.

## I Álggahus

---

### \*1. Álggahanmusihkka

---

Álggahanmusihkkan sáhtá leat čuojanasmusihkka ja/dahje sálbma.

## 2. Álgosivdnideapme

---

Buressivdnádusa ja vuorrodearvvahusa lea vejolaš lávlut dahje lohkat.

### Buressivdnádus

Nuohttaráidu 1



**L** Áh - či ja + Bárt - ni ja Bas-si Vuoiŋ-ŋa nam - mii.



**S** Á - men, á - men, á - men.

### Vuorrodearvvahus

Nuohttaráidu 1



**L** Hear-rá leh - kos din - guin.



**S** Nu son leh - kos maid-dái du vuoiŋ - ŋain.



## DAHJE

### Buessivdnádus

Nuohttaráidu 2



L Áh - či ja + Bárt-ni ja Bas - si Vuoiŋ-ŋa nam-mii.



S Á - men, á - men, á - men.

### Vuorodearvvahus

Nuohttaráidu 2



L Hear - rá leh - kos din-guin.



S Nu son leh-kos maid-dái du vuoiŋ-ŋain.

## 3. Álggahansánit

---

Báhppa ráhkada álggahansániid ieš dahje geavaha čuovvovaš molssaeavttuid. Sánit jođihit suddovddastussii

**L** Buorre náittosbárta, NN ja NN. Doai leahppi bohtán náitalit Ipmila muoduid ovdii ja bivdit dasa Ipmila buressivdnádusa. Biibbalis celkojuvvo: ”Ipmil sivdnidii olbmo govvanis, Ipmila govvan son su sivdnidii, olmmájin ja nisun son sivdnidii sudno. Ipmil buressivdnidii sudno.” (1 Mos 1: 27–28) Mii rohkadallat Ipmila, ahte son attášii dudnuide valjis buriid skeaŋkkaidis, várjalivččii dudno ja nannešii dudno sániinis. Mii rámidit Ipmila su ráhkisvuodas ja illudit Bassi Vuoiŋŋa oasálašvuodas. Mii doallat ovtta bassi eahkedaččaid, mat leat ándagassiiaddojumi, ráhkisvuoda ja oktavuoda mállásat. Mii dorvvastit Hearrámet Jesusa Kristusa árbmui ja rohkadallat Ipmila ándagassiiaddojumi [ovtta jitnii] dáid sániiguin.

## DAHJE

Ráhkis ustibat, NN ja NN. Doai leahppi bohtán náitalit Ipmila muođuid ovdii. Jesus cealká: ”Sivdnideame álggus Ipmil sivdnidii sudno olmmájin ja nisun. Dan dihtii olmmái guoddá áhčis ja eatnis, ja bissu áhkás luhtte, ja dat guovttis šaddaba oktan oažžin. De eaba leat šat guovttis, muhto okta. Maid Ipmil nappo lea ovttastahttán, dan ii olmmoš galgga earuhit.” (Mark 10: 6–9) Mii bivdit Ipmila nannet dudno ráhkisvuoda ja gievrudit dudno sániinis. Ovttas dudno lagamuččaiguin ja ustibiiguin mii rohkadallat dudno náittoslihttui Ipmila buressivdná-dusa ja ávvudit bassi eahkedaččaid.

Ráhkis kristtalaččat. Mii giitit almmálaš Áhči buot das, maid son lea addán midjiide. Mii guoddit su oskálii dan, mii lea duogábealde, ja mii bivdit du boahteveaš eallima láidesteadjin. Ipmila ráhkisvuohta lea dievaslaš, muhto min ráhkisvuohta su ja earáid guovdu lea headju ja váilevaš. Mii gáhtat dan bahá, maid mii leat didolaččat dahje diede-keahttá dahkan. Ipmila árbmugasvuhtii luohttimiin mii rohkadallat ándagassiiaddojumi [ovtta jitnii] dáid sániiguin:

## 4. Oktasaš rihpat

---

### Suttudovddastus

Suttudovddastusa sáhtá lohkat ovta jitnii. Dan boddii sáhtá luoitádit čippiid ala. Suttudovddastusa lea vejolaš boatkut searvegotti rohkosdajaldagain dahje –lávlagiin, dahje dan gaskkas sáhtá leat jaskes boddu. Suttudovddastusas sáhtá leat maiddái jaskes rohkos, masa lea vejolaš ávžžuhit ovdamearkka dihte: Gula maiddái mu/min jaskes ándagassiiátnuma.

Eará suttudovddastusat Ipmilbálvalusaid girjjis.

Herrá, don leat sivdnidan min  
eallit ovttas earáiguin,  
veahkehit ja doarjut guhtet guoibmámet.  
Almmatge mii válljet bálgáid,  
mat gáidádit min guhtet guoimmisteamet,  
eat beroš veahkehit nuppiid,  
eatge giitit.

Atte ándagassii vuovdnáivuohtamet.

Buollát mis ráhkisvuoda

du ja guhtet guoibmámet guovdu.

## Suttubeastin

Suttubeastima ámena sáhtá lávlut dahje lohkat.

Eará suttubeastimat Ipmilbálvalusaid girjjis.

1. ”Ráhkisvuohta ii leat dat ahte mii leat ráhkistan Ipmila,  
muhto ahte son lea ráhkistan min  
ja vuolggahan Bártnis min suttuid soabahussan.”  
Ráhkisvuodastis Ipmil árpmiha min  
ja addá midjiide buot suttuideamet ándagassii.

2. Jesus cealká:

”Ustiban, leage dorvvolaš mielain,  
du suttut leat dutnje ándagassii addojuvvon.”

[Su bálvaleaddjin gulahan dutnje dán suttubeastima

Áhči ja (+) Bártni ja Bassi Vuoiŋga nammii.]

**S** Ámen.

## 5. Biibbalsálbma

---

Sáhtá atnit Náittoslihttui vihaheame minstara biibbalsálmmaid dahje girkojagi čuovvu biibbalsálmma.

Biibbalsálmma lea vejolaš lávlut dahje lohkat. Dan álggus ja loahpas sáhtá leat antifona.

Biibbalsálbmii laktojuvvo Uhca gudni. Dat guđđojuvvo eret 5. fástoáiggi sotnabeaivvi rájes.

## 6. Hearrá, árpmit (Kyrie)

---

### MOLSSAEAKTU A

### Kyrie-litania

Kyrie-litania sáhtá lávlut dahje lohkat.

Eará kyrie-litaniat ja litania-nuohtat Ipmilbálvalusaid girjjis.

- O** Rohkadallot Áhči,  
 buot buori juogadeaddji,  
 ahte son skenkešii bálvaledjiidasas buressivdnádušas ja  
 várjalušas. [Rohkadallot Hearrá.]
- S** Hearrá, árpmi min. [Kristus, árpmi min. Hearrá, árpmi min.]
- O** Rohkadallot Kristusa,  
 ráhkisvuoda ádjaga,  
 ahte son attášii bálvaledjiidasas soabalaš miela.  
 [Rohkadallot Hearrá.]
- S** Hearrá, árpmi min. [Kristus, árpmi min. Hearrá, árpmi min.]
- O** Rohkadallot Bassi Vuoiŋŋa,  
 oktavuoda sivdnideaddji,  
 ahte son attášii bálvaledjiášis ráhkisvuoda ja oskkáldas-  
 vuoda.  
 [Rohkadallot Hearrá.]
- S** Hearrá, árpmi min. [Kristus, árpmi min. Hearrá, árpmi min.]

## **MOLSSAEAKTU Á**

**Hearrá, árpmi**

- S** Hearrá, árpmi min.  
 Kristus, árpmi min.  
 Hearrá, árpmi min.

## \*7. Gudni (Gloria) ja giittossálbma Bassi Golbmaoktavuhtii

Gudni ja giittossálbma Bassi Golbmaoktavuhtii gahččá eret fástoáigge (gutnagaskavahku rájes) ja adveantaáigge (vuossárgga rájes 1. adveanta-sotnabeaivvi maŋŋá ).

### Gudni

Nuohttaráidu 1



### DAHJE

Nuohttaráidu 2



**S** catnama alde ráfi olbmuide, geaid Ipmil árpmiha.

### Giittossálbma

Giittossálbman sáhtá geavahit čuovvovaš Bassi Golbmaoktavuhtii oamastuvvon sálmmaid: 11: 2,3,5, 17: 4, 51, 71, 72, 136: 7, 236, 395, 396 ja 424.

## 8. Beaivvi rohkos

Sáhtá atnit maddái Náittoslihttui vihaheame minstara rohkosiid (čuoggis 5).

Rohkosávžžuhusa ja searvegotti ámena lea vejolaš lávlut dahje lohkat. Ávžžuhusa maŋŋá sáhtá leat oanehis jaskes rohkos.

Nuohttaráidu 1



## DAHJE

### Nuohttaráidu 2



1. Bassi Ipmil, almmálaš Áhččámet,  
don leat ráhkisvuoda nohkameahttun ája.  
Giitu náittoslihtu attáldagas.  
Veahket guimmiid atnit fuola goabbat guoimmisteaskka,  
nu ahte sudno gaskasaš ráhkisvuolta lassánivččii.  
Gula min Jesusa Kristusa dihtii.
2. Buotveagalaš Ipmil.  
Don sivdnidit olbmo eallit ovttas olmmájin ja nisun  
ja buressivdnidit sudno.  
Atte náittosguimmiid gaskii ráhkisvuoda.  
Veahket sudno bissut oskkáldassan  
ja ráhkistit goabbat guoimmiska buorre ja bahás beivviid.  
Dán mii rohkadallat Hearrámet Jesusa Kristusa namas.
3. Almmálaš Áhčči.  
Ráhkisvuodastat don leat ásahan náittoslihtu  
ja gohččon guimmiid eallit sánát mielde.  
Veahket sudno ráhkistit goabbat guoimmiska,  
nugo Kristus ráhkistii searvegottis.  
Veahket guimmiid atnit náittoslihtu bassin  
ja čuovvut eallimisttiska du dáhtu.  
Atte sudnuide fámu bissut goabbat guoibmáseaskka oskkáldassan.  
Gula min Bártnát Jesusa Kristusa,  
Hearrámet dihtii.

### Nuohttaráidu 1



## DAHJE

Nuohttaráidu 2



## II Sáni

---

### 9. Čálabihtá

---

Lohkkojuvvo miinu vihaheame minstarii gulli čálabihtáin (čuokkis 6). Sáhtá atnit maid girkojagi čuovvu dahje eará čálabihtáid.

Lohkki almuha čálasaji. Searvegoddi guldala čohkut.

Vástádussániid lea vejolaš lohkat dahje lávlut (nuohat Ipmilbálvalusaid girjjis).

- čálabihtá

[**O** Dát lea Ipmila sáni.

**S** Ipmilii giittus.]

### 10. Sálbma

---

### \*11. Evangelium

---

Evangelium almmuhuvvo ovdamearkka dihte ná: Čuožžilehket guldalit bassi evangeliuma.

Lohkkojuvvo miinu Náittoslihttui vihaheame minstarii gulli evangeliumbihtáin (čuokkis 3). Sáhtá atnit maddái girkojagi čuovvu dahje eará evangeliuma.

Ovdal evangeliuma ja/dahje dan maŋŋá lea vejolaš lávlut halleluja. Hallelujalávlagii, mii lea evangeliuma ovddabealde, sáhtá laktit hallelujagurgadasa. (gč. Evangeliumgirjji). Hallelujalávлага nuohat Ipmilbálvalusaid girjjis.

Halleluja gahččá eret fástoáigge gutnagaskavahku rájes. Dalle hallelujalávлага sajis lea vejolaš geavahit sálbmadajaldaga (gč. Evangeliumgirjji).

Vástádussániid lea vejolaš lohkat dahje lávlut (nuohat Ipmilbálvalusaid girjjis).

- evangelium

[**L** Dát lea bassi evangelium.

**S** Rámáduš dutnje, Kristus.]

## 12. Sárdni

---

### \*13. Oskkudovddastus (Credo)

---

Oskkudovddastus lohkkovuo ovttá jittii. Lea vejolaš geavahit maiddá Nikea oskkudovddastusa.

Oskkudovddastussan lea vejolaš geavahit maiddá sálmma 12, 13 dahje 401:1–3.

**S** Mun oskkun Ipmilii, Áhččái, Buotveagalažžii,  
almmi ja eatnama Sivdnideaddjái,  
ja Jesusii Kristusii,  
Ipmila áidnoriegádan Bárdnái, min Hearrái,  
guhte sahkanii Bassi Vuoinŋas,  
riegádii nieida Márjjás,  
gillái Pontius Pilatusa áigge,  
russiinávlejuvvui, jámii ja hávdáduvvui,  
manai vuolás jábmiid riikii,  
bajásčuožžilii jábmiid luhtte goalmmát beaivve,  
manai bajás albmái,  
čohkká Ipmila, buotveagalaš Áhči, olgeš gieda bealde,  
ja bohtá fas doppe dubmet calliid ja jábmiid,  
ja Bassi Vuignii,  
bassi oktasaš girku,  
bassi olbmuid searvivuoda,  
suttuid ándagassii addojumi,  
oačči bajásčuožžileame  
ja agálaš callima.



# III Vihhaheapme

---

Searvegoddi sáhtta čuožžut čuoggáid 8–11 buohta.

## 14. Gažaldagat

---

Guoimmiguovttos bohtiba áltára ovdii.

Báhppa jearrá irggis:

Ipmila muođuid ovddas ja dán searvegotti ovddas mun jearan dus, NN (oppa namma), dáhtutgo don váldit NN (oppa namma) náittosguoibminat ja leat sutnje oskkáldas ja ráhkistit su buorre ja bahás beivviid, gitta jápmima rádjai?

Vástáduš:

De dáhtun.

Báhppa jearrá moarsis:

Ipmila muođuid ovddas ja dán searvegotti ovddas mun jearan dus, NN (oppa namma), dáhtutgo don váldit NN (oppa namma) náittosguoibminat ja leat sutnje oskkáldas ja ráhkistit su buorre ja bahás beivviid, gitta jápmima rádjai?

Vástáduš:

De dáhtun.

### **DAHJE**

Báhppa jearrá irggis:

Buotdiehti Ipmila muođuid ovddas ja dán searvegotti ovddas mun jearan dus, NN (oppa namma), dáhtutgo don váldit NN (oppa namma) náittosguoibminat ja čájehit sutnje oskkáldasvuoda ja ráhkisvuoda miehte- ja vuostegiedageavadiin?

Vástáduš:

De dáhtun.

Báhppa jearrá moarsis:

Buotdiehti Ipmila muođuid ovddas ja dán searvegotti ovddas mun jearan dus, NN (oppa namma), dáhtutgo don váldit NN (oppa namma)

náittosguoibminat ja čájehit sutnje oskkáldasvuoda ja ráhkisvuoda miehte- ja vuostegiedageavadiin?

Vástádus:

De dáhtun.

## 15. Suorpmasrohkos

---

Irgi geige báhppii suorbmasa (irggiguovttos moarsiin geigeba suorbmasa báhppii).

Guoimmiguovttos sáhhtiba luoitádit čippiid ala.

Báhppa bajida suorbmasa (suorbmasiid) ja cealká:

**L** Rohkadallot dan lihtu ovddas, man mearkan dát suorpmas lea (dát suorbmasat leat).

Buotdiehti Ipmil.

Don ieš leat ráhkisvuohta ja buressivdnidat sin,  
gudet dorvvastit dutnje.

Váldde suodjásat dán lihtu.

Veahket NN ja NN (ovdanamat) eallit náittoslihtus  
du bassi dáhtu mielde,

bissut goabbat guoibmáseaskka oskkáldassan  
ja bálvalit goabbat guoimmiska giitevaš mielain.

Dán mii rohkadallat Hearrámet Jesusa Kristusa dihtii.

**S** Ámen.

Báhppa geige irgái suorbmasa, ja son bidjá dan moarsi gurot gieđa orbbežii. Juos geavahuvvojit guokte suorbmasa, báhppa addá guoimmiguoktái suorbmasiid, ja soai bidjaba daid goabbat guoimmiska gurot gieđa orbbežii.

## 16. Suorpmaslohpadusat

---

Juos guoimmiguovttos sávva, doaimmahus sáhhtá ovdal suorbmasa (suorbmasiid) bidjama orbbežii joatkašuvvat dainna lágiin, ahte irgi doallá moarsiin suorbmasa (suorbmasiid) ja cealká:

Mun, NN,

válddán du, NN,

dál náittosguoibminan

ja dáhtun ráhkistit du buorre ja bahás beivviid [eallima loahpa rádjái].

Mearkan das mun attán dutnje dán suorbmasa.

Moarsi cealká:

Mun, NN,

válddán du, NN,

dál náittosguoibminan

ja dáhtun ráhkistit

du buorre ja bahás beivviid [eallima loahpa rádjái].

Mearkan das mun válddán dus (attán dutnje) dán suorbmasa.

### **DAHJE**

Irgi cealká:

Mun ráhkistan du, NN.

Háliidan juogadit duinna iluid ja morrašiid

ja leat dutnje oskkáldas, dassáži go jápmin munno earuha.

Moarsi cealká:

Mun ráhkistan du, NN.

Háliidan juogadit duinna iluid ja morrašiid

ja leat dutnje oskkáldas, dassáži go jápmin munno earuha.

## **17. Náittoslihtu nannen ja náittosguimmiid buressivdnideapme**

---

### **Náittoslihtu nannen**

**L** Doai leahppi dál váldán goabbat guoimmáde náittosguoibmin ja dovddastan dan almmolaččat Ipmila muođuid ovddas ja dán searvegotti oaidnut. Vihahansuorpmas lea addojuvvon mearkan dudno náittoslihtus. Ipmila ja su searvegotti bálvleaddjin mun nannen dudno lihtu ja cealkkán dál dudno náittosguoibmin.

## Náittosguimmiid buressivdnideapme

Náittosbárra sáhtta luoitádit čippiid ala.

**L** [Ipmil, almmálaš Áhčči,  
addos dudnuide ilus ja buressivdnádusas.

Ipmila áidna Bárdni  
lehkos buorrevuodastis dudnuin nu ilu go morraša beivviid.

Ipmil, Bassi Vuoigņa,  
orros dudnos ja golggahehkos álelassii ráhkisvuodas dudno váibmui].

Buressivdnidehkos dudno buotveagalaš ja árbmugas Ipmil,  
Áhčči ja (+) Bárdni ja Bassi Vuoigņa.

### **DAHJE**

[Ipmila Vuoigņa láidejehkos dudno,  
Ipmila fápmu várjalehkos dudno,  
Ipmila viisodat oahpahehkos dudno,  
Ipmila giehta suodjalehkos dudno,  
Ipmila geaidnu čájehehkos, gosa johtit].

Buressivdnidehkos dudno buotveagalaš ja árbmugas Ipmil,  
Áhčči ja (+) Bárdni ja Bassi Vuoigņa.

### **DAHJE**

**L** Hearrámet Jesusa Kristusa árbmu ja Ipmila ráhkisvuohta ja Bassi  
Vuoigņa oasálašvuohta lehkos dudnuin.

**S** Ámen.

## 18. Sálbma

---

Sálmma sajis lea vejolaš geavahit lávlaga dahje čuojanasmusihka.

## 19. Oktasaš ovddasrohkos

Sáhtta atnit maiddái Náittoslihttui vihaheame minstara rohkosiid (čuokkis 13). Oktasaš ovddasrohkosá sáhtta ráhkadit ja ollašuttit ovtta searvegote olbmui. Rohkosa lea vejolaš boatkut searvegotti rohkodajaldagain dahje –lávlagiin, dahje dan gaskkas sáhtta leat jaskes boddu.

Rohkosávžžuhusa ja searvegotti ámena sáhtta lávlut dahje lohkat.

Nuohttaráidu 1



L Roh - ka - dal - lot.

### DAHJE

Nuohttaráidu 2



L Roh - ka - dal - lot.

### 1. Bassi Ipmil, almmálaš Áhččámet.

Mii giitit du das,

ahte don leat ásahan náittoslihtu skeaŋkan olmmái- ja nissonolbmui.

Don čanat sudno oktii ráhkisvuodas ja deavddát sudno iluin.

Buressivdnit NN ja NN,

gudet leaba du ovddas náitalan.

Veahket sudno ráhkistit ja bálvalit goabbat guoimmiska

ja bissut goabbat guoimmiska dorvun oppa eallima áigge.

Juos miinu váttisvuodaid deaivideš,

divtte dan jodihit sudno lagabui goabbat guoimmiska ja du.

Veahket sudno juohke dilis dorvvastit du veahkkái ja jeddehussii.

Mii rohkadallat NN ja NN lagaš olbmuid ovddas.

Buvtte sin ruovttuide ráhkisvuoda, ilu ja ráfi.

Deavdde min buohkaid buorrevuodainat

ja veahket min čuovvut eallimistámet du dáhtu.

Láide min oktii du lusa almmi siidii, agálaš illui.

Gula min rohkosa Hearrámet Jesusa Kristusa namas.

2. Ipmileamet ja Sivdnideaddjámet,  
buot buorre vuoda ja ráhkisvuoda gáldu.

Don leat gohččon NN ja NN eallit du ásahan náittoslihtus,  
man don leat oaivvildan ráhkisvuoda ahtanuššanbáikin.

Mii giitit du das,  
ahte soai leaba lohpidan du ovddas goabbat guoibmáseaskka  
oskkáldasvuoda ja ráhkisvuoda.

Divtte dán beaivve lohpadusa guoddit sudno dallege,  
go fuolat ja morrašat deaividit.

Nanne sudno ráhkisvuoda ja ustitvuoda.

Herrá, du luhtte lea eallima gáldu.

Veahket min eallit du ja guhtet guoibmámet lahka.

Atte midjiide fámu ja ráhkisvuoda,

vai mii nagodit guoddit guhtet guoibmámet nodiid  
ja addit nuppiide ándagassii.

Oppa máilbmi ohcala doaivvu ja ráhkisvuoda.

Divtte min dovdat,

ahte don leat Ipmileamet ja mii du álbmot.

Don leat sivdnidan min, ja du giedas lea min eallin.

Don dovddat min ja attát midjiide árpmu.

Rámádus dutnje Jesusis Kristusis, min Heerrás.

Nuohttaráidu 1



**DAHJE**

Nuohttaráidu 2



## IV Eahkedaččat

---

### 20. Oaffarsálbma dahje offertorio (Offertorium)

---

Sálmma áigge eahkedaččat lágiduvvojit áltárbeavdái. Sálmma sajis sáhttá leat goarralávlun dahje čuojanasmusihkka.

Guoimmiguovttos máhccaba iežaska sajiide.

### 21. Eahkedašrohkos (Eukaristalaš rohkos)

---

#### Vuorrolávlla

Nuohttaráidu 1




**L** Hear - rá leh - kos din - guin.



**S** Nu son leh - kos maid-dái du vuoiñ - ñain.



**L** Ba - ji - deh-ket váim-mui - deat - tet.



**S** Ba - ji - dit dan Hear - rá guv - lui.



**L** Gii - ta - leh-kot Hear - rá, Ip - mi - lea - met.



**S** Nu lea duo-daid-ge vuoi-gat ja doh - ká - laš.

## DAHJE


### Nuohttaráidu 2



**L** Hear - rá leh - kos din - guin.




**S** Nu son leh-kos maid - dáí du vuoij - ñain.



**L** Ba - ji - deh - ket váim-mui - deat - tet.



**S** Ba - ji - dit dan Hear-rá guv - lui.



**L** Gii - ta - leh - kot Hear-rá, Ip - mi - lea - met.



**S** Nu lea duo - daid-ge doh-ká-laš ja vuoi - gat.

## Prefašuvdna

Prefašuvnna lea vejolaš lávlut dahje lohkat. Prefašuvnna nuohtta lpmilbálvalusaid girjjis.

### Prefašuvnna álgu

**L** Duodaid lea riehta ja árvvolaš,  
ahte mii giitit du álo ja juohke sajis,  
bassi Hearrá, buotveagalaš Áhčči, agálaš lpmil,  
Jesusa Kristusa, min Hearrá bokte.

### Prefašuvnna loahppa

Eará prefašuvnnaid loahpat lpmilbálvalusaid girjjis.

Sus don čájehit máilbmái dievaslaš ráhkisvuoda  
ja addet midjiide ovdagova olbmuid gaskasaš ráhkisvuhtii.  
Mii giitit du dán almmi attáldagas  
ja lávlut dutnje rámaidusa engeliiguin ja buot basiiguin:



## \* Bassi (Sanctus)

Searvegoddi sáhtta čuožžut Bassi–hymna rájes Ipmila Láppis –hymna rádjai.

**S** Bassi, bassi, bassi Hearrá Sebaot!

Albmi ja eana dievva lea du šearratvuodainat.

Hosianna allagasas!

Sivdniduvvon lehkos son, guhte boahtá Hearrá nammi.

Hosianna allagasas!

## Rohkos ja áсахansánit

Juos vuorrolávlla, prefašuvdna ja Bassi guđđojuvvojit eret, rohkos álgá ávžžuhusain: Giitalehkot Hearrá, Ipmileamet.

Eará vejolaš eahkedašrohkosat Ipmilbálvalusaid girjjiis.

Almmálaš Áhčči, buot Sivdnideaddji,  
mii muitit giitevažžan, maid don leat dahkan min ovddas:  
Don sáddejit Bártnát beastit máilmmi.  
Son šattai olmmožin ja čájehii midjiide ráfi geainnu.  
Son lei min luhtte ja basuhii min ruovttu.  
Son devddii du dáhtu buot áššiin  
ja miedai gillámuššii ja jápmimii  
vai son lonistivččii min friddjan.

*Hearrámet Jesus Kristus,  
dan ija go son behttojuvvui,  
válddii láibbi, buressivdnidii (+) ja doadjalii dan,  
attii máhttájeaddjiidasas ja celkkii:  
Váldet ja borret. Dát lea mu rumaš,  
mii addojuvvo din ovddas.  
Dahket dan mu muitun.*

*Nu son válddii maddái geara, giittii (+) ja celkkii:  
Juhket dás buohkat.  
Dát gearra lea odda lihttu mu varas,*

*mii golggahuvvo din ovddas  
suttuid ándagassii addojupmin.  
Nu dávjá go dii das juhkabehtet,  
dahket dan mu muitun.*

Árpmolaš Áhčči,  
mii dáhttut deavdit dán gohččuma  
ja doallat bassi eahkedaččaid Bártnát muitun  
ja nu gulahit su jápmima dassáži, go son boahtá.

[**S** Mii gulahit su jápmima.  
Mii duodaštit su bajásčuožžileame.  
Mii vuordit su boahtima iežas gudniin.]

Mii rohkadallat du:  
Sádde Bassi Vuoiŋnat,  
vai mii luohttit lohpadussii suttuid ándagassiiaddojumis  
ja váldit oskkus vuostá Bártnát rupmaša ja vara min bestojupmin,  
dassáži go oktii beassat deaivvadit sinna du riikkas.

Su bokte, sinna ja sus  
gullá dutnje, buotveagalaš Áhčči  
Bassi Vuoiŋna oktavuodas  
gudni ja šearratvuohta álo ja agálaččat.

**S** Ámen.

## 22. Áhččámet

---

Herrá rohkos celkojuvvo ovttá jitnii.

**S** Áhččámet, don guhte leat almmis.  
Basuhuvvos du namma.  
Bohtos du riika.  
Šaddos du dáhttu,

mo almmis nu maiddái eatnama alde.  
 Atte midjiide odne min beaivválaš láibbi.  
 Ja atte midjiide min sudduid ándagassii,  
 nugo miige ándagassii addit velggolaččaidasamet.  
 Alege doalvvo min geahččalussii,  
 muhto beastte min bahás eret.  
 Dasgo du lea riika ja fápmu ja gudni agálašvuhtii.  
 Ámen.

## 23. Hearrá ráfi (Pax)

Vuorrolávлага маҥҥа lea vejolaš ávžžuhit ráfi sávaldahkii. Searvegotte olbmot buorástahttet nuppiideaset ja celket ovdamearkka dihte: Kristusa ráfi dahje Ipmila ráfi.

Nuohttaráidu 1




**L** Hear - rá rá - fi leh-kos din - guin.



**S** Nu son leh-kos maid-dái du vuoij - ҥain.

### DAHJE

Nuohttaráidu 2



**L** Hear - rá rá - fi leh - kos din - guin.



**S** Nu son leh-kos maid - dái du vuoij - ҥain.

## \*24. Ipmila Láppis (Agnus Dei)

Liturga sáhtá doadjit eahkedašláibbi Ipmila Láppis –hymna áigge.

**S** Ipmila Láppis don, guhte guottát máilmmi suttu,  
 árpmi min, árpmi.

Ipmila Láppis don, guhte guottát máilmmi suttu,  
árpmit min, árpmit.

Ipmila Láppis don, guhte guottát máilmmi suttu,  
atte midjiide ráfi.

## 25. Eahkedaččaid juohkin

---

### Eahkedašbovdehus

**L** Ávdugasat sii geat leat bovdejuvvon Lábbá headjamállásiidda.

Bohtet, buot lea juo válmmaštuvvon.

### Eahkedaččat (Communio)

Eahkedaččaid juogadeame áigge sáhtta leat sálbmalávlun dahje eará musihkka.

Láibbi juogadettiin celkojuvvo:

[Min Hearrá Jesusa] Kristusa rumaš, du ovddas addojuvvon.

Rihppaguossi sáhtta vástidit: Ámen.

Viinni juogadettiin celkojuvvo:

[Min Hearrá Jesusa] Kristusa varra, du ovddas golggahuvvon.

Rihppaguossi sáhtta vástidit: Ámen.

### Loahpahansánit

Loahpahansániid maŋŋá eahkedašlihtit gokčojuvvojit [ja sirdojuvvojit veahkkebeavddi ala].  
Ovdal giittosrohkosa (čuokkis 25) sáhtta leat jaskes boddu.

**L** Mii leat vuostáiváldán Hearrá Jesusa Kristusa.

Várjalehkos son min agálaš callimii.

**S** Ámen.

### DAHJE

**L** Min Hearrá Jesusa Kristusa rumaš ja varra  
vurkejehkos oppa min vuoiŋŋa, sielu ja rupmaša  
agálaš callimii.

**S** Ámen.

## 26. Giittosrohkos

Rohkosávžžuhusa ja searvegotti ámena lea vejolaš lávlut dahje lohkat. Giittosrohkosin lea vejolaš geavahit maiddái sálmma (omd. 61:1, 62, 63, 65:1–2 ja 409:6–7).

Eará giittosrohkosat lpmilbálvalusaid girjjis.

Nuohttaráidu 1



### DAHJE

Nuohttaráidu 2



Almmálaš Áhčči,  
mii giitit du bassi eahkedaččain,  
ráhkisvuoda mállásiin,  
mainna don nannet oskomet dutnje.

Giitu das, ahte don čanat min ráhkisvuodas guhtet guoibmáseamet  
ja deavddát eallimeamet iluin.

Veahket min bissut oskkáldassan dutnje  
ja callit du dáhtu mielde.

Váldde min viimmat lusat agálaš illui.

Gula min rohkosa Jesusa Kristusa,  
min Hearrámet dihtii.

Nuohttaráidu 1



## DAHJE

Nuohttaráidu 2



# V Loahpaheapme

---

## 27. Máidnun

---

Juos giittosrohkosin (čuokkis 25) lea lávlojuvvon sálbma, báhcá máidnun eret.

Máidnumin lea vejolaš geavahit maiddái sálmma (omd. 77:4, 118:1–2, 306, 424:3–4 ja 467:7–10).


## Benedicamus

Nuohttaráidu 1



## DAHJE

Nuohttaráidu 1



**\*S** Ipmilii giittus. Halleluja!

Fástoáigge gutnagaskavahku rájes:

**\*S** Ipmilii giittus. Ámen.

## \*28. Buressivdnádus

---

Buressivdnádusa maŋŋá addojuvvo Biibbal.

**L** Hearrá buressivdnidivččii din ja várjalivččii din.

Hearrá čuvgešii muoduidis didjiide

ja livččii didjiide árbmugas.

Herrá jorgalivččii muoduidis din beallái

ja attášii didjiide ráfi.

Áhči ja + Bártni ja Bassi Vuoiŋŋa nammii.

**S** Ámen.

## 29. Vuolggaheapme

---

Ávžžuhus celkojuvvo aiddo ovdalaš vuolgima.

**B** Mannet ráfis ja bálvolehket Herrá iluin.

## \*30. Loahpahanmusihkka

---

Loahpahanmusihkkan sáhtá leat sálbma, lávlla ja/dahje čuojanasmusihkka.

# Náittoslihtu buressivdnideapme

Náittoslihtu, masa lea vihahuvvon eará go evangelalaš-luteralaš girku minstara mielde, sáhtá bivddedettiin buressivdnidit (GO 2:20).

Náittoslihtu buressivdnideapme doaimmahuvvo girkus dahje eará sajis, dađe mielde go náittosguoimmiguovttos ja báhppa das sohpet.

Musihka válljemis galgá váldit vuhtii doaimmahusa ipmilbálvaluslágan luonddu. Musihkas vástida kántor, ja das galgá ságastit sinna.

Guoimmiguovttos čuožžuba áltára (báhpa) ovddas dan láhkai, ahte nisu čuožžu olbmá gurot bealde.

## I Álggahus

---

### \*1. Álggahanmusihkka

---

Álggahanmusihkkan sáhtá leat čuojanasmusihkka ja/dahje sálbma.

### 2. Álgosivdnideapme

---

Buressivdnádusa ja vuorrodearvvahusa lea vejolaš lohkat dahje lávlut.

#### Buressivdnádus

**B** Áhči ja + Bártni ja Bassi Vuoiŋŋa nammii.

**S** Ámen.

#### Vuorrodearvvahus

**B** Hearrá lehkos dinguin.

**S** Nu son lehkos maddái du vuoiŋŋain.



### 3. Álggahansánit

---

Báhppa ráhkada álggahansániid ieš dahje geavaha čuovvovaš molssaeavttuid.

- B** Ráhkis ustibat, NN ja NN. Doai leahppi bohtán Ipmila muoduid ovdii bivdit dudno náittoslihttui Ipmila buressivdnádusa. Biibbalis celkojuvvo: ”Ipmil sivdnidii olbmo govvanis, Ipmila govvan son su sivdnidii, olmmájin ja nisun son sivdnidii sudno. Ipmil sivdnidii sudno.” (1 Mos 1: 27–28.)

#### DAHJE

- B** Ráhkis ustibat, NN ja NN. Mii leat Ipmila ovddas bivdimin dudnuide, NN ja NN, su buressivdnádusa. Jesus cealká: ”Sivdnideame álggus Ipmil sivdnidii sudno olmmájin ja nisun. Dan dihtii olmmái guoddá áhčis ja eatnis, ja bissu áhkás luhtte, ja dat guovttis šaddaba oktan oažžin. De eaba leat šat guovttis, muhto okta. Maid Ipmil nappo lea ovttastahtán, dan ii olmmoš galgga earuhit.” (Mark 10: 6–9.)

### 4. Biibbalsálbma

---

Sáhhtá atnit maddái girkojagi čuovvu dahje eará biibbalsálmmaid.

Biibbalsálmma sáhhtá lohkat dahje lávlut. Dan álggus ja loahpas sáhhtá leat antifona.

Biibbalsálbmii laktojuvvo Uhca gudni. Dan sajis sáhhtá atnit čuovvovaš sálmmaid vearssaid: 5:4, 66:3, 136:7, 218:7, 336:8, 340:8, 341:10, 348:6, 379:6. Uhca gudni guđđojuvvo eret 5. fástoáiggi sotnabeaivvi rájes.

#### Antifona

Herrá lea midjiide sakka árbmugas,  
su oskkáldasvuohta bistá agálaš áigái.

Sál 117: 2

#### DAHJE

Herrá lea mu báhtaranbáiki ja ladni,  
mu Ipmil geasa dorvvastan.

Sál 91: 2

#### Biibbalsálbma

Dat guhte čohkká Alimusa suojis

ja ássá Buotveagalačča suoivanis, dadjá ná:

”Hearrá lea mu báhtaranbáiki ja ladni,  
mu Ipmil geasa dorvvastan.”

Soadjádolggiidisguin son gokčá du,  
su soajáid vuolde don gávnnat suoji.

Su oskkáldasvuolta lea galba ja suodjalus.

Du báhtaranbáiki lea Hearrá,  
don leat dahkan Alimusa orrunsadjinat.

Sál 91: 1–2, 4, 9

### **DAHJE**

Mun bajidan čalmmiidan váriid guvlui:

Gos boahtá munnje veahkki?

Mu veahkki boahtá Hearrás,  
almmi ja eatnama sivdnideaddjis.

Ii son divtte du juolggi suoibut,  
du goziheaddji ii oadestuva.

Ii son oadestuva iige nohka,  
son lea Israela goziheaddji.

Hearrá lea du goziheaddji,

Hearrá lea du suoivvan du olgeš gieda bealde.

Beaivváš ii vahágahte du beaivet  
iige mánnu ihkku.

Hearrá várjala du buot bahás,  
son várjala du heakka.

Hearrá várjala du vuolgima ja du bohtima  
dálážis gitta agálaš áigái.

Sál 121

### **DAHJE**

Hearrá sátni lea álo luohtehahti,  
son lea oskkáldas buot daguinis.

Vuorddašemiin buohkat gehččet dutnje,  
ja don attát sidjiide borramuša rivttes áigái.

Don rabat giedat  
ja gallehat buot heakkalaččaid buorre vuodastat.  
Vanhurskkis lea Hearrá buot vádjolusastis  
ja oskkáldas buot daguinis.  
Hearrá lea buohkaid lahka gudet čurvot su,  
gudet čurvot su duohtavuodas.  
Son ollašuhttá ipmilbalolaččaid sávaldagaid,  
son gullá sin čuorvasa ja beastá sin.

Sál 145: 13, 15–19

All 8: 6–7

## Uhca gudni

Gudni Áhččái ja Bárdnái  
ja Bassi Vuignii,  
nugo lei álggus, dál lea ja álo  
agálašvuodas agálašvuhtii. Ámen.

## Antifona geardduhuvvo.

## 5. Rohkos

---

Ávžžuhusa maŋŋá sáhtta leat oanehis jaskes rohkos.

### **B** Rohkadallot.

1. Bassi Ipmil, almmálaš Áhččámet,  
don leat ráhkisvuoda nohkameahttun gáldu.  
Giitu náittoslihtu attáldagas.  
Veahket guimmiid atnit fuola goabbat guoimmisteaskka,  
nu ahte sudno gaskasaš ráhkisvuolta lassánivččii.  
Gula min Jesusa Kristusa dihtii.

2. Buotveagalaš Ipmil.

Don sivdnidit olbmo eallit ovttas olmmájin ja nisun  
ja buressivdnidit sudno.

Atte náittosguimmiid gaskii ráhkisvuoda.

Veahket sudno bissut oskkáldassan

ja ráhkistit goabbat guoimmiska buorre ja bahás beivviid.

Dán mii rohkadallat Hearrámet Jesusa namas.

3. Ipmil, máilmmi sivdnideaddji.

Don attát náittoslihtus olbmá ja nissona  
guoibmin goabbat guoibmáseaskka.

Mii giitit du das,

ahte maiddái náittoslihttu speadjalastá

du sivdnidanbarggu buorrevuoda ja čábbodaga.

Atte buressivdnádušat NN ja NN lihttui,

vai soai sáhtášeigga das ollašuhttit du addin barggu

ja váldit giitevažžan vuostái eallima attáldagaid.

Gula min don, guhte leat buot buorrevuoda gáldu.

4. Almmálaš Áhčči.

Ráhkisvuodastat don leat ásahan náittoslihtu

ja gohččon guimmiid eallit sánat mielde.

Veahket sudno ráhkistit goabbat guoimmiska,

nu mo Kristus ráhkistii searvegottis.

Veahket guimmiid atnit náittoslihtuska bassin

ja čuovvut eallimisttiska du dáhtu.

Atte sudnuide návccaid bissut oskkáldassan goabbat guoibmáseaskka.

Gula min Bártnat Jesusa Kristusa,

Hearrámet dihtii.

**S** Ámen.

## II Sáni

---

### 6. Biiballohkan

---

Lohkkojuvvo okta dahje moadde čuovvovaš čálabihtáin. Sáhttá atnit maddái girkojagi čuovvu dahje eará čálabihtáid.

Lohkki almmuha čálasaji.

Biiballohkamii lea vejolaš laktit vástádusa (biibbalsálbma, sálbma, lávlla, čuojanas-musihkka dahje jaskes mediteren).

1 Mos 1: 27–28

Ipmil sivdnidii olbmo iežas govvan, Ipmila govvan son sivdnidii su, olmmajin ja nissonin son sivdnidii sudno. Ipmil buressivdnidii sudno ja celkkii suduide: ”Leahkki šattolaččat ja lassaneahkki, deavdi eatnama ja dahkki dan iežade vuolibužžan. Rádđejeahkki meara guliid ja almmi lottiid ja buot elliid mat lihkadit eatnama alde.”

1 Kor 13: 1–8, 13

Vaikko vel sártnošinge olbmuid dahje engeliid gielaiguin, muhto mus ii livčče ráhkisvuohta, de livččen dušše čuoddji biellu dahje skilaid deaddji divga.

Vaikko mus vel livččiige profehtastallanattáldat ja dovddašin buot čiegusvuodaid ja buot dieđu, ja vaikko mus livččii buot osku nu ahte sáhtášin váriid sirdit, muhto ii livčče ráhkisvuohta, de mun in livčče mihkkege. Vaikko vel juogadivččen váivvážiidda buot mii mus leažžá, ja vaikko divttášin iežan boldojuvvot, muhto mus ii livčče ráhkisvuohta, de dat ii livčče munnje ávkin.

Ráhkisvuohta lea gierdavaš, ráhkisvuohta lea ládis, ii dat gádaš iige rábmo iige čeavlástala. Ii dat daga maidege dohkkemeahttumiid iige bivdde iežas ávkki, ii dat suhta iige vurke baháid. Ii dat illut vearrivuodas, muhto baicca duohtavuodas. Dat gillá buot, osku buot, doaivu buot, gierdá buot. Ráhkisvuohta ii noga goassege.

De dat bissot, dát golmmas: Osku, doaivu ja ráhkisvuohta. Muhto buot stuorimus dain lea ráhkisvuohta.

Ef 4: 32–5: 2

Lehket buorit guhtet guimmiidasadet; lehket váibmoláddásat ja addet ándagassii guhtet guimmiidasadet nugo Ipmil ge lea addán didjiide ándagassii Kristusis.

Atnet nappo Ipmila ovdagovvan, dii geat lehpet su ráhkis mánát. Vádjolehket ráhkisvuodas, nugo Kristusge lea ráhkistan min ja addán iežas min dihtii attáldahkan, njuovvanoaffarin mii lea Ipmila miela mielde.

Fil 4: 4–7

Illudehket álelassii Hearrás! Vel oktii cealkkán: Illudehket! Dovdoset buot olbmot ahte dii lehpet láddásat. Hearrá lea lahka! Allet ane morraša mastege! Buktet baicca buot dárbbuideattet ovdan Ipmilii rohkadallamiin ja ánodemiin giitevašvuodain! De Ipmila ráfi, mii manná buot jierpmi badjel, várjala din váimmuid ja jurdagiid Kristusis Jesusis.

Kol 3: 12–14

Go dii lehpet Ipmila välljejuvvon, bassi ja ráhkistuvvon olbmot, de gárvodehket dan dihtii njuoras árkkálmastinvuodain, buorrevuodain, ustitlašvuodain, vuollegašvuodain ja gierdavašvuodain, nu ahte dii gierdabehtet guhtet guimmiideattet ja addibehtet ándagassii guhtet guoibmáseattet, juos nuppis leš váidámuš nuppi vuostái. Nugo Hearrá lea addán ándagassii didjiide, nu galgabehtet diige addit ándagassii guhtet guoibmáseattet. Muhto ovddimustá, gárvodehket ráhkisvuodain mii lea ollisvuoda báddi.

1 Joh 4: 9, 11–12

Nu lea Ipmila ráhkisvuohta almmustuvvan min gaskii ahte son vuolggahii áidnoriegádan Bártnis máilbmái vai mii ealášeimmet su

bokte. Ráhkkásiiddán, juos Ipmil lea ráhkistan min nu, de miige leat geatnegasat ráhkistit guhtet guimmiideamet. Ii oktage leat goassege oaidnán Ipmila, muhto juos mii ráhkistit guhtet guimmiideamet, de Ipmil bissu min siste, ja su ráhkisvuohta ollašuvvá min siste.

Matt 19: 4–6

Jesus cealká:

”Ehpetgo leat lohkan ahte Sivdnideaddji álggus sivdnidii sudno olmmájin ja nisun. Dan dihtii olmmái guoddá áhčis ja eatnis ja bissu áhkás luhte, ja dat guovttis šaddaba oktan oažžin. De eaba leat šat guovttis, muhto okta. Maid Ipmil nappo lea ovttahtán, dan ii olmmoš galgga earuhit.”

Joh 2: 1–11

Goalmmát beaivvi ledje náittosheajat Kanas Galileas. Jesusa eadni lei doppe, ja maidái Jesus máhttájeddjiidiguin lei bovdejuvvon heajaide. De nohkkohte viinnis, ja Jesusa eadni dajai sutnje: ”Sis ii leat šat viidni.” Jesus celkkii: ”Nisu, maid don áiggut muinna? Ii mu diibmu leat velá bohtán.” Muhto su eadni dajai bálvaleddjiide: ”Dahket buot maid son gohču.”

Das ledje geadgečáhcelihtit, nugo vierru leige juvddálaččaid buhtistanmearrádusaid mielde. Ledje guhtta lihti, mat gesse guokte dahje golbma ánkara guhtege. Jesus celkkii: ”Devdet lihtiid čáziin.” Ja bálvaleddjit devde daid ravddaid dási. Son celkkii sidjiide: ”Goivot das ja guddet hejaid ovddasčužžui.” Sii gudde dan hejaid ovddasčužžui, ja son máisttii čázi mii lei šaddan viidnin. Ii son diehtán gos dat leažžá bohtán, muhto bálvaleddjit geat ledje goivon čázi, sii gal dihte. De son gohčui irggi bohtit ja dajai: ”Earát guossohit vuos buori viinni, ja go guossit juhkaluvvagohtet, de buktet fuonibu. Muhto don leat seastán buori viinni dássázi.”

Dán vuosttaš mearkadagus Jesus dagai Kanas Galileas. Son almmustahtii hearvásvuodas, ja su máhttájeaddjit osko sutnje.

Jesus cealká:

”Nugo Áhčči lea ráhkistan mu, nu lean munge ráhkistan din. Bissot mu ráhkisvuodas! Juos doallabehtet mu báhkкомиid, de bissubehtet mu ráhkisvuodas, nugo munge lean doallan Áhččán báhkкомиid ja bisun su ráhkisvuodas.

Dán lean sárdnon didjiide, vai mu illu bisošii din siste, ja din illu šattašii ollisin. Dát lea mu báhkкон: Ráhkistehket guhtet guimmii-deattet nugo mun lean ráhkistan din.”

## 7. Sárdni

---

Báhppa doallá friddja sárdni dahje geavaha Náittoslihttui vihaheame minstara (4A) sárdniid (čuokkis 7). Sárdnis galgašii váldit ovdan čuovvovaš fáttáid:

- náittoslihttu Ipmila attáldahkan ja ortnegin
- náittoslihttu beallalaččaid ahtanuššama báikin
- bearaš servodaga vuodđun
- illu ja giitevašvuohta
- ráhkisvuohta ja oskkáldasvuohta
- dovdu ja dáhttu
- ándagassiiátnun ja –addin
- fulkkiid ja ustibiid doarjja

## III Buressivdnideapme

---

Searvegoddi sáhtá čuožžut čuoggaid 8–9 buohta.

## 8. Gažaldagat

---

**B** Doai leahppi bohtán Ipmila muoduid ovdii bivdit su buressivdnádusa dudno náittoslihttui.



Báhppa jearrá olbmas:

NN (oppa namma), dáhtutgo don náittoslihtus, man leat dahkan NN:in (oppa namma), čájehit sutnje oskkáldasvuoda ja ráhkisvuoda miehte- ja vuostegiedageavadiin?

Vástádus:

De dáhtun.

Báhppa jearrá nissonis:

NN (oppa namma), dáhtutgo don náittoslihtus, man leat dahkan NN:in (oppa namma), čájehit sutnje oskkáldasvuoda ja ráhkisvuoda miehte- ja vuostegiedageavadiin?

Vástádus:

De dáhtun.

## 9. Náittosguimmiid buressivdnideapme

---

Náittosbárra luoitáda čippiid ala, juos dat lea vejolaš.

**B** Ráhkis ustibat NN ja NN. Doai leahppi náitalan ja lohpidan ráhkistit goabbat guoimmáde miehte- ja vuostegiedageavadiin.

### Buressivdnidanrohkos

**B** [Ipmil, almmálaš Áhčči, addos dudnuide ilus ja buressivdnádušas.

Ipmila áidna Bárdni

lehkos buorrevuodastis dudnuin nu ilu go morraša beivviid.

Ipmil, Bassi Vuoigŋa,

orros dudnos ja golggahehkos álelassii ráhkisvuodas dudno váibmui].

Buressivdnidehkos dudno buotveagalaš ja árbmugas Ipmil,

Áhčči ja (+) Bárdni ja Bassi Vuoigŋa.

### DAHJE

**B** [Ipmila Vuoigŋa láidejehkos dudno, Ipmila fápmu várjalehkos dudno,

Ipmila viisodat oahpahehkos dudno,  
Ipmila giehta suodjalehkos dudno,  
Ipmila geaidnu čájehehkos, gosa johtit].

Buessivdnidehkos dudno buotveagalaš ja árbmugas Ipmil,  
Áhčči ja (+) Bárdni ja Bassi Vuoigŋa.

## DAHJE

**B** Hearrámet Jesusa Kristusa árbmu ja Ipmila ráhkisvuohta ja Bassi Vuoigŋa oasálašvuohta lehkos dudnuin.

**S** Ámen.

## 10. Sálbma

---

Sálmma sajis sáhhtá leat eará heivvolaš musihkka.

## 11. Oktasaš ovddasrohkos

---

Ávvuveahka sáhhtá ovttas ráhkadit ja ollašuhhtit rohkosa.

Náittosbárra luoitáda čippiid ala, juos dat lea vejolaš.

**B/O** Rohkadallot.

1. Ipmil, ráhkis almmálaš Áhčči. Mii rohkadallat buressivdnádusa NN:i ja NN:i. Buressivdnit sudno ruovttu. Nanusmahte sudno gaskasaš ráhkisvuoda. Veahket sudno guoddit ovddasvástádusa ja atte sudnuide oskáldasvuoda. Veahket sudno vuoitit geahččalusaid. Várjal sudno rupmaša ja sielu. Láide sudno oppa eallima áigge ja veahket sudno eallima váttis beivviid. Gievrut sudnos oskku ja doaivvu. Doalvvo sudno oktii agálaš ruktui, šearratvuhtii. Gula min rohkosa Hearrámet Jesusa namas.
2. Buotveagalaš Ipmil. Juos don it hukse viesu, de snihkkárat barget dušši barggu. Čana dáid náittosguimmiid goabbat guoibmáseaskka ráhkisvuodain ja basut sudno náittoslihtu du nama gudnin. Veahket sudno ráhkadit ruovttu, gos osku, doaivu ja ráhkisvuohta rádđejit. Atte sudnuide Bassi Vuoigŋat, nu ahte soai du buressivdnádusain ealášeigga

ráfis. Veahket sudno gilvalit oskkus ja doalvvo sudno oktii almmi ruktui. Gula min Jesusa Kristusa, min Hearrámet dihtii.

3. Ipmil, mii giitit du ráhkisvuoda attáldagas. Buressivdnit NN ja NN, gudet leaba náitalan du muođuid ovddas. Mii giitit du das, ahte soai ráhkisteaba goabbat guoimmiska, luohttiba goabbat guoibmáseaskka ja dáhttuba atnit fuola goabbat guoimmisteaskka oppa eallima áigge. Arvosmahte sudno ain lagat oktavuhtii, amas mihkkige sáhttát sudno earuhit. Veahket sudno buot eallima beivviid ráhkistit goabbat guoimmiska ja leat goabbat guoibmáseaskka oskkáldasat. Várjal sudno buohcuvuodas ja bárttiin, buotlágan várain, mat sáhtášedje vahágahttit sudno. Juos miinu geahččalusaid deaivida sudno, divtte dan lagadit sudno goabbat guimmiineaskka ja duinna. Dán mii rohkadallat Hearrámet Jesusa Kristusa bokte.
4. Bassi Ipmil, almmálaš Áhčči. Juo álggu rájis don leat buressivdnidan luondduriikkat valljugas skeaŋkkaiguin. Atte buressivdnádušat dál NN:i ja NN:i, nu ahte soai čatnasivččiiga goabbat guoibmáseaskka sudno gaskasaš ráhkisvuodas ja guoibmevuodas. Veahket sudno atnit náittoslihtuska bassin ja čatnasit das goabbat guoibmáseaskka. Mii rohkadallat dán Bártnát Jesusa Kristusa, Hearrámet dihtii, guhte eallá ja rádde duinna ja Bassi Vuoiŋŋain áli ja agálaččat.

**S** Ámen.

## 12. Áhččámet

---

Hearrá rohkos celkojuvvo ovttá jitnii.

**S** Áhččámet, don guhte leat almmis.

Basuhuvvos du namma.

Bohtos du riika.

Šaddos du dáhttu,

mo almmis nu maddái eatnama alde.

Atte midjiide odne min beaivválaš láibbi.

Ja atte midjiide min sudduid ándagassii,

nugo miige ándagassii addit velggolaččaidasamet.  
Alege doalvvo min geahččalussii,  
muhto beastte min bahás eret.  
Dasgo du lea riika ja fápmu ja gudni agálašvuhtii.  
Ámen.

## IV Loahpaheapme

---

### \*13. Buressivdnádus

---

Buressivdnádusa manŋá báhppa addá náittosguoimmiguoktái Biibbala.

**B** Hearrá buressivdnidivččii din ja várjalivččii din.

Hearrá čuvgešii muođuidis didjiide  
ja livččii didjiide árbmugas.

Hearrá jorgalivččii muođuidis din beallái  
ja attášii didjiide ráfi.

Áhči ja + Bártni ja Bassi Vuoiŋŋa nammii.

**S** Ámen.

### 14. Vuolggahheapme

---

Ávžžuhus celkojuvvo aiddo ovdalaš vuolgima.

**B** Mannet ráfis ja bálvolehket Hearrá iluin.

### \*15. Loahpahanmusihkka

---

Loahpahanmusihkkan sáhtta leat sálbma, lávlla ja/dahje čuojanasmusihkka. Sálbma dahje lávlla lea vejolaš lávlut maiddái čuogga 13 ovdal.

HÁVDÁDEAPME

# Vitkan

Vitkama doaimmaha báhppa girkus, vitkankapeallas, buohcceviesu kapeallas, hávddi alde dahje oamehasa ruovttus, dađe mielde go oapmahaččat das sohpet báhpain. (GO 2: 22).

Juos vitkan dáhpáhuvvá girkus, dilálašvuođa álggus sáhhtá cahkkehit beassášgintala.

Báhppa galgá ságastit oamehasa oapmahaččaiguin ovdal vitkama. Báhppa galgá searvat maiddái rávvejaččaide, juos dat lea vejolaš ja juos oapmahaččat dan doivot.

Dát minsttar heivehuvvo dallege, go vitkojuvvo jábmin riegádan mánná dahje go liika ii leat.

Musihka válljemis galgá váldit vuhtii ipmilbálvalusalágan luonddu. Musihkas vástida kántor, ja das galgá ságastit suinna.

Juos rásit luitojuvvojit girkus, dan sáhhtá dahkat ovdal sálmma (čuokkis 1) dahje vitkama (čuokkis 13) maŋŋá. Juos rásit luitojuvvojit vitkama álggus, dan ovdal sáhhtá leat sálbma dahje eará musihkka.

Go oamehas mieđuštuvvo hávdái mielvázziiguin, mielvázziid ovddabealde sáhhtá gurput mieđušruossa. Mielvácedettiin sáhhtá lávlut sálmma.

Hávdádeames čuvvojuvvojit báikkálaš vierut.

## I Álggahus

---

### 1. Sálbma

---

Ovdal sálmma sáhhtá leat álgočuojahapme dahje eará heivvolaš musihkka.

### 2. Álgosivdnideapme

---

Buressivdnádusa ja vuorrodearvvahusa lea vejolaš lávlut dahje lohkat.

#### Buressivdnádus

**B** Áhči ja + Bártni ja Bassi Vuoiŋŋa nammii.

**S** Ámen.

#### Vuorrodearvvahus

**B** Hearrá lehkos dinguin.

**S** Nu son lehkos maiddái du vuoiŋŋain.

### 3. Álggahansánit

---

Báhppa ráhkada álggahansániid ieš dahje geavaha čuovvovaš molssaeavttuid. Juos álggahansániid manjá čuvvot oktasaš rihpat, sánit jodihit suddovddastussii.

**B** Kristtalaš searvegoddi. Bajásčuožžileame doaivu čuvvodahtta dán bottu, go mii leat miđušteamen NN hávddi vuoiŋnadussii. Bassi gásttas son lea čadnojuvvon Kristusa jápmimii ja bajásčuožžileapmái. Kristusa vuitui dorvvastemiin mii guoddit su Ipmila háldui. Mii luohttit Ipmila sáni lohpadussii: ”Kristus jámii min ovddas vai mii ealášeimmet sinna.” (1 Tess 5: 10)

#### DAHJE

**B** Buorre oapmahaččat ja ustibat. Min váimmu deavdá moraš ja ohcaleapme NN eretfárrema geažil. Mii guoddit su Ipmila háldui. Mii dorvvastit Kristusii, jápmima vuotái, guhte cealká: ”Mun ledjen jápmán, muhto geahča, mun ealán álo ja agálašvuhtii ja mus leat jápmima ja jábmiidriikka čoavdagat.” (Alm 1: 18)

#### DAHJE

Rihpašettiin

**B** Ráhkis oapmahaččat, fuolkkit ja ustibat. Din váimmu deavdá moraš ja áibbašseapme NN jápmima dihtii. Mii guoddit su Ipmila oskálíi. Mii dovdat gáhtamuša ja átestusa dan dihtii, ahte mii eat leat máhttán eallit rievttuid. Mánja ášši livččii galgan dahkat nuppe láhkai go maid mii leat dahkan. Loaiddastehkot dál árbmugas Ipmila muoduid ovdii ja dovdastehkot sudduideamet ja healbademiideamet.

### 4. Oktasaš rihpat

---

#### Suttudovddastus

Suttudovddastusa sáhtta lohkat ovttá jitnii. Dan boddii sáhtta luoitádit čippiid ala. Suttudovddastusas sáhtta leat maiddái jaskes rohkos, masa lea vejolaš ávžžuhit ovdamearkka dihte: Gula maiddái mu jaskes ándagassiiátnuma.

Eará suddovddastusat Ipmilbálvalusaid girjjis.

Mii dovdastit du ovddas, bassi Ipmil,

ahte mii leat suddudan  
jurdagiiguin ja sániiguin, daguiguin ja healbademiiguin.  
Muitte min váibmoládisvuodastat  
ja atte midjiide Jesusa Kristusa dihtii ándagassii,  
maid mii leat rihkkon.

## **DAHJE**

Čienalvuodas mun čuorvvun dutnje, Hearrá.  
Hearrá, gula mu jiena.  
Jorgal beljiidat gullat mu rohkosa.  
Juos don, Hearrá, anát muittus sudduid,  
Hearrá, guhte dalle ceavzá?  
Muhto du lea árbmu,  
don attát ándagassii,  
vai mii ballat dus.  
Mun vuorddán Hearrá,  
mu siellu vuordá,  
mun vuorddán su sáni.

## **Suttubeastin**

Eará suttibeastimat ipmilbálvalusaid girjjis.

**B** Buotveagalaš Ipmil addos midjiide suttuideamet ándagassii  
ja láidejehkos min agálaš callimii.

**S** Ámen.

## **5. Biibbalsálbma**

---

Sáhtta atnit maddái girkojagi čuovvu dahje eará biibbalsálmmaid.

Biibbalsálmma sáhtta lávlut dahje lohkat. Dan álggus ja loahpas sáhtta leat antifona.

Biibbalsálbmii sáhtta laktit Uhca gudni. Uhca gudni guđđojuvvo eret 5. fástoáiggi sotnabeaivvi rájes.



## Antifona

Herrá, atte sutnje agálaš vuoŋŋadusa,  
čuvgejehkos su agálaš čuovga.

Job 19: 25

## DAHJE

Mun vuorddán Herrá, mu siellu vuordá,  
mun vuorddán su sáni.

Sál 130: 5

## Biibbalsálbma

Herrá lea mu báimman,  
ii mus váillo mihkkege.

Ruonas gittiide son livvuda mu,  
vuoŋŋadusa čázi lusa son láide mu.

Son áhpásmahtá mu sielu.

Son doalvu mu vanhurskkisvuoda bálgáid mielde namas dihtii.

Vaikko mun vádjolivččen jápminsuoivana leagis,  
de in balaše mange bahás.

Dasgo don leat mu mielde.

Du soabbi ja báimmansoabbi jedđejit mu.

Don ráhkadat munnje beavddi  
mu vašálaččaid čalmmiid ovddas.

Don vuoiddat mu oaivvi oljjuin,  
mu juhkanlihtti golgá badjel.

Aivvefal buorrevohta ja árbmugasvohta doarridit mu  
buot mu eallinbeivviid,  
ja mun beasan ássat Herrá viesus guhkes áiggiid čada.

Sál 23

## DAHJE

Herrá, oahpat mu muitit mu loahpa,  
mu beivviid logu, man unnán dat leat,  
vai mun ádden man nohkavaš mun lean.

Geahča, don leat dahkan mu beivviid gieda govdosazžan,  
mu eallináigi lea du ovddas dego dušši.

Buot olbmot leat dego jiella.

Herrá, maid mun vel vuorddán?

Aivve du mun vuorddán.

Gula mu rohkosa, Herrá,  
guldal mu čuorvasa,  
ale jávohuva go mun čierun.

Sál 39: 5–6, 8, 13

### **DAHJE**

Nugo sarvvis goikaluvvá golgi jogaid maŋŋái,  
nu goikaluvvá mu siellu du maŋŋái, Ipmilan.

Mu siellu goiká Ipmila maŋŋái, calli Ipmila maŋŋái.

Goas beasan loaiddastit su muoduid ovdii?

Manne don muosehuvat, sillon,  
manne máraidat mu siste?

Vuordde Ipmila! Dasgo velá oktii mun giittán su,  
beastán ja Ipmilan.

Sál 42: 2–3, 6

### **DAHJE**

Herrá, don leat leamaš min orrunsadji  
sogas sohki.

Ovdal go várit riegádedje,  
ovdal go eanan ja máilbmi šadde,  
agálašvuodas agálašvuhtii leat don, Ipmil.

Don divttát olbmo šaddat fas muoldan ja cealkkát:

”Máhccet ruoktot, olbmománát.”

Dasgo duhát jagi du čalmmiin lea dego ievttáš beaivi  
mii jávkkihii meattá,  
dego idjagohcinvuorru.

Don njámastat olbmuid eret,  
sii leat dego iditnagir.

Sii leat dego rássi.

Idedis dat šaddá ja lieddu,  
eahkedii dat goldná ja goiká.

Oahpat min lohkat beivviideamet,  
de mii oažžut viissisvuoda váibmui

Sál 90: 1–6, 12

### DAHJE

Herrá cealká: ”Son dorvvasta munnje,  
ja mun gájun su,

mun attán sutnje suoji,  
dasgo son dovdá mu nama.

Son čuorvu mu, ja mun vástidan sutnje,  
mun lean sinna headis,  
mun gájun su ja attán sutnje gudni.

Mun gallehan su guhkes callimiin  
ja čájehan sutnje bestojupmán.

Sál 91: 14–16

### DAHJE

Mu siellu, máinno Herrá,  
buot mii lea mu siste,  
máinno su bassi nama!

Mu siellu, máinno Herrá,  
ale vajáldahte su buorredaguid!

Váibmoládis ja árbmugas lea Herrá,  
son lea guhkesmielalaš ja su árbmugasvuohta lea stuoris.

Nu allat go albmi lea eatnama bajábealde,  
nu stuoris lea Herrá árbmu sidjiide geat ballet sus.

Nu guhkin go nuorti lea oarjjis,  
nu guhkin son doalaha min sudduid mis eret.

Nugo áhčči árkkálmastá mánáidis,  
nu Herrá árkkálmastá sin gudet ballet sus.

Olbmo beaivvit leat dego suoidni,

olmmoš lea dego gietti lieddi.

Go bieggá šuviha meattá, de dat jávká,  
báiki gos dat lei ii šat dovdda dan.

Muhto Hearrá árbmugasvuohta lea agálašvuođa agálašvuhtii  
sin oassi gudet ballet sus.

Su vanhurskkisvuohta ollá mánáid mánáide.

Sál 103: 1–2, 8, 11–13, 15–17

## DAHJE

Čiekŋalassas mun čuorvvun du, Hearrá.

Hearrá, gula mu jiena.

Jorgal bealját mu guvlui  
ja guldal mu njuoras rohkosiid.

Juos don vurket sudduid,

Hearrá, gii dalle ceavzá?

Muhto dus lea ándagassii addojupmi,  
dan dihtii mii ballat dus.

Mun vuorddán Hearrá, mu siellu vuordá,  
mun vuorddán su sáni.

Israel, vuordde Hearrá,  
dasgo Hearrá lea árbmugas,  
sus lea fápmu lonistit.

Sál 130: 1–5, 7

## DAHJE

Hearrá, don suokkardat mu

ja dovddat mu.

Čohkkážanba vai čuččožan, de don diedát dan,  
don árvidat mu jurdagiid guhkkín juo.

Vácežanba vai veallážan, de don oainnát dan,  
don dovddat buot mu geainnuid.

Dasgo don leat sivdnidan mu monemuččaid,  
don goddet mu eatniheakka siste.

Mun giittán du go lean sivdniduvvon ovddolaš láhkái.

Ovddolaččat leat du dagut, mu siellu diehtá dan sakka bures.

Mu dávttit eai lean čihkkojuvvon du ovddas  
go mun sivdniduvvojin čiegunvuodas,  
go mun duddjojuvvojin eatnama čieŋalvuodas.

Don oidnet mu juo dalle go ledjen ohki,  
du girjái ledje juo čállojuvvon buot mu beaivvit  
ovdal go oktage dain lei boahtán.

Ipmil, man mávssolaččat du jurdagat leat munnje,  
man eatnat lea daid lohku!

Juos lohkgoadášin daid,  
de dat leat lohkameahttumat dego sáddot,  
ja go gearggašin, de livččen ain du luhtte.

Sál 139: 1–3, 13–18

### [Uhca gudni]

Gudni Áhččái ja Bárdnái  
ja Bassi Vuignii,  
nugo lei álggus, dál lea ja álo  
agálašvuodas agálašvuhtii. Ámen.

### Antifona geardduhuvvo.

## 6. Rohkos

---

Ávžžuhusa maŋŋá sáhtá leat oanehis jaskes rohkos.

### **B** Rohkadallot.

#### 1. Buotveagalaš Ipmil, almmálaš Áhčči.

Don leat Bárdnát gillámušaiguin  
ja su ávvudahtti bajásčuožžilemiin  
rahpan midjiide geainnu agálaš eallimii.

Veahket min oppa váimmusteamet dorvvastit Kristusii.

Mii rámidit du dál ja oktii du luhtte šearratvuodas.

Gula min Jesusa Kristusa, min Hearrámet dihtii,  
guhte duinna ja Bassi Vuoiŋgain  
eallá ja rádde agálaččat.

2. Ipmil, Áhččámet.

Jálosmahte min moraštit,  
go lea áigi moraštit ja čierrut.  
Várjal min morrašis jurddašeames  
dušše jápmima seavdnjatvuoda,  
veahket min baicce muitit agálaš eallima šearratvuoda.  
Oahpat min dorvvastit Bárdnásat Jesusii Kristusii,  
guhte lea vuoitán jápmima válldi.  
Jedde min  
ja veahket min deaividit ihttáš beaivvi  
luohttevaš ja dorvvolaš mielain.  
Gula min Jesusa Kristusa,  
min Hearrámet dihtii.

3. Kristus, Beastámet.

Don dovddat min átestusa,  
go jápmin bohtá min guossin.  
Don diedát, man váttis lea luohpat olbmos,  
guhte leamaš lagaš ja ráhkis.  
Mii addit NN du hálldui.  
Jedde min morrašis.  
Gula min, don bajásčuožžilan Hearrámet.

4. Árpmu ja ládisvuoda Ipmil.

Atte dán eallimis vuolgán oabbáseamet/vielljaseamet NN:i agálaš  
vuoiŋgadusa.  
Čuvge šearratvuodainat su maŋimuš mátkki  
ja divtte min odne doallat rávvejaččaid su muitun boahhtevaš eallima  
doaivvus.  
Guddoset du bassi engelat su ávdugasaid searvá.  
Ožžos son ráfi du luhtte paradiissas.

Divtte Bárnát gillámušaid ja ovddasrohkosiid leat su dorvun.  
Gula min Jesusa Kristusa, ráhkis Bárnát dihtii.

**S** Ámen.

## II Sátne

---

### 7. Biiballohkan ja sárdne

---

#### MOLSSAEAKTU A

##### Čálabihtát

Lohkkojuvvo okta dahje moadde čuovvovaš čálabihtáin. Sáhtá atnit maidái girkojagi čuovvu dahje eará čálabihtáid.

Lohkki almmuha čálasaji.

Biiballohkamii lea vejolaš laktit vástádusa (biibbalsálbma, sálbma, lávlla, čuojanas-musihka dahje jaskes mediteren).

Rom 8: 18–21

Mun diedán ahte dat maid mii dáppe šaddat gillát, ii leat mihkkege dan hearvásvuoda ektui mii oktii almmustuvvá midjiide. Buot sivdnádus vuordá áibbašemiin Ipmila mánáid almmustuvvat. Dasgo sivdnádus lea biddjojuvvon nohkavašvuoda vuollái, ii iežas dáhtu mielde, muhto su dáhtu mielde guhte lei dan vuolidan. Muhto doaivva goit lea ahte maidái sivdnádus čovdojuvvo nohkavašvuoda šlávavuodas ja olle dan friddjavuhtii man Ipmila mánát ožžot hearvásvuodas.

Rom 8: 24–27

Dán doaivaga mielde mii leat bestojuvvon. Muhto doaivva man oaidná juo ollašuvvan, ii leat šat doaivva. Mo sáhtá oktage doaivut dan man oaidná? Juos mii doaivut dan man eat oainne, de mii vuordit dan gierdavaččat. Seammá láhkái Vuoignage veahkeha min min headjuvuodas. Dasgo mii eat dieđe mo galggašeimmet rohkadallat, muhto Vuoigna ieš rohkadallá min ovddas cealkemeahtun šuohkáhusaiguin.

Ja Ipmil guhte suokkarda váimmuid, diehtá maid Vuoigna hálida, dasgo Vuoigna rohkadallá bassi olbmuid ovddas Ipmila dáhtu mielde.

Rom 8: 31–35, 37–39

Maid mii dása cealkit? Juos Ipmil lea min beale, gii dalle lea min vuostái? Son guhte ii seastán Bártnis, muhto attii su min buohkaid ovddas, manne son dalle ii galggaše addit midjiide buot earáge oktan suinna? Gii sáhtta váidalit sin geaid Ipmil lea välljen? Ii oktage, go Ipmil lea dat guhte cealká sin vanhurskkisin. Gii sáhtta dubmet sin? Ii oktage, go Kristus Jesus lea dat guhte jámii ja velá bajásčuoččál-dahttojuvvui ja čohkká Ipmila olgeš gieda bealde ja rohkadallá min ovddas. Gii dalle sáhtta earuhit min Kristusa ráhkisvuodas? Sáhttago átestus, ballu, doarrádallojupmi, nealgi, álásvuohta, hehti dahje miehkki?

Muhto buot dáid átestusaid badjel son addá midjiide vuoittu, son guhte ráhkistii min. Dasgo mun lean vissis das ahte ii jápmin iige eallin, eai engelat eaige eará oaivámuččat, eai dat mat leat dál eaige dat mat bohtet, dahje miige fámuid, eai dat mat leat badjin eaige dat mat leat čiekŋalassas, sáhte earuhit min Ipmila ráhkisvuodas Kristus Jesusis, Hearrásteamet.

1 Kor 15: 53–57

Dasgo dat mii lea nohkavaš, ferte gárvvohuvvot nohkameahttunvuodain, ja dat mii lea jámolaš, ferte gárvvohuvvot jápmemeahttunvuodain. Ja go dat mii lea nohkavaš, lea gárvvohuvvon nohkameahttunvuodain, ja dat mii lea jámolaš, lea gárvvohuvvon jápmemeahttunvuodain, dalle ollašuvvá dat sátni mii lea čállojuvvon:

– Jápmin lea njielastuvvon ja vuitojuvvon.

Jápmin, gos lea du seahčagas?

Jápmin, gos lea du vuoitu?



Jápmima seahčagas lea suddu, ja suttu fápmu lea láchka. Muhto giittus lehkos Ipmilii, gii addá midjiide vuoitu Hearrámet Jesusa Kristusa bokte!

2 Kor 5: 1–5

Miihan diehtit ahte juos min eatnanlaš viessu, min goahti, gaikkoduvvoge, de mis lea almmis viessu mii bohtá Ipmilis, agálaš viessu, mii ii leat huksejuvvon giedaiguin. Dáppe ealedettiinamet mii šuohkit ja áibbašit gárvvohuvvot almmálaš viesuineamet. Dasgo go mii leat gárvvohuvvon dainna, de eat leat šat álás. Nu guhká go mii ássat dan goadis, mii šuohkkit váivvisteamet. Eat mii dáhto nuolahuvvot, muhto baicca gárvvohuvvot vai eallin njielašii dan mii lea jámolaš. Aiddo dán várás Ipmil lea gárvvistan min ja dáhkádussan son lea addán midjiide Vuoiŋŋa.

1 Tess 4: 13–18

Oskuguoimmit, mii dáhtošeimmet din diehtit mii dáhpáhuvvá sidjiide geat leat oaddán jápmimii, amadet moraštit nugo dat geat leat almmá doavagahaga. Juos mii oskut ahte Jesus lea jápmán ja bajásčuožžilan, de mii maiddái oskut ahte Ipmil oktan suinna doalvu eallimii sin geat leat oaddán jápmimii. Dán mii cealkit didjiide Hearrá sátnin: Mii geat dál leat eallimin ja báhcit dassáži go Hearrá bohtá, eat eisege boade sin ovdal geat leat oaddán jápmimii. Dasgo go gohččun čuodjá, ja váldeoŋgela jietna gullo ja Ipmila báson skádjá, dalle Hearrá ieš njiedjá almmis ja vuosttažin bajásčuožžilit sii geat leat jápmán Kristusis. Oktan singuin rohttašuvvat dalle balvvaid sisa mii gudet leat eallimin ja leat báhcán, vai deaivvadit Hearráin áimmus. Dalle mii oazžut álelassii leat Hearrá luhtte.

1 Biet 1: 3–7

Máidnojuvvon lehkos Ipmil, Hearrámet Jesusa Kristusa Áhčči! Storra váibmoládisvuodastis son lea riegadahtán min oddasis ja addán midjiide ealli doavvu go bajásčuoččáldahtii Jesusa Kristusa jábmiid

luhtte. Nu mii oažžut nohkameahtun, duolvatmeahtun ja goldnameahtun árbbi mii lea vurkejuvvon albmái din várás geaid Ipmila fápmu bisuha oskkus, vai dii oččošeiddet bestojumi mii lea juo gárvvis almmustuvvat mañimuš áiggi.

Ávvudehket dan dihtii, vaikko dii dál oanehis áiggi šaddabehtet gillát máŋgalágán geahččalusaid vai din osku geahččaluvvošii. Velá nohkavaš gollige geahččaluvvo dolas, ja din osku mii lea sakka mávssoleabbo, ferte maiddá geahččaluvvot, vai dat šattašii máidnojupmin ja hearvásvuhtan ja gudnin go Jesus Kristus almmustuvvá.

Alm 7: 9–10, 13–17

Oainnáhusastan mun oidnen joavkku mii lei nu stuoris ahte ii oktage sáhttán lohkat dan, buot álbmogiin ja čearddain ja buot sogain, ja sii sárdno buot máilmmi gielaid. Sii čužžo truvnnu ja Lábbá ovddas, vilges biktasat badjelis ja pálbmaoavssit giedas. Ja sii čurvo alla jienain:

– Bestojupmi boahdá min Ipmilis  
gii čohkká truvnnus,  
ja Lábbás.

De muhtun vuorrasiin jearai mus: ”Geat leat dát vilgesbivttasolbmot, ja gos sii bohtet?” Mun vástidin: ”Hearrá, don diedát dan.” Ja son celkkii munnje:

– ”Dát leat sii geat leat beassan stuora átestusas,  
ja geat leat bassan biktasiiddiset  
ja vilggodahtán daid Lábbá varas.

Danne sii čužžot dál Ipmila truvnnu ovddas  
ja bálvalit su ijjatbeaivvi su tempelis,  
ja son guhte čohkká truvnnus,  
cegge goadis sin badjelii.

Eai sii nealggio šat eaige goikka,  
ii beaivváš iige goardi báhkka givssit sin.

Dasgo Láppis, guhte čuožžu truvnnu ovddas,  
lea sin báimman

ja láide sin calli čázi ádjagiidda,  
ja Ipmil sihku eret juohke gatnjala sin čalmmiin.”

Luk 1: 78–79

Min Ipmil lea árbmugas ja váibmoládis.  
Son oahppaladdá min allagasas dego beaivváža badjáneapme,  
báitin dihtii sidjiide geat orrot seavdnjadasas ja jápmima suoivanis,  
ja láiden dihtii min julggiid ráfi geidnui.

Luk 2: 29–31

– Hecrrá, dál divttát bálvaleddját vuolgit dáppe ráfis,  
nugo don leat cealkán.  
Dasgo mu čalmmit leat oaidnán du bestojumi  
man don leat ráhkadan buot álbmogiid oidnosis,

Joh 5: 24–29

Jesus cealká:

”Duodaid, duodaid, mun cealkkán didjiide: Dat guhte gullá mu sáni ja osku sutnje gii lea vuolggahan mu, sus lea agálaš eallin; son ii boade dupmui, muhto lea juo mannan jápmimis eallimii. Duodaid, duodaid, mun cealkkán didjiide: Bohtá áigi, ja dat lea dál juo, go jábmit gullet Ipmila Bártne jiena, ja sii geat gullet, ožžot eallit. Dasgo nugo Áhčis lea iešalddes eallin, de son lea maiddá suovvan Bárdnáige ahte sus lea iešalddes eallin. Áhčči lea addán sutnje dubmenválldi, dannego son lea Olbmobárdni. Allet imaštala dan, dasgo dat áigi bohtá go buohkat geat leat hávddiin, gullet su jiena ja sii bohtet olggos. Sii geat leat dahkan buriid, bajásčuožžilit eallimii, muhto sii geat leat dahkan baháid, bajásčuožžilit dupmui.”

Joh 6: 37–40

Jesus cealká:

”Buohkat geaid Áhčči addá munnje, bohtet mu lusa, ja dat gii bohtá mu lusa, su in eisege áje eret. Dasgo mun in leat bohtán vuolás

almmis dahkat dan maid ieš dáhtun, muhto su dáhtu, gii lea vuolggahan mu. Ja dát lea mu vuolggaheaddji dáhttu, ahte mun in masse ovttage sis geaid son lea addán munnje, muhto bajásčuoččáldahtán sin mañimuš beaivvi. Dasgo dát lea Áhččán dáhttu, ahte juohkehaš guhte oaidná Bártni ja osku sutnje, oažžu agálaš eallima, ja mun bajásčuoččáldahtán su mañimuš beaivvi.”

Joh 11: 21–26

Mártá dajai Jesusii:

”Herrá, juos don livččet leamaš dás, de mu viellja ii livčče jápmán. Muhto dálge diedán ahte maid ihkinassii don ánut Ipmilis, dan son addá dutnje.” Jesus celkkii sutnje: ”Du viellja bajásčuožžila.” Mártá vástidii: ”Mun diedán ahte son lihkká bajásčuožžileames mañimuš beaivvi.” Jesus cealká sutnje: ”Mun lean bajásčuožžileapme ja eallin; dat guhte osku munnje, oažžu eallit vaikko vel jápmáge. Ii oktage guhte eallá ja osku munnje, jáme agálašvuodasge.”

Joh 14: 1–6

Jesus cealká:

”Alloset din váimmut suorganehko. Oskot Ipmilii ja oskot munnje! Mu Áhččán viesus leat ollu lanjat. Juos nu ii livčče, de mun cealkkášin didjiide dan. Dasgo mun manan gárvvistit didjiide saji. Ja go mun lean mannan ja lean gárvvistan didjiide saji, de boadán fas ja válddán din lusan, vai dii livččiidet doppe gos mun lean. Ja dii diehtibehtet gainnu dohko gosa mun manan.” Duomás dadjá sutnje: ”Herrá, eat mii dieđe gosa don manažat. Mo mii de sáhttit diehtit gainnu?” Jesus cealká: ”Mun lean geaidnu, duohtavuohhta ja eallin. Ii oktage beasa Áhči lusa caret mu bokte.”

Máná vitkkadettiin.

Mark 10: 13–16

Sii gudde uhca mánážiid Jesusa lusa vai son guoskkahivččii daid, muhto máhttájeaddjit šiggo sin. Go Jesus oinnii dan, de moaráhuvai ja

celkkii sidjiide: ”Diktet uhca mánážiid boahit mu lusa, alletge hehte sin! Dasgo Ipmila riika gullá dakkáraččaide. Duodaid, mun cealkkán didjiide: Dat guhte ii vuostáiváldde Ipmila riikka nugo uhca mánáš, ii eisege beasa dan sisa.” Ja son válddii sin sallasis, bijai giedaidis sin ala ja buressivdnidii sin.

## Sárdni

Báhppa doallá friddja sártni dahje geavaha čuovvovaš molssaeavttuid. Sártnis sáhtta giedahallat čuovvovaš fáttáid:

- morraša deaivideapme
- oamehasa eallinmuttuid ovdanbuktin
- eallima nohkavašvuolta
- ráhkkaneapme jápmimii
- kristtalačča doaivu
- bajásčuožžileapme ja agálaš eallin
- gástta muitin
- Kristus jápmima válddi vuoitin

Buorit oapmahaččat. Din lea deaividan moraš, go dii lehpet massán lagaš olbmo. Mii leat dál čoahkkanan mieduštít su hávdái. Mii smiehtadit su ja su eallima. Mii muitit buot dan buori ja dorvvolačča, maid mii sus ja su bokte leat ožžon. Giitevašvuolta ja gudnejahttin deavdá min váimmu.

Mii leat Ipmila muođuid ovddas. Son sárdnu midjiide sánistis. Mii lahkoniit su rohkosiiguin. Mii guoddit eretfárren oamehasa ja din, moraš-teaddji oapmahaččat, Ipmila oskálíi. Mii rohkadallat sus veahki morrašii ja dorvvastit bajásčuožžilan Jesusii Kristusii, guhte lea vuoitán jápmima.

Jápmín gullá olbmo eallimii. Odda eallima riegádeapme ja jápmín johtet báldalagaid dán máilmmis. Oppa luondduriika lea nohkavaš. Juohkeokta mis galgá oktii vuolgit eret dáppe. Jápmín lea loahpalaš ja dovdameahttun, ja danin mii dovdat balu, go mii jurddašit dan. Jápmín rivve eret min lahka eallán olbmo. Mii eat beasa šat gullat su jiena, ságastit suinna, eatge oaidnit su čalmmiid čuovgga. Mii eat sáhte šat čájehit sutnje ráhkisvuoda ja fuollaatnima. Jápmín lea botken buot lagamusge čatnasiid.

Jápmima ovddas mii áddet, ahte mii galggašeimmet leat gárvát vuolgit. Ipmila sártni ávžžuha min bidjat dorvomet ja doivomet Jesusii Kristusii.

Son lea soabahan min sudduid jápmimiinnis. Ipmil lea boktán su jápmimis ja gárvvistan midjiide su bokte nohkameahttun eallima. Jesus cealká: ”Mun lean bajásčuožžileapme ja eallin. Guhte osku munnje, oažžu eallit, vaikko jápmáge.” (Joh 11: 25)

## DAHJE

Ráhkis ustibat. Mii leat čoagganan mieđuštit didjiide lagaš olbmo. Mii vásihit bahččagit, ahte nohkavašvuohta lea oassi min eallima vuorbis. Dan bieggá bosoda min badjel. Dii oapmahaččat dovdabehtet, mo moraš lea šaddan duohtan din buohta. Dii lehpēt gártan luohpat ráhkis olbmos. Jápmim lea loahpalaš, ja dan fápmu lea gievrrat go mii. Muhto Ipmil vuotá jápmimage. Mii rohkadallat, vai Ipmil boadášii din eallimii morrašis ja attášii fámu boahhte áigge beivviide ja oppa eallimii. Su veahkki boahotá lahka maid dain olbmui, geaiguin dii oažžubehtet juohkit morraša ja áibbašeamme.

Jápmima duohtavuohta boahotá ovdan maiddáii Biibbala sániin. Dain veardiduvvo min eallin niegadeapmái, eanu rávdnjái, rahtá ja rásáža čábbodahkii ja raššivuhtii. Ná ihtá oidnosii áigi, mii lea midjiide addojuvvon ja mii váldojuvvo mis eret. Min beaivvit ja jagit addet midjiide buot eallima vejolašvuođaid. Ipmil lea addán áiggi min atnui – ii dušše min iežamet várás, muhto maiddáii guhtet guoibmámet várás. Áiggi árvvu mii eallit duohtan barggus, ruovttus, ovttas ráhkkásiiguin orodettiin ja lagamučča bálvaleames. Áiggi áidnalunddot árvvu mii oaidnit agálašvuoda duogáža vuostá. Mii giitit Ipmila buot dan buoris, maid NN lea addán midjiide eallimiinnis.

Juohkeokta mis johtá oktii iežas geainnu geahčái. Ipmil ávžžuha min sánistis smiehtadit maiddáii iežamet jápmima ja agálašvuoda. Jápmimbottu mii eat dieđe, dávjá dat boahotá vuorddekeahttá. Mas mii doallat gitta, go olmmošlaš doarjagat jávket ja mii galgat ollásit luohpat dán eallimis? Ipmilis ja su árpmus lea nana dorvu nu eallimis go jápmimis. Beastámet Kristus lea eallán maiddáii olbmo oasi buotlágan bákčasiiguin. Min sudduid soabaheaddjin son jámii ruossas min buohkaid ovddas. Bajásčuožžilemiin son vuittii jápmima fámu. Son oadjuda: ”Mun lean bajásčuožžileapme ja

eallin. Guhte osku munnje, oažžu callit, vaikko jápmáge.” Kristusa searve-  
gottis sárdniduvvo midjiide dán ráhkisvuodas ja árpmus. Go mii oskut  
Jesusii ja suttuid ándagassiiaddimii, mii oažžut orrut dorvvolaš mielain.  
Son lea geaidnu jápmima suoivaniid leagis agálaš eallimii.

Mii mieduštuvvot vuoruid mielde eret dáppe. Biellut čudjet min muitun, ja  
hávdi salasta min. Osku Kristusii lea canet go maid mii dáppe oaidnit.  
Bajásčuožžileame doaivu rahpá várddu dan šearratvuhtii, gos ii leat  
buohcuvuohta, gillámuš iige jápmin. Dán bajásčuožžileame Kristusa  
searvegoddi vuordá. Oktii ollašuvvá dat doaivu, mas čállojuvvo Job girjjis  
ná: ”Mun diedán, ahte lonisteaddján eallá. Son cealká mañimuš sáni  
eatnan alde.” (Job 19: 25)

## **MOLSSAEAKTU Á**

### **Biibbalmediteren**

lešguđege oasis välljejuvvo okta dahje moadde biibbaldeavstta. Sárdni ja čálabihtaid  
lohkan bohtet vurrolagaid. Biibballohkamii sáhtta laktit vástádusa (biibbalsálbma, sálbma,  
lávlla, čuojanasmusihkka dahje jaskes mediteren).

### **Nohkavaš eallin**

**○** Guldalehkot Ipmila sáni eallima nohkavašvuodas.

Job 14: 1–2, 5

Sár 3: 1–8

Sár 12: 7

Jes 38: 12

Jes 40: 6–8

Hebr 13: 14

Iihan mis leat dáppe bissovaš gávpot, muhto mii vuordit ja áibbašit dan  
gávpogii mii bohtá.

### **Ráhkkaneapme jápmimii**

**○** Guldaleadnot Ipmila sáni jápmimii ráhkkaneame birra.

Sál 90: 12

Oahpat min lohkat beivviideamet,  
de mii oažžut viissisvuoda váibmui.

Sál 139: 23–24

Suokkar mu, Ipmil,  
ja dovdda mu váimmu,  
geahččal mu  
ja dovdda mu ráfehís jurdagiid.  
Geahča leango mun bahá geainnu alde,  
ja láide mu agálašvuoda geainnu mielde.

Mark 13: 35–37

Jesus cealká:

”Gohcet de! Dasgo dii ehpet diede goas dáluisit boahtá, šaddágo eahkedis, gaskaija, vuoncávarrása biškunáiggi dahje idedis. Gohcet, amas son boahtit fáhkkestaga ja gávdnat din oaddimin. Dan maid mun cealkkán didjiide, dan cealkkán buohkaide: Gohcet!”

Alm 2: 10

Kristus cealká:

”Leage oskkáldas gitta jápmima rádjái, de mun attán dutnje eallima kruvnnu.”

Alm 3: 11

Kristus cealká:

”Mun boadán fargga. Doala gitta das mii dus lea, amas oktage váldit du vuoittu kruvnnu!”

## Kristtalačča doaivu

- Guldalehkot Ipmila sáni kristtalačča doaivvu birra.



Sál 62: 2–3, 6–8

Aivvefal Ipmila luhtte gávdná mu siellu ráfi,  
sus bohtá mu bestojupmi.

Aivvefal son lea mu bákti ja mu bestojupmi,  
mu ladni, in mun suoibbo.

Leage jaskat, sillon, Ipmila ovddas.

Aivvefal sus bohtá mu doaivu.

Aivvefal son lea mu bákti ja mu bestojupmi,  
mu ladni, in mun suoibbo.

Mu bestojupmi ja mu gudni lea Ipmila luhtte.

Son lea mu nana bákti,

son lea mu dorvu.

Sál 68: 21

Ipmil lea midjiide bestojumi Ipmil,  
Hearrás leat geainnut jápmimis eret.

Sál 73: 23–26

Mun bisun álo du luhtte,

don leat dohppen mu olgeš gihtii.

Don láidet mu rádiinat,

ja dasto bajidat mu gudnái.

Juos mus leat don almmis,

de mun in sáva šat maidege eatnama alde.

Juos mu oažži ja váibmu vuoimmehuvvá,

de Ipmil lea agálaččat mu váimmu bákti ja mu oassi.

Matt 6: 20–21

Jesus cealká:

”Čohkkejehket alcceseattet dávviriid albmái, gos ii muohcu iige ruosta bilit eaige suollagat gaikko viesuid ja suolát. Dasgo gos du dávvir lea, doppe lea du váibmuge.”

Joh 6: 68–69

Herrá, gean lusa mii manašeimmet? Dus leat agálaš eallima sánit, ja mii oskut ja diehtit ahte don leat Ipmila Bassi.

Rom 6: 23

Dasgo suttu bálká lea jápmin, muhto Ipmila árpmuattáldat lea agálaš eallin Kristusis Jesusis, min Herrás.

Hebr 10: 19–20

Oskuguoimmit, mis lea nappo roahkkatvuohta Jesusa vara bokte loaidastit buot basimussii. Son lea rahpan midjiide odđa, calli geainnu mii manná ovdaloavdaga čada, mii lea su rumaš.

Hebr 10: 35–36

Allet nappo bálkes eret roahkkatvuodadet, dasgo dat oážžu stuora bálkká. Dii dárbbášepet stuora gierdavašvuoda, vai sáhtášeiddet ollašuttit Ipmila dáhtu ja oážžut dan mii lea lohpiduvvon didjiide.

1 Joh 4: 9–10

Nu lea Ipmila ráhkisvuohta almmustuvvan min gaskii ahte son vuolggahii áidnorigádan Bártnis máilbmái vai mii ealášeimmet su bokte. Ráhkisvuohta ii leat dat ahte mii leat ráhkistan Ipmila, muhto ahte son lea ráhkistan min ja vuolggahan Bártnis min suttuid soabahussan.

## Agálaš eallin

- Guldalehkot Ipmila sáni agálaš eallima birra.

Sál 16: 5–11

Herrá, don leat mu árbeoassi ja mu cearki,  
don mearridat mu vuorbbi.

Mun ožžon iežan oasi čappa eatnamis,  
duodaid, hearvás árbbi lean ožžon.

Mun máinnun Herrá guhte rávve mu,

velá ihkkuge gulan su rávvagiid váimmustan.  
Álo mun anán Hearrá muittus,  
go son lea mu olgeš bealde,  
de mun in goassege suoibbo.  
Danne mu váibmu illuda ja mu siellu ávvuda;  
velá mu rumašge lea oadjebas.  
Don it guode mu sielu jábmiid áibmui,  
don it divtte oskkáldas bálvaleaddját  
oaidnit iežas hávddi.  
Don válddahalat munnje eallima geainnu,  
du muođuid ovddas lea ilu dievasvuohta,  
agálaš ávvu du olgeš gieda bealde.

Jes 65: 17–18

Joh 3: 16–17

Jesus cealká:

”Dasgo nu lea Ipmil ráhkistan máilmmi ahte son attii áidnoriegádan Bártnis, amas oktage guhte osku sutnje mannat gádohussii, muhto vai son oažžu agálaš eallima. Ipmil ii leat vuolggahan Bártnis máilbmái dubmet dan, muhto vai máilbmi bestojuvvošii su bokte.

Joh 6: 44–47

Jesus cealká:

”Ii oktage sáhte boahit mu lusa muđuid go ahte Áhčči, guhte lea vuolggahan mu, geassá su; ja mun bajásčuoččáldahtán su maŋimuš beaivvi. Profehtaid čállagiidda lea čállojuvvon: ’Sii buohkat šaddet Ipmila máhttájeaddjin.’ Juohkehaš guhte guldala Áhči ja oahppá sus, bohtá mu lusa. Ii oktage leat duodaid oaidnán áhči, caret su guhte bohtá Ipmila luhtte; son lea oaidnán Áhči. Duodaid, duodaid, mun cealkkán didjiide: Dat guhte osku, sus lea agálaš eallin.”

Rom 14: 7–9

Ii oktage mis eale iežas várás, iige oktage jáme iežas várás. Juos mii callit, de callit Hearrá várás, ja juos mii jápmit, de jápmit Hearrá várás. Juogo mii dal eležat dahje jámežat, de mii gullat Hearrái. Aiddo dan dihtii Kristus jámii ja eallái fas, vai son sáhtášii leat sihke jábmiid ja elliid Hearrá.

2 Kor 4: 16–18

Danne mii eat arvvahuva. Vaikko velá min olgguldas olmmoš billistuvvoge, de min siskkildas olmmoš odasmahttojuvvo almmatge beaivvis beaivái. Dat átestusat maid mii dál fertet guoddit, leat geahppasat, ja buktet midjiide agálaš hearvásvuoda valljugas riggodaga. Ii mis leat čalmmiid ovddas dat mii lea oinnolaš, muhto dat mii lea oaidnemeahtun. Dasgo dat mii lea oinnolaš, bistá muhtun áiggi, muhto dat mii lea oaidnemeahtun, bistá agálaččat.

2 Tim 4: 7–8

Mun lean soahtan buori soadi, ollašuhttán mátkán ja sealluhan oskon. Dál mu vuordá vanhurskkisvuoda vuoitokruvdnu, man Hearrá, vanhurskkis duopmár, addá munnje dan beaivvi, ii duššefal munnje, muhto sidjiide buohkaide geat áibbašit su boahtima.

Hebr 4: 9–11

Ipmila álbmogis lea nappo ain vuordagis sábbátvuoijnadus. Dat guhte lea beassan su vuoijnadussii, oažžu vuoijnastit buot daguinis nugo Ipmilge vuoijnastii. Viggot miige beassat dan vuoijnadussii.

Alm 14: 13

Mun gullen dál almmis jiena mii celkkii: ”Čále: Ávdugasat dat jábmit geat dás duohko jápmet Hearrá oapmin. Vuoigna cealká: Ávdugasat sii leat. Sii besset vuoijnastit rahčamušaineaset, dasgo sin dagut čuvvot sin.”

# III Vitkan

---

## \*8. Oskkudovddastus

---

Oskkudovddastus lohkkovuo ovttá jittii.

**S** Mun oskkun Ipmilii, Áhččái, Buotveagalažžii,  
almmi ja eatnama Sivdnideaddjái,  
ja Jesusii Kristusii,  
Ipmila áidnoriegádan Bárdnái, min Hearrái,  
guhte sahkanii Bassi Vuoinŋas,  
riegádii nieida Márjjás,  
gillái Pontius Pilatusa áigge,  
russiinávlejuvvui, jámii ja hávdáduvvui,  
manai vuolás jábmiid riikii,  
bajásčuožžilii jábmiid luhtte goalmmát beaivve,  
manai bajás albmái,  
čohkká Ipmila, buotveagalaš Áhči, olgeš gieda bealde,  
ja bohtá fas doppe dubmet calliid ja jábmiid,  
ja Bassi Vuignii,  
bassi oktasaš girku,  
bassi olbmuid searvivuoda,  
suttuid ándagassii addojumi,  
oačči bajásčuožžileame  
ja agálaš callima.

## \*9. Vitkansánit

---

Vitkansániid sáhtta cealkit hávddi alde (čuokkis 16).

**B** Oskkus bajásčuožžilan Jesusii Kristusii mii čuožžilit vitkat (mii vitkat)  
NN (oppa namma).

## DAHJE

**B** Oskkus golbmaoktalaš Ipmilii mii vitkat NN (oppa namma) vuordit bajásčuožžileame beaivvi.

Searvegoddi čuožžu.

Báhppa goivesta golbmii sáddo gisttu ala (sádduin sáhtá dahkat ruossamearkka) ja cealká:

NN (ovdanamat),

Muolda don leat.

Ja muoldan don fas šattat.

Jesus Kristus, Beastámet, boktá du maŋimuš beaivve.

## DAHJE

NN (ovdanamat),

eatnamis don leat boahtán.

Eanan don fas galggat šaddat.

Jesus Kristus, Beastámet, boktá du maŋimuš beaivve.

## DAHJE

NN (ovdanamat),

Hearrá attii,

Hearrá válddii.

Giitojuvvon lehkos Hearrá namma.

Jesus Kristus, Beastámet, boktá du maŋimuš beaivve.

## DAHJE

Nohkavašvuodas gilvojuvvo.

Nohkameahttunvuodas boktojuvvo.

Jesus Kristus lea bajásčuožžileapme ja callin.

## DAHJE

Jápmin riegádan dahje uhca mánáža vitkkadettiin.

NN (ovdanamat),

Ipmil, Áhččámet, lea du sivdnidan.

Don oaččut vuoiŋgadit su salas.

Jesus, Beastámet, boktá du maŋimuš beaivve.

## 10. Sálbma

---

Sálmma sajis sáhtta leat eará heivvolaš musihkka.

## 11. Rohkos

---

Sáhtta atnit maiddái hávdádanmeassu rohkosiid (čuokkis 16). Rohkosa sáhtta ráhkadit ovttas oapmahaččaiguin.

**B/O** Rohkadallot.

1. Bassi Ipmil. Don diktet áidna Bártnát gillát ruossajápmima min ovddas. Su hávdáдемиин don basuhit min hávddi vuoiŋnadansadjin. Su bajás-čuožžilemiin don duššadit jápmima ja rahpet geainnu agálaš eallimii. Du giedaid oskálíi mii guoddit ráhkkáseamet NN.

Herrá, min iežamet mátki lea ain gaskan, mii dárbbášit fámu máŋgga bargui. Danin mii bivdit: Veahket min gávdnat calli oktavuoda Kristusiin. Jávkat baluideamet ja sivalašvuohtamet. Doarjjo ja jedde min morrašis. Atte midjiide áiggi ja fámu dikšut min morraša. Roahkasmahte min eallit luohhtevaš mielain ja buriin oamedovdduin. Veahket, amamet mii láhppit agálaš mihttomeari árgga fuolaid gasku.

Ipmil, atte midjiide beassážiid ilu ja bajásčuožžileame doaivvu. Gula min rohkosa Jesusa Kristusa, min Hearrámet dihtii.

2. Buotveagalaš Ipmil, don jápmima vuoti. Don leat diktán ráhkis Bártnát Jesusa Kristusa min dihtii russiinávlejuvvot ja leat boktán su jápmimis, nu ahte mii oččošeimmet odda eallima. Mii rohkadallat du: Jorgal muoduidat min guvlui. Muittut min das, ahte mis ii leat dáppe bissovaš orrunsadji. Oro lahka morašteaddjiid ja jedde sin ohcalettiin ráhkkáseaset. Doarjjo sin ja raba sidjiide doaivvu várddobáikkiid. Veahket min dorvvastit du árbmui ja eallit du dáhtu mielde, nu ahte mii oktii oažžut ovttas buot oskkolaččaiguin bajásčuožžilit agálaš eallimii. Bártnát Jesusa Kristusa, Hearrámet dihtii.
3. Ipmil, Áhččámet. Skenke NN:i agálaš ráfát ráhkis Bártnát Jesusa Kristusa dihtii. Divtte agálaš čuovggat čuovgat sutnje. Leage sutnje árbmugas ja atte sutnje agálaš eallima. Oskkáldas Herrá ja Beasti, don

leat lonistan su bassi ja divrras varainat. Doalvvo su sisa Ipmila šearratvuhtii ja du bassi olbmuid searváí namat dihtii. Árpmit maiddáí min ja láide eallima geainnu alde, vai min mátki nogašii bures ja mii beasašeimmet vanhurskásiid bajásčuožžileapmái. Dán mii rohkadallat du ráhkisvuoda dihtii.

4. Ládis Ipmil. Don leat luoitán bálvleaddját NN eallima morrašiin ja rahčamiin. Mii giitit du árpmus, maid leat čájehan sutnje ja midjiide. Veahket min atnit áiggi riehta, nu ahte livččiimet gárvát vuolgit dáppe, go don bovdet min. Jedde morašteaddjiid. Oro dorvun gillámušain. Divtte dan beaivvi čuvvgodit, goas buot sivdnádušat besset luovus nohkavašvuoda šlávavuodas Ipmila mánáid friddjavuhtii ja šearratvuhtii. Gula min rohkosiid Jesusa Kristusa, Hearrámet dihtii.
5. Ipmil, don leat ásahan rájiid min eallimii. Okto don diedát, mii lea beivviideamet lohku. Mii giitit du NN eallimis, man don leat sáhtašan lohppii.

Hearrá, don oainnát, ahte áibbašupmi deavdá min miela. Oro min lahka ja su lahka, gean leat gohččon eret dáppe. Doarjjo min lávkkiiid morraša geainnu alde. Atte midjiide luohttámuša dasa, ahte mii oažžut dus veahki ja fámu boahhte áigái.

Bassi Ipmil. Du ráhkisvuolta lea gievrrat go jápmin. Giitu das, ahte don addet Jesusa midjiide Beastin ja sudduid soabaheaddjin. Veahket min dorvvastit ándagassiiaddimii. Atte midjiide dan ráfi, mii manná buot áddejumi badjel. Gidde min váimmu du sátnái. Láide min agálaš eallima geainnu alde. Gula min rohkosiid Jesusa Kristusa, Hearrámet dihtii.

6.  
Ollu gillán oamehasa vitkkadettiin.

Ipmil, almmálaš Áhčči. Don sihkut eret gatnjaliid du omiid čalmmiin. Don dovddat NN eallima ja gillámuša. Atte sutnje agálaš ráfi ja vuoiŋadusa du luhtte. Don dovddat daidge gažaldagaid, mat leat báhcán vástádusahaga. Oahpat min báhcit buot nodiiguin du hálđui ja



guoddit guhtet guoibmámet nodiid. Láide min dan geainnu alde, mii doalvu du lusa almmi šearratvuhtii. Dán mii bivdit Bártnát Jesusa Kristusa, Hearrámet dihtii.

7.

Go jápmin deaivida fáhkkestaga.

Buotveagalaš Ipmil. Mii leat du ovddas losses mielain, eatge ádde, manne ná lea dáhpáhuvvan. Don dovddat min átestusa ja diedát, maid mii dárbbášit. Divtte Beastámet gillámuša, jápmima ja bajásčuožžileame leat min dorvun, doaivun ja jeddehussan. Atte midjiide návccaid NN vuorddekeahces jápmima ovddas. Mii giitit buot dan buoris, maid mii oaččuimet su bokte. Mii guoddit su du háldui ja rohkadallat: Jedde oapmahaččaid sin morrašis. Divtte min gávnnadit guhtet guimmineamet almmis du luhtte. Gula min ráhkis Bártnát Jesusa Kristusa dihtii.

8.

Veahkaválddi oaffara vitkkadettiin.

Ládis Ipmil. Don oainnát min givssi ja morraša. Oro minguin ja dálkkot min bákčasiid. Jedde min Vuoiŋŋainat. Atte midjiide návccaid eallit ja gierdat morraša. Veahket min du ráhkisvuhtii luohhtimiin vuoitit vaši ja addit ándagassii. Giitu, ahte don gulat ja áddet min čuorvaga. Mii dáhttut addit buot givssi, bahčavuoda ja gillámuša ja oppa eallimeamet du háldui. Skenke NN:i agálaš ráfi. Atte midjiide ráfát ja ulbmila min eallimii. Gula min ráhkis Bártnát Jesusa Kristusa dihtii.

9.

lešsoardi vitkkadettiin.

Árbmugas Ipmil. Morraša čienjalvuodas mii rohkadallat du. Oro givssiineamet minguin. Dušše don dovddat NN eallima ja jápmima. Mii guoddit su du árpmu oskálíi. Don diedát, man lossat eallin sáhtta leat. Don dovddat min siskkimuš dovdduid ja jurdagiid. Guotte min

morrašis ja atte midjiide ráfát, mii manná badjel buot áddejumi. Mii dorvvastit Jesusii Kristusii, min Beastái.

10.

Jápmin riegádan máná vitkkadettiin.

Mii eat ádde, manin dát uhca mánáš ii ožžon riegádit eallin. Mii oskut almmatge, ahte son lea du ja du engeliid luhtte dorvvus. Mii luoitit su du áhčálaš sallii ja luohttit Jesusa lonistanbargui. Oro NN ja NN (vánhemiid namat), oppa bearraša, áhkuguovtto ádjáin ja buot oapmahaččaid lahka sin morrašis. Jedde sin, go váttis gažaldagat devdet miela. Atte návccaid boahttevaš beivviide. Gula min Bártnát Jesusa Kristusa dihtii.

11.

Uhca mánáža vitkkadettiin.

Árpmolaš Ipmil. Don oainnát min morraša, beahttášumi ja guorusvuoda dovdduid NN gisttu bálddas. Oro min lahka ja várjal min váimmu ja jurdagiid. Divššo min árpmuinat ja ráhkisvuodainat. Mii giitit du NN eallimis ja buot das, maid son attii midjiide. Oro min luhtte, go mii galgat luohpat dán mánás. Váldde su sallasat ja doalvvo su almmi ruktui. Láide min buohkaid oktii du lusa Jesusa Kristusa, ráhkis Bártnát dihtii.

12.

Máná vitkkadettiin.

Ráhkis almmálaš Áhčči. Moraš deavdá min váimmu NN gisttu bálddas. Don addet su midjiide, don váldet su mis eret. Giitu das, ahte mii oaččuimet doallat máná luhttámet su oanehis eallináiggi. Váldde su dorvui engeliiddát lusa. Oahpat min luohttit dutnje. Oro NN:in ja NN:in (vánhemiid namat) oppa bearraša, áhkuguovtto ádjáin ja buot morašteaddjiid dorvun. Atte sidjiide návccaid gierdat lossa morraša. Láide min buohkaid almmi ruktui Beastámet Jesusa Kristusa bokte.

13.

Nuora vitkkadettiin.

Ipmil, mii eat ádde, manin NN eallin bázii ná oanehažžan. Eallima nohkavašvuohta lea orustahttán min. Gasku morraša mii dáhtut luohttit dutnje ja rohkadallat: oro minguin min ohcalettiin NN. Mii giitit du buot buoris ja čábbodagas, maid mii oaččuimet sus. Mii rámidit du bassi gástta attáldagas, mii giitit árpmustat, mii addá midjiide dorvvu ja guoddá badjel jápmima ráji. Dán doaivvus mii guoddit su du háldui. Mii dorvvastit Jesusii Kristusii, guhte lea bajásčuožžileapme ja eallin.

14.

Boarrása vitkkadettiin.

Ládis Ipmil. Don leat addán NN:i guhkes eallima ja gohččon su eret áiggálaš eallimis. Atte sutnje agálaš vuoigŋadusa. Mii giitit du buot buoris, maid mii oaččuimet su bokte. Oahpat min hukset eallimeamet du sáni oskálui ja oheat dorvvu das ja oheat dan, mii lea buorre, rievttuid ja bistevaš. Veahket min dorvvastit du árbmui ja eallit du dáhtu mielde, nu ahte oktii mii beassat lusat ja beassat gávnnadit min ráhkkásiiguin ja duinna almmi ruovttus. Gula min Bártnát Jesusa Kristusa, min Hearrámet dihtii.

15.

Boarrása vitkkadettiin.

Ipmil, Áhččámet. Don addet NN:i guhkes eallima. Don leat rádjan eret giksan gortni. Váldde su du vuoigŋadussii. Mii giitit das, ahte don leat juogadan sutnje attáldagaidat dán ja boahttevaš eallima várás. Giitu, ahte mii oaččuimet dovdat suinna oktavuoda, mii lea ollán sohka-buolvvaid badjel. Divtte min oahppat das, mii su eallimis lei čáppat ja divrras. Veahket min oskkus ja doaivvus johtit geainnu, mii doalvu agálaš ráfái ja šearratvuhtii. Giitu almmi ruovttus, gos sohka-buolvvat gávnnadit. Gula min Bártnát Jesusa Kristusa, min Hearrámet dihtii.

**S** Ámen.

## 12. Áhččámet

---

Herrá rohkos celkojuvvo ovttá jítne.

**S** Áhččámet, don guhte leat almmis.

Basuhuvvos du namma.

Bohtos du riika.

Šaddos du dáhttu,

mo almmis nu maiddái eatnama alde.

Atte midjiide odne min beaivválaš láibbi.

Ja atte midjiide min suttuid ándagassii,

nugo miige ándagassii addit velggolaččaidasamet.

Alege doalvvo min geahččalussii,

muhto beastte min bahás eret.

Dasgo du lea riika ja fápmu ja gudni agálašvuhtii.

Ámen.

## IV Loahpaheapme

---

### 13. Buressivdnáduš

---

**B** Herrá buressivdnidivččii din ja várjalivččii din.

Herrá čuvgešii muođuidis didjiide

ja livččii didjiide árbmugas.

Herrá jorgalivččii muođuidis din beallái

ja attášii didjiide ráfi.

Áhči ja + Bártne ja Bassi Vuoiŋŋa nammii.

**S** Ámen.

## 14. Loahpahanmusihkka

---

Sálmma sajis sáhtta leat eará heivvolaš musihkka. Dan áigge hávdádeapmái oassálastit sáhttet vázzit gisttu maŋis.

## 15. Rohkos hávddi alde

---

Rohkosa sáhtta lohkat maiddái hávdái luoitima maŋjá.

### **B** Rohkadallot.

1. Buotveagalaš Ipmil, almmálaš Áhčči. Don diktet áidna Bártnát gillát ruossajápmima min ovddas. Son hávdáduvvui, ja ná don basuhit minge hávddi vuoiŋnadansadjin. Mii rohkadallat: Gárvvis Bassi Vuoiŋnainat min váimmu su orrunsadjin, nu ahte son bisošii mis ja mii sus. Divtte min givssi ja váivvi maŋjá beassat ráfái ja bajásčuožžilit maŋimuš beaivve agálaš eallimii. Bártnát Jesusa Kristusa, min Hearrámet bokte.
2. Ráhkis almmálaš Áhčči. Mii addit NN du háldui. Mii luoitit su rupmaša hávddi vuoiŋnadussii vuordit bajásčuožžileame ja odđa sivdnideame idida. Beastámet jámii ja hávdáduvvui, ja ná don basuhit minge hávddi vuoiŋnadansadjin. Don boktet su jápmimis, duššadit jápmima ja rahpet almmi oskkolaččaide.

Jesus Kristus, Beastámet. Du guvlui mii bajidit čalmmiiddeamet. Árpmit min ja atte midjiide calli doaivvu. Doalvvo min bajásčuožžileapmái ja agálaš eallimii.

3. Almmálaš Áhčči, veahket min muitit, ahte Bártnát vuoiŋnadii hávddis. Divtte minge jápmima deaividettiin vuoiŋnadit dorvvolaččat ja vuordit odđa eallima. Válde mis eret balu ja oahpat min luohittit dasa, ahte Jesusa dihtii mii beassat jápmima ja hávddi bokte almmálaš riikasat. Gula min Bártnát Jesusa Kristusa, min Hearrámet dihtii.

### **S** Ámen.

## 16. Hávdái luoitin

---

Gistu luitojuvvo hávdái. Gisttu hávdái luoittedettiin sáhttá lávlut sálmma (omd. 356:4–5 dahje 357).

### Vitkansánit

Báhppa cealká vitkansániid, juos dat eai leačča celkojuvvon juo čuoggá 9 buohta.

Go rásit leat biddjojuvvon hávdái ala, sáhttá lávlut sálmma (omd. 334 dahje 430).

# Hávdemeassu

Hávdemeassu boddii sáhtta cahkkehit beassášgintala.

Vitkansániid (čuokkis 14) sáhtta cealkit hávddi alde.

Go oamehas mieđuštuvvo hávdái mielváziiguin, mielváziid ovddabealde sáhtta gurput mieđušruossa. Mielváccedettiin sáhtta lávlut sálmma.

Hávdádeames čuvvojuvvojit báikkálaš vierut.

## I Álggahus

---

### 1. Álggahansálbma

---

Sálmma sajis lea vejolaš geavahit biibbalsálmma, goarralávлага dahje čuojanasmusihka. Ovdal sálmma sáhtta leat álgočuojaheapme dahje eará musihkka.

### 2. Álgosivdnideapme

---

Buressivdnádusa ja vuorrodearvvahusa lea vejolaš lávlut dahje lohkat.

#### Buressivdnádus

Nuohttaráidu 1



**L** Áh - či ja + Bárt - ni ja Bas-si Vuoiŋ-ŋa nam - mii.



**S** Á - men, á - men, á - men.

#### Vuorrodearvvahus

Nuohttaráidu 1



**L** Hear - rá leh - kos din - guin.



**S** Nu son leh-kos maid-dái du vuoij - ñain.

## DAHJE

### Buessivdnádus

Nuohttaráidu 2



**L** Áh - či ja + Bárt-ni ja Bas - si Vuoij-ña nam-mii.



**S** Á - men, á - men, á - men.

### Vuorrodearvvahus

Nuohttaráidu 2



**L** Hear-rá leh-kos din-guin.



**S** Nu son leh-kos maid-dái du vuoij-ñain.

## 3. Álggahansánit

Báhppa ráhkada álggahansániid ieš dahje geavaha čuovvovaš molssaeavttuid. Sánit jodihit suddovddastussii.

**L** Kristtalaš searvegoddi. NN lea vuolgimin mañimuš mátkái. Mii mieduštít su hávddi vuoijñadussii vuordit bajásčuožžileame. Bassi gásttas son lea čadnojuvvon Kristusa jápmimii ja bajásčuožžileapmái. Kristusa vuitui dorvvastemiin mii guoddit su Ipmila oskálíi. Mii áibbašit su ja luohhtit Ipmila sáni lohpadussii: ”Kristus lea jápmán min ovddas, vai mii oččošeimmet callit ovttas suinna.” (1 Tess 5: 10)



Kristusa soabahanbargu lea áidna dorvu eallima átestusain ja váimmu bákčasiin. Mii oažžut luohhtit dasa ja dovddastit min rihkkumušaid ja healbademiid ja bivdit Ipmilis ándagassii.

## DAHJE

**L** Mii leat čoahkkanan vitkat NN hávdái. Mii guoddit su Ipmila oskálíi. Sus lea sadji maiddái min váimmus. Mii dorvvastit Kristusii, jápmima vuotái, guhte cealká: ”Mun ledjen jápmán, muhto geahča, mun ealán álo ja agálašvuhtii ja mus leat jápmima ja jábmiidriikka čoavdagat.” (Alm 1: 18)

Kristusa soabahanbargu lea áidna dorvu eallima átestusain ja váimmu bákčasiin. Mii oažžut luohhtit dasa ja dovddastit min rihkkumušaid ja healbademiid ja bivdit Ipmilis ándagassii.

## 4. Oktasaš rihpat

---

### Suttudovddastus

Suttudovddastusa sáhtá lohkat ovttá jítne. Dan boddii sáhtá luoitádit čippiid ala. Suttudovddastusa lea vejolaš boaktut searvegotti rohkodajaldagain dahje –lávlagiin, dahje dan gaskkas sáhtá leat jaskes boddu. Suttudovddastusas sáhtá leat maiddái jaskes rohkos, masa lea vejolaš ávžžuhit ovdamearkka dihte: Gula maiddái mu/min jaskes ándagassiiánuma.

Suttudovddastussan lea vejolaš geavahit maiddái sálmma.

Eará suttudovddastusat Ipmilbálvalusaid girjjis.

#### 1. Almmálaš Áhčči.

Mun lean gásttašuvvon du mánnán.

Don leat jodihan mu seavdnjadasas čuovgasii,

beastán mu gádohusas almmi árbbolažžan.

In leat almmatge eallán nugo du mánná galgá.

In leat guldalan du jiena inge jeagadan du dáhtu.

Ipmil, árpmat mu du Bártne Jesusa Kristusa dihtii.

Basa mu buhtisin ja atte buot mu suttuid ándagassii.

2. Mii dovddastit du ovddas, bassi Ipmil,  
ahte mii leat suddudan  
jurdaigiiguin ja sániiguin, daguiguin ja healbademiiguin.  
Muitte min váibmoládisvuodastat  
ja atte midjiide Jesusa Kristusa dihtii ándagassii,  
maid mii leat rihkkon.
3. Čienalvuodas mun čuorvvun dutnje, Hearrá.  
Hearrá, gula mu jiena.  
Jorgal beljiidat gullat mu rohkosa.  
Juos don, Hearrá, anát muittus sudduid,  
Hearrá, guhte dalle ceavzá?  
Muhto du lea árbmu, don attát ándagassii,  
vai mii ballat dus.  
Mun vuorddán du, Hearrá,  
mu siellu vuordá,  
mun vuorddán du sáni.

## Suttubeastin

Suttubeastima ámena sáhhtá lávlut dahje lohkat.

Eará suttubeastimat Ipmilbálvalusaid girjjis.

1. ”Hearrá lea sin lahka,  
geain lea cuovkanan váibmu,  
ja son beastá sin, geain lea nuonddahallan miella.”  
Jesusa Kristusa bálvaleaddjin mun duodaštan dutnje,  
ahte Ipmil addá árpmustis buot du sudduid ándagassii.
2. Buotveagalaš Ipmil addos midjiide ándagassii sudduideamet  
ja láidejehkos min agálaš eallimii.

**S** Ámen.

## 5. Beavvi biibbalsálbma

---

Sáhtta atnit maiddái Hávdái vitkan -minstara biibbalsálmmaid (čuokkis 4) dahje girkojagi čuovvu biibbalsálbma.

Juos álggahansálbma sajis (čuokkis 1) lea geavahuvvon biibbalsálbma, dát čuokkis báhcá eret.

Biibbalsálbma sáhtta lávlut dahje lohkat. Dan álggus ja loahpas sáhtta leat antifona.

Biibbalsálbmii sáhtta laktit Uhca gudni. Dat guđđojuvvo eret 5. fástoáiggi sotnabeavvi rájes.

### Antifona

Hearrá, atte sutnje agálaš vuoinnadusa,  
čuvgejehkos su agálaš čuovga.

#### DAHJE

Job 19: 25

#### DAHJE

Mun vuorddán Hearrá,  
mun vuorddán su sáni.

Sál 130: 5

### Biibbalsálbma

Nugo sarvvis goikaluvvá golgi jogaid maŋŋái,  
nu goikaluvvá mu siellu du maŋŋái, Ipmilan.

Mu siellu goiká Ipmila maŋŋái, ealli Ipmila maŋŋái.

Goas beasan loaiddastit su muoduid ovdii?

Manne don muosehuvat, sillon,  
manne máraidat mu siste?

Vuordde Ipmila! Dasgo velá oktii mun giittán su,  
beastán ja Ipmilan.

Ps. 42: 2–3, 6

### [Uhca gudni]

Gudni Áhččái ja Bárdnái  
ja Bassi Vuignii,

nugo lei álggus, dál lea ja álo  
agálašvuodas agálašvuhtii. Ámen.

Antifona geardduhuvvo.

## 6. Hearrá, árpmít (Kyrie)

---

### MOLSSAEAKTU A

#### Kyrie–lítania

Kyrie–lítania sáhhtá lávlut dahje lohkat.

Eará kyrie–lítaniat ja lítania-nuohtat lpmilbálvalusaid girjjis.

**O** Rohkadallot ráfis Hearrá.

**S** Hearrá, árpmít (min).

**O** Rohkadallot ráfi allagasas  
ja sieluideamet bestojumi.  
[Rohkadallot Hearrá.]

**S** Hearrá, árpmít (min).

**O** Rohkadallot ráfi oppa máilbmái.  
Rohkadallot gierdavašvuoda ja ovttamielalášvuoda  
Ipmila searvegoddái.  
[Rohkadallot Hearrá.]

**S** Hearrá, árpmít (min).

**O** Rohkadallot ráfi ja jeddehusa morašteaddjiide.  
Rohkadallot, ahte mii livččiimet gárvásat jápmít  
Kristusii dorvvastemiin.  
[Rohkadallot Hearrá.]

**S** Hearrá, árpmít (min).

**O** Rohkadallot Hearrá,  
vai son árpmihivččii, bealuštivččii

ja várjalivččii min.  
[Rohkadallot Hearrá.]

**S** Hearrá, árpmit [min].

## MOLSSAEAKTU Á

Hearrá, árpmit

**S** Hearrá, árpmit min.  
Kristus, árpmit min.  
Hearrá, árpmit min.

## \*7. Gudni (Gloria) ja giittossálbma Bassi Golbmaoktavuhtii

Gudni ja giittossálbma Bassi Golbmaoktavuhtii gahččá eret fástoáigge (gutnagaskavahku rájes) ja adveantaáigge (vuossárgga rájes 1. adveantastotnabeaivvi maŋná ).

### Gudni

Nuohttaráidu 1



### DAHJE

Nuohttaráidu 2



**S** eatnama alde ráfi olbmuide, geaid Ipmil árpmiha.

### Giittossálbma

Giittossálbman sáhtá geavahit čuovvovaš Bassi Golbmaoktavuhtii oamas-tuvvon sálmmaid: 11:2,3,5, 17:4, 51, 71, 72, 136: 7, 236, 395, 396 ja 424.

## 8. Beaiivvi rohkos

---

Sáhtta atnit maiddái Hávdái vitkan-minstara rohkosa (čuokkis 6) dahje girkojagi čuovvu beaiivvi rohkosa.

Rohkosávžžuhusa ja searvegotti ámena lea vejolaš lávlut dahje lohkat.

Ávžžuhusa maŋŋá sáhtta leat oanehis jaskes rohkos.

Nuohttaráidu 1



L Roh - ka - dal - lot.

### DAHJE

Nuohttaráidu 2



L Roh - ka - dal - lot.

#### 1. Buotveagalaš Ipmil.

Don leat vuoitán bahá,  
duššadan jápmima  
ja skenken máilbmái callima.  
Veahket min guovdu jápmima  
muitit beaiivvi,  
goas don gárvvohat min odđa,  
almmálaš gárvvuide.

Gula min

Hearrámet Jesusa Kristusa dihtii.

#### 2. Buotveagalaš, bassi Ipmil.

Bárđnát Jesus Kristus lea jápmimiinnis  
ja bajáčuozžilemiinis  
vuoitán jápmima.

Don leat dahkan su

calli ja jápmán olbmuid Hearrán.

Atte midjiide, guđet leat gásttašuvvon Kristusii,  
gierdavašvuoda vuordit

bajásčuožžileame ja agálaš eallima.

Dutnje lehkos rámadus agálaččat.

3. Árpmu ja jeddehusa Ipmil.

Giitu das, ahte don leat boktán Bártnát jápmimis

ja addán midjiide agálaš eallima doaivvu.

Veahket min luohttit dasa,

ahte buohkat, gudet leat jápmán

Kristusa ráhkisvuhtii dorvvastemiin,

šaddet oasálažžan bajásčuožžileame attáldagas.

Dán mii rohkadallat Hearrámet Jesusa Kristusa namas,

su, guhte eallá ja rádde

duinna ja Bassi Vuoiŋŋain

dál ja agálaččat.

Nuohttaráidu 1



**DAHJE**

Nuohttaráidu 2



## II Sáni

---

### 9. Čálabihtá

---

Lohkkojuvvo miinu Hávdái vitkan -minstara čálasajiin (čuokkis 7). Sáhtá atnit maid girkojagi čuovvu dahje eará čálabihtáid.

Lohkki almmuha čálasaji. Searvegoddi guldala čohkut.

Čálabihtá dahje dan oasi lea vejolaš lávlut.

Vástádussániid lea vejolaš lohkat dahje lávlut (nuohat Ipmilbálvalusaid girjjis).  
čálabihtá

[**O** Dát lea Ipmila sáni.

**S** Ipmilii giittus.]

### 10. Sálbma

---

Sálmma sajis sáhtá leat lávlla dahje čuojanasmusihkka.

### \*11. Evangelium

---

Lohkkojuvvo miinu Hávdái vitkan -minstara evangeliumbihtáin (čuokkis 7). Sáhtá atnit maiddái girkojagi čuovvu dahje eará evangeliuma.

Ovdal evangeliuma ja/dahje dan maŋŋá lea vejolaš lávlut halleluja. Hallelujalávlagii, mii lea evangeliuma ovddabealde, sáhtá laktit hallelujagurgadasa. (gč. Evangeliumgirjji). Hallelujalávлага nuohat Ipmilbálvalusaid girjjis.

Halleluja gahččá eret fástoáigge gutnagaskavahku rájes. Dalle hallelujalávлага sajis lea vejolaš geavahit sálbmadajaldaga (gč. Evangeliumgirjji).

Evangeliuma dahje dan oasi lea vejolaš lávlut.

Vástádussániid lea vejolaš lohkat dahje lávlut (nuohat Ipmilbálvalusaid girjjis).

- evangelium

[**L/O** Dát lea bassi evangelium.

**S** Rámádus dutnje, Kristus.]

### 12. Sárdni

---



# III Vitkan

---

## \*13. Oskkudovddastus (Credo)

---

Oskkudovddastus lohkkovuvvo ovtta jitnii.

Oskkudovddastussan lea vejolaš geavahit maiddái sálmma 12, 13 dahje 401:1–3.

**S** Mun oskkun Ipmilii, Áhččái, Buotveagalažžii,  
almmi ja eatnama Sivdnideaddjái,  
ja Jesusii Kristusii,  
Ipmila áidnoriegádan Bárdnái, min Hearrái,  
guhte sahkanii Bassi Vuoinŋas,  
riegádii nieida Márjjás,  
gillái Pontius Pilatusa áigge,  
russiinávlejuvvui, jámii ja hávdáduvvui,  
manai vuolás jábmiid riikii,  
bajásčuožžilii jábmiid luhtte goalmmát beaivve,  
manai bajás albmái,  
čohkká Ipmila, buotveagalaš Áhči, olgeš gieda bealde,  
ja boahdá fas doppe dubmet ealliid ja jábmiid,  
ja Bassi Vuignii,  
bassi oktasaš girku,  
bassi olbmuid searvivuoda,  
suttuid ándagassii addojumi,  
oačči bajásčuožžileame  
ja agálaš eallima.

## \*14. Vitkansánit

---

Vitkansániid sáhtta cealkit hávddi alde (čuokkis 27).

**L** Oskkus golbmaoktalaš Ipmilii mii vitkat NN (oppa namma) vuordit  
bajásčuožžileame beaivvi.

Báhppa goivesta golbmii sáddo gisttu ala ja cealká:

NN (ovdanamat),  
eatnamis don leat boahtán.  
Eanan don fas galggat šaddat.  
Jesus Kristus, Beastámet, boktá du mañimuš beaivve.

#### **DAHJE**

NN (ovdanamat),  
eatnama gavja don leat.  
Eatnama gavjan don fas máhcat.  
Jesus Kristus, Beastámet, boktá du mañimuš beaivve.

#### **DAHJE**

NN (ovdanamat),  
Hearrá attii,  
Hearrá válddii.  
Jesus Kristus, Beastámet, boktá du mañimuš beaivve.

#### **DAHJE**

Nohkavašvuodas gilvojuvvo.  
Nohkameahttunvuodas boktojuvvo.  
Jesus Kristus lea bajásduožžileapme ja eallin.

Jápmán riegeádan dahje uhca mánáža vitkkadettiin.

NN (ovdanamat),  
Ipmil, Áhččámet, lea du sivdnidan.  
Don oaččut vuoiñadit su salas.  
Jesus, Beastámet, boktá du mañimuš beaivve.

## **15. Sálbma**

---

Sálmma sajis sáhtá leat eará heivvolaš musihkka.

## 16. Oktasaš ovddasrohkos

Oktasaš ovddasrohkos lea golmmaoasát: rohkosa álgu, rohkosa joatka, rohkosa loahpaheapme. lešguhtege oasis välljejuvvo heivvolaš molssaeaktu.

Sáhtta atnit maiddái Hávdái vitkan-minstara rohkosiid (čuokkis 11). Oktasaš ovddasrohkos sáhtta ráhkadit maiddái ovtta oapmahaččaiguin dahje searvegotti eará lahtuiguin. Rohkosa lea vejolaš boatkut searvegotti rohkodajaldagain dahje –lávlagiin, dahje dan gaskkas sáhtta leat jaskes boddu. Lea vejolaš geavahit maiddái Trishagion-rohkosa.

Rohkosávžžuhusa ja searvegotti ámena sáhtta lávlut dahje lohkat.

### Rohkosa álgu

Nuohttaráidu 1



L Roh - ka - dal - lot.

### DAHJE

Nuohttaráidu 2



L Roh - ka - dal - lot.

1. Ipmil, jápmin lea guoskkahan min. Mii leat du ovddas rašit ja nohka-vaččat. Mii ráhkistit eallima, muhto mii fertet luohpat das. Mii dahkat plánaid, muhto dat báhcet gaskan. Átestuvvan ja jieris mielain mii bajidit čalmmiideamet dutnje. Don vuolggahit ráhkis Bártnát min lusa juohkit min morrašiid ja bákčasiid. Sus don leat rahpan midjiide geainnu nohkameahtun eallimii.
2. Ipmil, jápmima suoivanat gahččet min ala. Duššefal du diedus ja giedain lea min beivviid lohku. Dušše don bisut, go min eallin čáská. Don áddet min bahča jurdagiid ja dovdduid, go jápmin bohtá ja váldá mis ráhkis olbmo. Don čájehat headástuvvan olbmuide Bártnát Jesusa Kristusa ja gohčut sin oheat dorvvu su luhte.
3. Váibmoládis Ipmil. Jápmin lea váldán mis ráhkis olbmo ja buktán min váibmui morraša ja áibbašumi. Du giehta láide min eallima, ja don attát jápmimis vuoiñjadusa juohkeoktii, guhte dorvvasta dutnje. Min čalm-

mit ohcet čuovgga, mii suonjarda Bártnát Jesusa Kristusa bajásčuožžileames. Dan čuovggas min moraš ja áibbašupmi nuppástuvvet giittusin ja doaivun.

## Rohkosa joatkka

1.

**L/O** Ipmil, mii giitit du eallima attáldagas, giitit buot beivviin, maid leat addán. Mii giitit eandalitge dál NN eallimis. Veahket morašteaddjiid vurket váibmoseaset muittuid dan buoris, maid sii leat sus ožžon. Atte sidjiide fámu deaividit lagaš olbmo jápmima dagahan morraša. Guotte sin doaivvun, mii veahkeha sin eallit ihttáža ja boahteveaš beivviid. Divtte min buohkaid dovdat, ahte du lahka lea buorre orrut.

Don leat addán midjiide bassi sánát. Veahket min ohcat das fámu ja dovdat dan ráhkisvuoda, mainna don ráhkistat min. Giitu das, ahte Lonisteaddjámét eallá.

Ipmil, don dovddat velá daidge jurdagiid, maid lea váttis čilget sániiguin. Mii buktit du ovdii buot min morrašiid ja rádehisvuoda ja luohttit sánát lohpadussii: ”Ohcet mu muođuid! Hearrá, mun dáhtun ohcat du, ale čiega muođuidat mus!” (Sál 27: 8-9) Gula dál maiddái min jaskes rohkosa.

(jaskes boddu.)

2.

Go jápmin deaivida fáhkkestaga.

**L/O** Ipmil, eallin lea midjiide árvitmeahtun vádjolus. Mii eallit dán bottu, muhto mii eat dieđe maidige sihkkara ihttážis. Don okto diedát, don čihkkojuvvon Ipmil.

Sánehis, issoras giksi čárvu min NN (ovdanamma) gistuguoras. Don áddet, go min miella nimmora du vuostá váivves dáhpáhusa maŋŋá. Dušše don diedát vástádusa, go áddemeahttumin jearrat: Manin son rivvejuvvui min luhtte ná fáhkka? Manin máŋga ášši galge báhcit gaskan? Dálkkot don min bákčasa ja átestusa. Veahket min min givssis

ja morrašis oheat dorvvu dus ja guoddit eretoaddán lagažeamet du oskálii.

(jaskes boddu.)

3.

Boarrása vitkkadettiin.

**L/O** Ipmil, don leat gohččon NN (ovdanamma) vuoiŋadussii. Mii eat oainne su šat dán máilmmis ja danin mii áibbašit su. Oro minguin morrašis. Mii giitit du su guhkes callimis ja barggus lagažiid ja sohka-buolvvaid oktavuodas. Divtte velá ainge dan, mii leamaš gierdil ja buorre, guoddit buressivdnádusa ja muittuhit min eallima árvvus.

Ipmil, mii giitit du mannan sohka-buolvvain, mat leat sitkadis bargguin huksen vuodu minge callimii. Veahket min bealisteamet atnit fuola guhtet guoimmisteamet. Bajásgease min gillilvuhtii, ráhkisvuhtii ja gierisvuhtii. Láide min čuovvut daid eallinárvvuid, mat bohciidit du sánis. Atte midjiide dán ja boahttevaš eallima doaivvu.

(jaskes boddu.)

## Rohkosa loahppa

1.

**L** Ipmil, mii rámidit du das, ahte Bárdnát Jesus Kristus lea gárvvistan midjiide bestojumi. Árpmit min! Veahket min oskkus johtit dan geainnu, man čuvge bajásčuožžileame čuovga. Giitu das, ahte osku, doaivu ja ráhkisvuohta guddet agálašvuoda rádjai. Gula min Beastámet dihtii.

2.

**L** Ipmil, mii giitit du ráhkis Bárdnát jápmimis. Divtte dan šaddat midjiide eallimin ja doaivun. Skenke min váibmui dorvvolaš osku ja atte midjiide ráfát, mii lea stuorát go min moraš ja vártnuhisvuohta. Gula min Bárdnát Jesusa Kristusa, Hearrámet dihtii.

3.

**L** Ipmil, giitu das, ahte Beastámet lea jápmimiinnis ja bajáčuožžilemiinis duššadan jápmima fámu. Go beivviideamet lohku dievvá, divtte min ráfis vuolgit sánát mielde. Jodit min almmálaš áhčieatnamii, man čuovga ii goasge nuppástuva gillámuša ja jápmima suoivvan. Divtte min doppe oaidnalit. Dán mii bivdit Bártnát Jesusa Kristusa namas.

Nuohttaráidu 1



**DAHJE**

Nuohttaráidu 2



## IV Eahkedaččat

---

### 17. Oaffarsálbma dahje offertorio (Offertorium)

---


Sálmma áigge eahkedaččat lágiduvvojit áltárbeavdái. Sálmma sajis sáhtta leat goarrálavlun dahje čuojanasmusihkka.

### 18. Eahkedašrohkos (Eukaristalaš rohkos)

---

Vuorrolávlla



Nuohttaráidu 1





### DAHJE

#### Nuohttaráidu 2



## Prefašuvdna

Prefašuvnna lea vejolaš lávlut dahje lohkat. Prefašuvnna nuohtta Ipmilbálvalusaid girjjis.

Prefašuvnna álgu

**L** Duodaid lea riekta ja árvvolaš, ahte mii giitit du álo ja juohke sajis,  
bassi Hearrá, buotveagalaš Áhčči, agálaš Ipmil,  
Jesusa Kristusa, min Hearrá bokte.

Prefašuvnna loahppa (dábálaš)

Son lea gillán jápmima min ovddas  
ja bajásčuožžilemiinis rahpan midjiide geainnu agálaš eallimii.  
Mii giitit du dán almmálaš attáldagas  
ja lávlut dutnje rámaidusa engeliiguin ja buot basiiguin:

### DAHJE

Su don leat addán jápmimii ja baktán su jápmimis,  
vai mii bestojuvvošeimmet suttu ja jápmima válldis  
ja oččošeimmet agálaš eallima.  
Mii giitit du dán almmálaš attáldagas  
ja lávlut dutnje rámaidusa engeliiguin ja buot basiiguin:

### \* Bassi (Sanctus)

Searvegoddi sáhtá čuožžut Bassi–hymna rájes Ipmila Láppis –hymna rádjai.

**S** Bassi, bassi, bassi Hearrá Sebaot!

Albmi ja eana dievva lea du šarratvuodainat.

Hosianna allagasas!

Sivdniduvvon lehkos son, guhte bohtá Hearrá nammii.

Hosianna allagasas!

### Rohkos ja ásahansánit

Eará eahkedašrohkosat Ipmilbálvalusaid girjjis.

Bassi Áhčči. Oppa luondduriika máidnu du, buot eallima addi. Don it hilgon sivdnádusaidat suttu ja jápmima válldi vuollái, muhto sáddejit du áidna Bártne olmmožin, vai son beasttášii min. Mii giitit du dan



lonástusas, man don leat válmmaštan midjiide su dievaslaš oaffariin ruossa alde. Son mávssii min vealggi ja dagai ráfi duinna ja minguin.

*Hearrámet Jesus Kristus, dan ija go son behttojuvvui, válddii láibbi, buressivdnidii (+) ja doadjalii dan, attii máhttájeaddjiidasas ja celkkii: Váldet ja borret. Dát lea mu rumaš, mii addojuvvo din ovddas. Dahket dan mu muitun.*

*Nu son válddii maiddáigeara, giittii (+) ja celkkii: Juhket dás buohkat. Dát gearra lea odda lihttu mu varas, mii golggahuvvo din ovddas suttuid ándagassii addojupmin. Nu dávjá go dii das juhkabehtet, dahket dan mu muitun.*

Mii ávvudit buot das, maid Bárdnát lea min ovddas dahkan, ja doallat dáid bassi mállásiid, main mii beassat oasálašžan lonástusa čiegusvuodas. Mii muittašit su jápmima, bajásčuožžileame ja albmáimanna. Mii vuordit su máhccama šearratvuodas.

[**S** Mii gulahit su jápmima.  
Mii duodaštit su bajásčuožžileame.  
Mii vuordit su bohtima iežas gudniin.]

Sádde du Bassi Vuoiŋŋa buressivdnidit min, vai válddášeimmet oskkus vuostá du Bártni rupmaša ja vara. Ovttastahte min sutnje ja nuppiidasamet. Veahket min oaffaruššat iežamet ealli oaffarin Kristusis, dutnje giittusin ja gudnin.

Su bokte, sinna ja sus  
gullá dutnje, buotveagalaš Áhčči  
Bassi Vuoiŋŋa oktavuodas  
gudni ja šearratvuohta álo ja agálaččat.

**S** Ámen.

## 19. Áhččámet (Pater noster)

---

Herrá rohkos celkojuvvo ovttá jítne.

**S** Áhččámet, don guhte leat almmis.  
Basuhuvvos du namma.  
Bohtos du riika.  
Šaddos du dáhttu,  
mo almmis nu maiddái eatnama alde.  
Atte midjiide odne min beaivválaš láibbi.  
Ja atte midjiide min suttuid ándagassii,  
nugo miige ándagassii addit velggolaččaidasamet.  
Alege doalvvo min geahččalussii,  
muhto beastte min bahás eret.  
Dasgo du lea riika ja fápmu ja gudni agálašvuhtii.  
Ámen.

## 20. Herrá ráfi (Pax)

---

Vuorrolávlaga maŋŋá lea vejolaš ávžžuhit ráfi sávaldahkii. Searvegotte olbmot buorástahttet nuppiideaset ja celket ovdamearkka dihte: Kristusa ráfi dahje Ipmila ráfi.

Nuohttaráidu 1




**L** Hear - rá rá - fi leh-kos din - guin.



**S** Nu son leh-kos maid-dái du vuoiŋ - ŋain.

## DAHJE

Nuohttaráidu 2



**L** Hear - rá rá - fi leh - kos din - guin.



**S** Nu son leh-kos maid - dái du vuoij - ñain.

## \*21. Ipmila Láppis (Agnus Dei)

---

Liturga sáhtta doadjit eahkedašláibbi Ipmila Láppis –hymna áigge.

**S** Ipmila Láppis don, guhte guottát máilmmi suttu,  
árpmi min, árpmi.

Ipmila Láppis don, guhte guottát máilmmi suttu,  
árpmi min, árpmi.

Ipmila Láppis don, guhte guottát máilmmi suttu,  
atte midjiide ráfi.

## 22. Eahkedaččaid juohkin

---

### Eahkedašbovdehus

**L** Ávdugasat sii geat leat bovdejuvvon Lábbá headjamállásiidda.  
Bohtet, buot lea juo válmmaštuvvon.

### DAHJE

**L** Jesus cealká: ”Bohtet mu lusa,  
buohkat geat rahčabehtet ja guoddibehtet lossa nodiid,  
de attán didjiide vuoijñadusa.”

### DAHJE

**L** Bohtet, váldet vuostái Kristusa rupmaša.  
Bohtet, juhket jápmemeahtunvuoda ádjagis.

## Eahkedaččat (Communio)

Eahkedaččaid juogadeame áigge sáhtta leat sálbmalávlun dahje eará musihkka.

Láibbi juogadettiin celkojuvvo:

[Min Hearrá Jesusa] Kristusa rumaš, du ovddas addojuvvon.

Rihppaguossi sáhtta vástidit: Ámen.

Viinni juogadettiin celkojuvvo:

[Min Hearrá Jesusa] Kristusa varra, du ovddas golggahuvvon.

Rihppaguossi sáhtta vástidit: Ámen.

## Loahpahansánit

Loahpahansániid maŋŋá eahkedašlihtit gokčojuvvojit [ja sirdojuvvojit veahkkebeavddi ala]. Ovdal giittosrohkosa (čuokkis 25) sáhtta leat jaskes boddu.

**L** Mii leat vuostáiváldán Hearrá Jesusa Kristusa.

Várjalehkos son min agálaš eallimii.

**S** Ámen.

### DAHJE

**L** Min Hearrá Jesusa Kristusa rumaš ja varra  
vurkejehkos oppa min vuoiŋŋa, sielu ja rupmaša  
agálaš eallimii.

**S** Ámen.

## 23. Giittosrohkos

---

Rohkosávžžuhusa, rohkosa ja searvegotti ámena lea vejolaš lávlut dahje lohkat.

Giittosrohkosin lea vejolaš geavahit maiddái sálmma (omd. 61:1, 62, 63, 65:1–2 ja 409:6–7).

Eará giittosrohkosat lpmilbálvalusaid girjjis.

Nuohttaráidu 1



**L** Roh - ka - dal - lot.

## DAHJE

### Nuohttaráidu 2



L Roh - ka - dal - lot.

#### 1. Almmálaš Áhčči,

giitu das, ahte don leat biebman min  
ráhkisvuoda mállásiiguin.

Divtte bajásčuožžileame čuovgga báitit  
morašteaddji ja áibbašeaddji váimmuide.

Doarjjo min árpmuinat dan beaivvi rádjai,  
goas don sihkut eret visot gatnjaliid  
ja jodihat min loahpalaččat oktii.

Gula min ráhkis Bátrnát,  
Jesusa Kristusa dihtii.

#### 2. Agálaš Ipmil,

Hearrámet Jesusa Kristusa Áhčči.

Bátrnát lea rivven válldi jápmimis  
ja rahpan midjiide eahkedaččain  
jápmemeahttunvuoda ádjaga.

Bovtte min buohkaid min ráhkkásiiguin  
mañimuš beaivve agálaš illui.

Gula min Jesusa Kristusa,

Hearrámet bokte,

guhte eallá ja rádde

duinna ja Bassi Vuoiŋgain

dál ja agálaččat.

#### 3. Ipmil, Áhččámet.

Giitu das, ahte don leat buressivdnidan min  
eahkedaččaid eallin dahkki skeaŋkkain

ja addán midjiide niestti agálaš eallimii.

Divtte min ovttas bálvaleaddjiinat NN:in



## 26. Rohkos hávddi alde

---

Rohkosa sáhtta lohkat maiddái hávdái luoitima maŋŋá.

### **L** Rohkadallot.

1. Buotveagalaš Ipmil, almmálaš Áhčči. Don suvvet áidna Bártnát gillát ruossajápmima min ovddas. Son hávdáduvvui, ja dáinna lágiin don basuhit minge hávddi vuoiŋnadansadjin. Mii rohkadallat: Duddjo Bassi Vuoiŋgainat váibmomet su ássansadjin, nu ahte son bisošii mis ja mii sus. Divtte min ruossa ja givssi maŋŋá beassat ráfái ja bajásčuožžilit maŋimuš beaivve agálaš eallimii. Bártnát Jesusa Kristusa, Hearrámet bokte.

2. Ráhkis almmálaš Áhčči. Mii addit NN du oskálíi. Mii luoitit su rupmaša hávddi vuoiŋnadussii vuordit bajásčuožžileame ja odđa sivdnideame idida. Beastámet jámii ja hávdáduvvui, ja dáinna lágiin don basuhit minge hávddi vuoiŋnadansadjin. Don boktet su jápmimis, vuitet jápmima ja rahpet almmi oskkolaččaide.

Jesus Kristus, Beastámet. Dutnje mii bajidit čalmmiideamet. Árpmit min ja atte midjiide ealli doaivvu. Doalvvo min bajásčuožžileapmái ja agálaš eallimii. Gula min ráhkisvuodat dihtii.

3. Almmálaš Áhčči, veahket min muitit, ahte Bártnát vuoiŋnadii hávddis. Go mii jápmit, suova minge vuoiŋnadit dorvovolaččat ja vuordit odđa eallima. Válde mis eret balu ja oahpat min luohhtit dasa, ahte Jesusa dihtii mii beassat jápmima ja hávddi bokte almmálaš riikasat. Gula min Bártnát Jesusa Kristusa, Hearrámet bokte.

**S** Ámen.

## 27. Hávdái luoitin

---

Gisttu luottedettiin hávdái sáhtta lávlut sálmma (omd. 356:4-5 dahje 357).

### Vitkansánit

Báhppa cealká vitkansániid, juos dat eai leačča celkojuvvon čuoggá 14 buohta.

Go rásit leat biddjojuvvon hávddi ala, sáhtta lávlut sálmma (omd. 334 dahje 430).



# Hávdái luoitin

Minstara sáhtá atnit dalle, go oamehas lea juo vitkojuvvon ja liika luitojuvvo hávdái eará báikkis. Dan lea vejolaš čuovvut maid urna eatnamii luoittedettiin.

Rohkosbottu doaimmaha báhppa, searvegotti eará bargi dahje searvegotti lahttu. Rohkosbottu boddii sáhtá cahkkehit gintala.

## 1. Sálbma

---

Sáhtá geavahit ovdamearkka dihte sálmma 346, 347, 357, 358, 474 dahje 491.

## 2. Álggahus

---

### Álgosivdnideapme

Buessivdnádusa ja vuorrodearvvahusa lea vejolaš lohkat dahje lávlut.

**B/O** Áhči ja + Bártni ja Bassi Vuoiŋŋa nammii.

**S** Ámen.

**B/O** Hearrá lehkos dinguin.

**S** Nu son lehkos maddái du vuoiŋŋain.

### Álggahansánit

Báhppa ráhkada álggahansániid ieš dahje geavaha čuovvovaš molssaeavttuid.

**B/O** Ráhkis ustibat. Hávdđi alde min guoskkaha jávkavašvuohta, muhto deike ollá maddái lohpadus callimis ja bajáčuožžileames. Kristus cealká: ”Mun ledjen jápmán, muhto geahča, mun ealán álo ja agálašvuhtii ja mus leat jápmima ja jábmiidriikka čoavdagat.” (Alm 1: 18)

### DAHJE

**B/O** Ráhkis ustibat. Hávdđi alde min guoskkaha jávkavašvuohta. Muhto deike ollá maddái sátni das, ahte Ipmil rádđe visot, maddái eallima ja jápmima. Biibbalis celkojuvvo: ”Mun diedán, ahte lonisteaddján eallá. Son cealká maŋimuš sáni eatnan alde.” (Job 19: 25)

### 3. Biibbalsálbma

---

Sáhtta atnit maiddái girkojagi čuovvu dahje eará biibbalsálmmaid.

Biibbalsálmma sáhtta lohkat dahje lávlut. Dan álggus ja loahpas sáhtta leat antifona.

Biibbalsálbmii sáhtta laktit Uhca gudni. Uhca gudni guđđojuvvo eret 5. fástoáiggi sotna-beaivvi rájes.

Herrá lea mu báimman,  
ii mus váillo mihkkege.

Ruonas gittiide son livvuda mu,  
vuoigŋadusa čázi lusa son láide mu.

Son áhpásmahtta mu sielu.

Son doalvu mu vanhurskkisvuoda bálgáid mielde namas dihtii.

Vaikko mun vádjolivččen jápminsuoivana leagis,  
de in balaše mange bahás.

Dasgo don leat mu mielde.

Du soabbi ja báimmansoabbi jeddejit mu.

Don ráhkadat munnje beavddi  
mu vašálaččaid čalmmiid ovddas.

Don vuoiddat mu oaivvi oljjuin,  
mu juhkanlihtti golgá badjel.

Aivvefal buorre vuolta ja árbmugas vuolta doarridit mu  
buot mu eallinbeivviid,  
ja mun beasan ássat Herrá viesus guhkes áiggiid čada.

Sál 23

#### **DAHJE**

Mun bisun álo du luhtte,  
don leat dohppen mu olgeš gihtii.

Don láidet mu rádiinat,  
ja dasto bajidat mu gudnái.

Juos mus leat don almmis,  
de mun in sáva šat maidege eatnama alde.

Juos mu oažži ja váibmu vuoimmehuvvá,  
de Ipmil lea agálaččat mu váimmu bákti ja mu oassi.

Sál 73: 23–26

## Uhca gudni

Gudni Áhččái ja Bárdnái

ja Bassi Vuignii,

nugo lei álggus, dál lea ja álo

agálašvuodas agálašvuhtii. Ámen.

## Antifona geardduhuvvo.

### 4. Biibbalohkan

---

Lohkkojuvvo okta dahje moadde čuovvovaš čálabihtáin.

Sáhttá atnit maid girkojagi čuovvu dahje eará čálabihtáid.

Biibbalohkama maŋŋá sáhttá leat jaskes mediteren.

1 Kor 15: 42–49

Nu lea maiddái jábmiid bajásčuožžilemiin. Dat mii gilvojuvvo, lea nohkavaš, muhto dat mii bajásčuožžila, lea nohkameahttun. Dat mii gilvojuvvo gudnehisvuodas, bajásčuožžila hearvásvuodas. Lunddolaš rumaš gilvojuvvo, vuoŋŋalaš rumaš bajásčuožžila. Juos lea lunddolaš rumaš, de lea maiddái vuoŋŋalaš rumašge. Dasgo nu lea čállojuvvon: ”Vuosttaš olmmoš, Áttán, šattai calli siellun. Maŋit Áttán šattai vuoŋŋan mii addá callima.” Vuosttažin ii nappo boade vuoŋŋalaš, muhto dat mii lea lunddolaš. Easka das maŋŋil bohtá dat mii lea vuoŋŋalaš. Vuosttaš olmmoš bodii eatnamis ja ráhkaduvvui eatnamis, nubbi olmmoš bohtá almmis. Nugo duot eatnanlaš olmmoš lei, dakkárat leat buot eatnanlaš olbmot. Ja nugo duot almmálaš olmmoš lea, nu šaddet buot almmálaš olbmot. Nugo mii leat eatnanlaš olbmo láhkásaččat, nu mii šaddat almmálaš olbmo láhkásažžange.

2 Kor 4: 16–18

Danne mii eat arvvahuva. Vaikko velá min olgguldas olmmoš billistuvvoge, de min siskkildas olmmoš odasmahttojuvvo almmatge beaivvis beaivái. Dat átestusat maid mii dál fertet guoddit, leat geahppasat, ja buktet midjiide agálaš hearvásvuoda valljugas riggodaga. Ii

mis leat čalmmiid ovddas dat mii lea oinnolaš, muhto dat mii lea oaidnemeahttun. Dasgo dat mii lea oinnolaš, bistá muhtun áiggi, muhto dat mii lea oaidnemeahttun, bistá agálaččat.

2 Kor 5: 1–5

Miihan diehtit ahte juos min eatnanlaš viessu, min goahti, gaikkoduvvoge, de mis lea almmis viessu mii bohtá Ipmilis, agálaš viessu, mii ii leat huksejuvvon giedaiguin. Dáppe ealedettiineamet mii šuohkkit ja áibbašit gárvvohuvvot almmálaš viesuineamet. Dasgo go mii leat gárvvohuvvon dainna, de eat leat šat álás. Nu guhká go mii ássat dan goadis, mii šuohkkit váivvisteamet. Eat mii dáhto nuolahuvvot, muhto baicca gárvvohuvvot vai callin njielašii dan mii lea jámolaš. Aiddo dán várás Ipmil lea gárvvistan min ja dáhkádussan son lea addán midjiide Vuoiŋŋa.

Matt 27: 57–60

Go šattai eahket, de bodii dasa Jovsset, rikkis arimatealaš, gii maiddái lei Jesusa máhttájeaddji. Son manai Pilatusa lusa ja sidai Jesusa rupmaša. Ja Pilatus gohčui addit dan sutnje. Jovsset válldii rupmaša, giesai dan buhtes liinni sisa ja bijai dan odđa hávdái, man son lei čuolahan alccesis báktái. Son fierahii stuora geađggi ráiggi ovdii ja vulggii eret.

## 5. Vástádus

---

Sáhhtá atnit ovdamearkka dihte sálmma 68, 73 dahje 487.

## 6. Sárdni

---

## 7. Rohkosoassi

---

### Rohkos

Sáhhtá atnit maiddá iješráhkaduvvon rohkosa.

#### **B/O** Rohkadallot.

Ráhkis almmálaš Áhčči. Mii addit NN du oskálii. Mii giitit du oktasaš jagiin ja buot das, maid son lei midjiide. Mii leat luoitán su rupmaša/guna hávddi vuoiŋnadussii vuordit bajásčuožžileame ja odđa sivdnideame idida.

Beastámet jámii ja hávdáduvvui, ja nu son basuhii minge hávddi vuoiŋnadansadjin. Don boktet su jápmimis, vuitet jápmima ja rahpet almmi oskkolaččaide.

Ipmil, sánát nanne, ahte don diedát, maid mii ohealit. Min šuohkana-satge ollejit du beljiide. Dán lohpadussii luohhtimiin mii bivdit: Gula dál maiddá min jaskes rohkosa.

(jaskes boddu)

Jesus Kristus, Beastámet. Dutnje mii bajidit čalmmiideamet. Árpmít min ja atte midjiide ealli doaivvu. Ale hilggo min, muhto doalvvo min bajásčuožžileapmái ja agálaš eallimii. Gula min ráhkisvuodat dihtii.

**S** Ámen.

### Áhččámet

Herrá rohkos celkojuvvo ovttá jitnii.

**S** Áhččámet, don guhte leat almmis.

Basuhuvvos du namma.

Bohtos du riika.

Šaddos du dáhttu,

mo almmis nu maiddá eatnama alde.

Atte midjiide odne min beaivválaš láibbi.

Ja atte midjiide min sudduid ándagassii,

nugo miige ándagassii addit velggolaččaidasamet.

Alege doalvvo min geahččalussii,  
muhto beastte min bahás eret.  
Dasgo du lea riika ja fápmu ja gudni agálašvuhtii.  
Ámen.

## 8. Buressivdnádus

---

**B/O** Buressivdnidehkos min buotveagalaš ja árbmugas Ipmil,  
Áhčči ja (+) Bárdni ja Bassi Vuoigŋa.

**S** Ámen.

### DAHJE

**B/O** Hearrá buressivdnidivččii din ja várjalivččii din.

Hearrá čuvgešii muođuidis didjiide  
ja livččii didjiide árbmugas.

Hearrá jorgalivččii muođuidis din beallái  
ja attášii didjiide ráfi.

Áhči ja + Bárdni ja Bassi Vuoigŋa nammii.

**S** Ámen.

## 9. Sálbma

---

Sáhtta atnit ovdamearkka dihte sálmma 369 dahje 430.

# SIERRA RIHPAŠEAPME

Sierra rihpašeames gii ihkinassii sáhttá dovddastit suddolašvuodas dahje mannu dihto suddu ja oažžut suddubeastima. Rihpa sáhttá váldit vuostái báhppa, searvegotti eará bargi dahje giinu searvegotti lahttu.

Rihpas ja sieludikšumis mearreduvvo girkoortnegis (GO 4: 1 ja 5: 1). Báhpas ja lektoris lea geatnegasvuohtha jávohisvuhtii (GL 5: 2; 6: 12), nu maiddá diakonijja virgeolbmui (Bč. 12.-13.2.1980 § 26). Geatnegasvuohtha jávohisvuhtii guoská maiddá eará rihpa vuostáiváldiid (GL 6: 3, Kátkkesmus, čuokkis 41).

Rihpašeapme váldojuvvo vuostái girkus dahje eará heivvolaš sajis.

Rihpašeapmái sáhttá gullat sieludikšu ságastallan.

Rihpašeaddji sáhttá iežas guorahallamis geavahit veahkkin logi báhkcoma ja gáhtamuš-sálmmaid (biibbalsálmmaid 6, 32, 38, 51, 102, 130 ja 143).

Rihppa sáhttá leat friddjahápmásaš. Dat galgá doallat sisttis aŋkke suddodovddastusa ja suddubeastima. Sáhttá geavahit maiddá čuovvovaš minstara.

## 1. Sálbma

---

## 2. Álgosivdnideapme

---

Rihpa vuostáiváldi:

Áhči ja + Bártni ja Bassi Vuoiŋŋa nammii.

Rihpašeaddji:

Ámen.

## 3. Álggahansánit

---

Álggahansániid lea vejolaš ráhkadit ieš.

Rihpa vuostáiváldi:

Ipmil dovda min buorebut go mii ieža. Don sáhtát luohttit dasa. Mii leat dál Ipmila ovddas. Don oaččut sárđnut sutnje biibbalsálmma sániiguin: ”Don diedát visot. Dat lea munnje menddo ovddolaš, dat lea ilá allat, mun in árvit dan.” (Sál 139: 6) Dovddas dál sutnje sudduidat ja sivalašvuodat.

## 4. Rihpašeapme

---

### Suttudovddastus

Rihpašeaddji sáhhtá dovddastit suttuidis maiddái iežas sániiguin. Rihpa vuostáiváldi sáhhtá lohkat suttudovddastusa ovttas rihpašeaddjiin dahje su ovddas. Rihpašeaddji sáhhtá luoitádit čippiid ala.

1. Ipmil, almmálaš Áhččámet.

Mun lean suddudan du vuostá

jurdagiiguin ja sániiguin, daguiguin ja healbademiiguin.

Eandalitge mun dovddastan, ahte lean – –.

Dat goddá mu oamedovddu.

Don oainnát maiddái daid suttuid, maid mun in iešge diede.

Mun gádan visot dán ja rohkadalan:

leage munnje árbmugas ja atte munnje suttuidan ándagassii  
ráhkis Bátrnát Jesusa Kristusa dihtii.

2. Hearrá, don leat ládis, muite mu,

čájjet agálaš buorrevuodat.

Ale muite suttuidan,

alege bahás daguidan!

Don, guhte leat oskkáldas ja buorre,

ale vajálduhte mu!

3. Čienjalvuodas mun čuorvvun dutnje, Hearrá.

Hearrá, gula mu jiena.

Jorgal beljiidat gullat mu rohkosa.

Juos don, Hearrá, anát muittus suttuid,

Hearrá, guhte dalle ceavzá?

Muhto du lea árbmu, don attát ándagassii,

vai mii ballat dus.

Danne, Ipmil,

leage munnje árbmugas du buorrevuoda dihtii.

Basa mu buhtisin mu rihkkosis

ja atte mu jorraleame ándagassii.

Du, aivve du vuostái mun lean rihkkon,



lean dahkan du dáhtu vuostá.  
Jorgal eret čalmmiidat mu suttuin  
ja sihko mus buot mu bahás daguid.  
Ipmil, sidvniit munnje buhtes váimmu  
ja odasmahte mu, atte nana vuoiŋŋa.  
Ale suhppe mu eret muoduidat ovddas,  
ale váldde mus eret Bassi Vuoiŋŋat.

4. Árbmugas Ipmil.

Mun dovddastan du ovddas,  
ahte suddu lea čatnan mu,  
inge mun nákke beastit iehčan.  
Mun lean rihkkon du bassi dáhtu vuostá  
ja vuostálastán du báhkomiid buressivdnádusa.  
Don oainnát buot vearrivuoda,  
dange maid in ieš oainne.  
Árpsmit mu du Bártni Jesusa Kristusa dihtii.

5. Vuoi don buot árpmoleamos,

russiinávlejuvvon Hearrá Jesus Kristus.  
Árpsmit mu, váivváš suttolačča,  
ja geahča mu beallái ládis čalmmiiguin,  
nugo don gehččet Biehtárii, go son lei biehttalan du,  
ja nugo don gehččet suttolaš nissonii farisealačča viesus  
ja rievvárii ruossamuoras.  
Atte munnje du bassi árpmu,  
vai mun, nugo Biehtár, čirošin suttuidan,  
nugo suttolaš nisu du váimmustan ráhkistivččen  
ja ovttas rievváriin oččošin geahčadit du bassi muoduid  
almmis agálaččat.

## Suttubeastin

1.

Rihpa vuostáiváldi:

Hearrámet Jesus Kristus lea cealkán máhttájeaddjiidasas:

”Geaidda dii addibehtet sin suttuid ándagassii,  
de sidjiide leat dat ándagassii addojuvvon.”

Jesusa Kristusa bálvaleaddjin mun cealkkán,  
ahte du suttut addojuvvojit ándagassii

Áhči ja (+) Bártni ja Bassi Vuoiŋŋa nammii.

Rihpašeaddji:

Ámen.

2.

Rihpa vuostáiváldi:

Jesus Kristus lea addán searvegoddásis

almmi riikka čoavdagiid ja cealkán:

”Geaidda dii addibehtet sin suttuid ándagassii,  
de sidjiide leat dat ándagassii addojuvvon.”

Oskkutgo, ahte suttubeastin, maid mun dutnje cealkkán,  
lea Ipmila ándagassiiaddojupmi?

Rihpašeaddji:

De oskkun.

Rihpa vuostáiváldi:

Dáhpáhuvvos dutnje nu mo don oskkut.

Hearrámet Jesusa Kristusa báhkkoma mielde mun cealkkán,  
ahte du suttut addojuvvojit dutnje ándagassii

Áhči ja (+) Bártni ja Bassi Vuoiŋŋa nammii.

Rihpašeaddji:

Ámen.

3.

Rihpa vuostáiváldi:

Jesus cealká:

“Ustiban, leage dorvvolaš mielain,  
du suttut leat dutnje ándagassii addojuvvon.”

[Dán suttubeastima mun gulahan dutnje  
Áhči ja (+) Bártni ja Bassi Vuoiŋŋa nammii.]

Rihpašeaddji:

Ámen.

4.

Rihpa vuostáiváldi:

”Juos mii vádjolit čuovgasis,  
nugo son iešge lea čuovgasis,  
de mis lea searvivuohta guhtet guimmiideametguin,  
ja su Bártni Jesusa varra buhtista min buot suttus.

Juos mii dadjat ahte mis ii leat suddu,  
de beahhtit iežamet,  
iige duohtavuohta leat min siste.

Juos mii dovddastit suddomet,  
de son lea oskkáldas ja vanhurskkis,  
ja addá midjiide min suttuid ándagassii  
ja buhtista min buot vearrivuodas.”

[Su bálvaleaddjin gulahan dutnje suttubeastima  
Áhči ja (+) Bártni ja Bassi Vuoiŋŋa nammii.]

Rihpašeaddji:

Ámen.

5.

Rihpa vuostáiváldi:

”Hearrá lea sin lahka, geain lea cuovkanan váibmu,  
ja son beastá sin, geain lea nuonddahallan miella.”

Jesusa Kristusa bálvaleddjín mun duodaštan dutnje,  
ahte Ipmil addá árpmustis buot du sudduid ándagassii.

Rihpašeaddji:

Ámen.

## 5. Rohkos

---

Rihpa vuostáiváldi:

Rohkadallot.

1. Buotveagalaš Ipmil, ráhkis almmálaš Áhčči. Don dovddat min headjuvuodaid. Duššefal don sáhtát beastit min. Nanne eallin dahkki Vuoiŋŋainat NN, nu ahte son nákkešii luohttit dutnje maiddá atestusa siste. Veahket min báhcit du háldui dorvvolaš mielain ja rámidit du. Gula min Bártnát Jesusa Kristusa namas.
2. Beastámet Jesus Kristus. Giitu ándagassiiaddojumis. Atte NN:i fámu beaivvis beaivái dorvvastit du árbmui ja buorrevuhtii. Veahket su johtit du geainnus ja luohttit du sátnái ja lohpadussii. Doarjjo su buohcuvuodas ja gillámušas. Čuvge su Bassi Vuoiŋŋainat. Čana/gidde su ain nannosabbot alcesat. Dán mii rohkadallat árpmot ja váibmoládisvuodat dihtii.
3. Mu siellu, máinno Hearrá,  
buot mii lea mu siste,  
máinno su bassi nama!  
Mu siellu, máinno Hearrá,  
ale vajáldahte su buorredaguid!  
Son addá ándagassii buot du sudduid  
ja dálkkasta buot du vigiid.  
Son lonista du heakka hávddis  
ja kruvnnida du árbmugasvuodain ja váibmoládisvuodain.

Rihpašeaddji:

Ámen.

## 6. Buressivdnáduš

---

Rihpa vuostáiváldi:

Hearrá buressivdnidivččii din ja várjalivččii din.

Hearrá čuvgešii muođuidis didjiide

ja livččii didjiide árbmugas.

Hearrá jorgalivččii muođuidis din beallái

ja attášii didjiide ráfi.

Áhči ja + Bártni ja Bassi Vuoiŋŋa nammii.

Rihpašeaddji:

Ámen.

### **DAHJE**

Rihpa vuostáiváldi:

Hearrá (+) buressivdnidehkos du.

Son várjalehkos du buot bahás

ja láidejehkos du agálaš eallimii.

Rihpašeaddji:

Ámen.

## 7. Sálbma

---



# RIHPAT BUOHCCI LUHTTE

Doaladettiin eahkedaččaid buohcci luhtte, maddái eará hálolaččaide juhkkovuođit eahkedaččat.

Eahkedašneavvut stellejuvvojit vilges liinniin gokčovuvvon beavddi ala. Beavddi ala sáhtá bidjat maddái ruossa dahje krusifivssa sihke cahkkehit gintala.

## I Álggahus

---

### 1. Sálbma

---

### 2. Álgosivdnideapme

---

Buressivdnádusa ja vuorrodearvvahusa lea vejolaš lávlut dahje lohkat.

**Buressivdnádus**

**B** Áhči ja + Bártni ja Bassi Vuoiŋŋa nammii.

**S** Ámen.

**Vuorrodearvvahus**

**B** Hearrá lehkos dinguin.

**S** Nu son lehkos maddái du vuoiŋŋain.

### 3. Álggahansánit

---

Báhppa ráhkada álggahansániid ieš dahje geavaha čuovvovačča.

**B** Hearrámet Jesus Kristus lea cealkán: ”Gos guovttis dahje golmmas leat čoagganan mu nammii, doppe mun lean sin gasku”. (Matt 18: 20) Dán

lohpádussii mii dálge luohttit. Kristus árpmiha min, go mii dovddastit suttuideamet. Son lea oskkáldas ja vanhurskkis. Son addá suttuid ánda-gassii ja sihkku eret buot vearrivuoda. Kristusa árbmui dorvvastemiin mii dovddastit dál ovttas suttuideamet.

## 4. Rihpat

---

Rippi sáhttet leat oktasaččat dahje sierra. Sierra rihpain galgá váldit vuhtii das addojuvvon rávvagiid.

### Suttudovddastus

Rihpašeaddji sáhtta dovddastit suttuidis iežas sániiguin. Rihpa vuostáiváldi sáhtta lohkat suttudovddastusa ovttas rihpašeaddjiin dahje su beales.

1. Ipmil, almmálaš Áhččámet.

Mun lean suddudan du vuostá

jurdagiiguin ja sániiguin, daguiguin ja healbademiiguin.

Eandalitge mun dovddastan, ahte lean – –.

Dat goddá mu oamedovddu.

Don oainnát maddái daid suttuid, maid mun in iešge diede.

Mun gádan visot dán ja rohkadalan:

leage munnje árbmugas ja atte munnje suttuidan ándagassii  
ráhkis Bártnát Jesusa Kristusa dihtii.

2. Hearrá, don leat ládis, muite mu,

čájet agálaš buorrevuodat.

Ale muite suttuidan,

alege bahás daguidan!

Don, guhte leat oskkáldas ja buorre,

ale vajálduhte mu!

3. Čienalvuodas mun čuorvvun dutnje, Hearrá.

Hearrá, gula mu jiena.

Jorgal beljiidat gullat mu rohkosa.

Juos don, Hearrá, anát muittus suttuid,

Hearrá, guhte dalle ceavzá?



Muhto du lea árbmu, don attát ándagassii,  
vai mii ballat dus.

Danne, Ipmil,

leage munnje árbmugas du buorrevuoda dihtii.

Basa mu buhtisin mu rihkkosis

ja atte mu jorraleame ándagassii.

Du, aivve du vuostái mun lean rihkkon,

lean dahkan du dáhtu vuostá.

Jorgal eret čalmmiidat mu suttuin

ja sihko mus buot mu bahás daguid.

Ipmil, sivdnit munnje buhtes váimmu

ja odasmahte mu, atte nana vuoiŋŋa.

Ale suhppe mu eret muoduidat ovddas,

ale váldde mus eret Bassi Vuoiŋŋat.

#### 4. Árbmugas Ipmil.

Mun dovddastan du ovddas,

ahte suddu lea čatnan mu,

inge mun nákke beastit iehčan.

Mun lean rihkkon du bassi dáhtu vuostá

ja vuostálastán du báhkкомиid buressivdnádusa.

Don oainnát buot vearrivuoda,

dange maid in ieš oainne.

Árpsmit mu du Bártni Jesusa Kristusa dihtii.

#### 5. Vuoi don buot árpsmoleamos,

russiinávlejuvvon Hearrá Jesus Kristus.

Árpsmit mu, váivváš suddolačča,

ja geahča mu beallái ládis čalmmiiguin,

nugo don gehččet Biehtáarii, go son lei biehttalan du,

ja nugo don gehččet suddolaš nissonii farisealačča viesus

ja rievváarii ruossamuoras.

Atte munnje du bassi árpsmu,

vai mun, nugo Biehtár, čirošin sudduidan,

nugo suddolaš nisu du váimmustan ráhkistivččen  
ja ovttas rievváriin oččošin geahčadit du bassi muoduid  
almmis agálaččat.

6. Ráhkis almmálaš Áhči.

Don oainnát mu ja oppa ealliman.

Mun lean headju ja váibbas.

Mu eallin leamaš váilevaš.

Mun lean dahkan boasttoválljemiid,  
vajálduhtán mángii ráhkkáseamos olbmuid  
ja bávččagahtán iežan ja earáid.

Mun boadán du ovdii dakkárin go lean.

Jesusa ráhkisvuoda dihtii mun luhtán dasa,  
ahte don válddát mu vuostá.

Ipmil, muite mu váibmoládisvuodastat

Ja atte sudduidan ándagassii.

## Suttubeastin

1.

**B** Hearrámet Jesus Kristus lea cealkán máhttájeaddjiidasas:

”Geaidda dii addibehtet sin sudduid ándagassii,  
de sidjiide leat dat ándagassii addojuvvon.”

Jesusa Kristusa bálvaleaddjin mun cealkkán,  
ahte du suddut addojuvvojit ándagassii

Áhči ja (+) Bártni ja Bassi Vuoiŋŋa nammii.

2.

**B** Jesus cealká:

“Ustiban, leage dorvvolaš mielain,  
du suddut leat dutnje ándagassii addojuvvon.”

[Su bálvaleaddjin mun gulahan dutnje dán suddubeastima  
Áhči ja (+) Bártni ja Bassi Vuoiŋŋa nammii.]

3.

**B** ”Hearrá lea sin lahka,  
geain lea cuovkanan váibmu,  
ja son beastá sin, geain lea nuonddahallan miella.”  
Jesusa Kristusa bálvaleaddjin mun duodaštan dutnje,  
ahte Ipmil addá árpmustis buot du sudduid ándagassii.

4.

**B** Buotveagalaš Ipmil addos midjiide sudduideamet ándagassii  
ja láidejehkos min agálaš eallimii.

**S** Ámen.

## 5. Rohkos

---

Ávžžuhusa maŋŋá sáhtá leat oanehis jaskes rohkos.

**O** Rohkadallot.

1. Buotveagalaš Ipmil, ráhkis almmálaš Áhčči. Don dovddat min headjuvuoda. Duššefal don sáhtát beastit min. Nanne NN eallin dahkki Vuoiŋŋainat, nu ahte son luohtášii dutnje maddái átestusas. Giitu das, ahte mii oažžut báhcit du oskálíi dorvvolaš mielain. Gula min Bártnát Jesusa Kristusa namas.
2. Beastámet Jesus Kristus. Giitu ándagassiiaddojumis. Atte NN:i návccaid juohke beaivvi dorvvastit du árbmui ja buorrevuhtii. Veahket su johtit du geainnu ja luohhtit du sátnái ja lohpadusaide. Doarjjo su váttisvuodaid ja gillámuša siste. Čuvge su Bassi Vuoiŋŋainat. Čana su ain nannosabbot alccesat. Dán mii rohkadallat du árpmu ja ládisvuoda dihtii.
3. Hearrámet Jesus Kristus, don Ipmila Bárdni. Giitu das, ahte don jodát mu bálldas ja doarjjut mu headjuvuodastan. Oro dorvunan ja várjal mu.

**S** Ámen.

# II Sáni

---

## 6. Biibbalohkan

---

Lohkkojuvvo okta dahje moadde čuovvovaš čálabihtáin. Sáhtta atnit maddái girkojagi čuovvu dahje eará čálabihtáid.

Sál 73: 23–26

Muhto mun bisun álo du luhtte,  
don leat dohppen mu olgeš gihtii.  
Don láidet mu rádiinat,  
ja dasto bajidat mu gudnái.  
Juos mus leat don almmis,  
de mun in sáva šat maidege eatnama alde.  
Juos mu oažži ja váibmu vuoimmehuvvá,  
de Ipmil lea agálaččat mu váimmu bákti ja mu oassi.

Jes 43: 1–3

Hebr 4: 14–16

Go juo mis lea stuora bajimušbáhppa, Jesus, Ipmila Bárdni, guhte lea mannan almmiid čada, de bissot nannosit dán dovddastusas. Ii mis leat dakkár bajimušbáhppa guhte ii sáhte árkkálmastit min headjuvuoda, muhto dakkár guhte lea seammá láhkái geahččaluvvon go miige, dattege sudduhaga. Loaiddastehkot dan dihtii roahkkatvuodain árpmu truvnnu ovdii, vai oččošeimmet váibmoládisvuoda ja árpmu, nu ahte gávnašeimmet veahki rivttes áigái.

Matt 11: 28–30

Jesus cealká:

”Bohtet mu lusa, buohkat geat rahčabehtet ja guoddibehtet lossa nodiid, de attán didjiide vuoinjadusa. Váldet mu geassá badjelasadet ja ohppet mus, dasgo mun lean gierdavaš ja vuol-

legaš váimmus, dalle gávdnabehtet vuoiŋnadusa sieluidasadet.  
Dasgo mu geasis lea buorre, ja mu noaddi lea geahpas.”

## 7. Sárdni

---

## 8. Oskkudovddastus

---

Oskkudovddastus lohkkovuo ovttá jítne.

**S** Mun oskkun Ipmilii, Áhččái, Buotveagalažžii,  
almmi ja eatnama Sivdnideaddjái.

Ja Jesus Kristusii,  
Ipmila áidnoriegádan Bárdnái, min Hearrái,  
guhte sahkanii Bassi Vuoiŋnas,  
riegádii nieida Márjjás,  
gillái Pontius Pilatusa áigge,  
russiinávlejuvvui, jámii ja hávdáduvvui,  
manai vuolás jábmiid riikii,  
bajásčuožžilii jábmiid luhtte goalmát beaivve,  
manai bajás albmái,  
čohkká Ipmila, buotveagalaš Áhči, olgeš gieda bealde,  
ja bohtá fas doppe dubmet calliid ja jábmiid.

Ja Bassi Vuigŋii,  
bassi oktasaš girku,  
bassi olbmuid searvivuoda,  
suttuid ándagassii addojumi,  
oačči bajásčuožžileame  
ja agálaš callima.

## 9. Oktasaš ovddasrohkos

---

Sáhtá atnit maidái iešráhkaduvvon rohkosa.

**B** Rohkadallot.

1. Ealli, buotveagalaš Ipmil. Mii buktit du ovdii oppa eallimeamet.

Mii muitit du ovddas du girku ja dan bálvaleddjiid. Mii giitit eallima sánis, maid don buvttát ain oddasis min gasku.

Mii muitit du ovddas bearrašeamet ja lagamuččaideamet. Mii rohkadallat buot oapmahaččaid, ustibiid ja midjiide ráhkis olbmuid ovddas.

Mii muitit du ovddas buot buohcciid, gillájeaddjiid ja vártnuhemiid. Mii rohkadallat návccaid sidjiide, geaid bargun lea fuolahit heajuin ja buohcciin.

Mii giitit du agálaš eallima doaivvus, man don leat skenken midjiide Jesusis Kristusis. Sutnje dorvvastemiin mii guoddit iežamet, guhtet guoibmámet ja oppa eallimeamet du háldui.

2. Rohkadallot Hearrá,  
ahte son vuolggahivččii juohke sadjái doaivvu ja ráfi illusága.

[Hearrá, árpmit min.]

Rohkadallot Hearrá,  
ahte son gulašii gillájeaddjiid šuohkanasaid.

[Kristus, árpmit min.]

Rohkadallot Hearrá,  
ahte son vuolggahivččii veahkis dohko, gos šlundivuohta sevnjodahtá doaivvu.

[Hearrá, árpmit min.]

**S** Ámen.

## III Eahkedaččat

---

### 10. Oaffarsálbma

---

Sáhtá atnit ovdamearkka dihte sálmma 56, 59, dahje 420.

Sálmma áigge eahkedaččat lágiduvvojit áltárbeavdái. Sálmma sajis sáhtá leat jaskes boddu.

## 11. Eahkedašrohkos

---

### Rohkos ja áсахansánit

Rohkos sáhttá álgit ávžžuhusain: Giitalehkot Hearrá, Ipmileamet.

**B** Bassi Ipmil, don ráhkistat buot olbmuid.

Danin don vuolggahit Jesusa min lusa.

Son buoridii buohcciid, ozai láhppon olbmuid

ja anii fuola buohkain, gudet bohte su lusa.

Son ráhkistii min loahpa rádjai

ja attii eallimis min ovddas.

*Hearrámet Jesus Kristus, dan ija go son behttojuvvui,  
válddii láibbi, buressivdnidii (+) ja doadjalii dan,  
attii máhttájeaddjiidasas ja celkkii:*

*Váldet ja borret. Dát lea mu rumaš,  
mii addojuvvo din ovddas.*

*Dahket dan mu muitun.*

*Nu son válddii maiddái geara, giittii (+) ja celkkii:  
Juhket dás buohkat.*

*Dát gearra lea odđa lihttu mu varas,  
mii golggahuvvo din ovddas*

*suttuid ándagassii addojupmin.*

*Nu dávjá go dii das juhkabehtet,  
dahket dan mu muitun.*

Ráhkis almmálaš Áhčči.

Mii illudit das,

maid Bárdnát lea dahkan min bestojupmin.

Mii giitit du das,

ahte mii gávnnadit Jesusiin Kristusiin dáin mállásiin.  
Buessivdnit min Bassi Vuoiŋŋainat.  
Divtte min buohkaid oktii rámidit du  
almmálaš riikkastat.

Su bokte, suinna ja sus  
gullá dutnje, buotveagalaš Áhčči,  
Bassi Vuoiŋŋa oktavuodas  
gudni ja šearratvuohta álo ja agálaččat.

**S** Ámen.

## 12. Áhččámet

---

Herrá rohkos celkojuvvo ovttá jitnii.

**S** Áhččámet, don guhte leat almmis.  
Basuhuvvos du namma.  
Bohtos du riika.  
Šaddos du dáhttu,  
mo almmis nu maiddái eatnama alde.  
Atte midjiide odne min beaivválaš láibbi.  
Ja atte midjiide min suttuid ándagassii,  
nugo miige ándagassii addit velggolaččaidasamet.  
Alege doalvvo min geahččalussii,  
muhto beastte min bahás eret.  
Dasgo du lea riika ja fápmu ja gudni agálašvuhtii.  
Ámen.

## 13. Herrá ráfi

---

Herrá ráfi sáhtá lohkat dahje lávlut.

**B** Herrá ráfi lehkos dinguin/duinna.

**S** Nu son lehkos maiddái du vuoiŋŋain.



## 14. Ipmila Láppis

---

Liturga sáhhtá doadjit eahkedašláibbi Ipmila Láppis -hymna áigge.

**S** Ipmila Láppis don, guhte guottát máilmmi suttu,  
árpmit min, árpmit.

Ipmila Láppis don, guhte guottát máilmmi suttu,  
árpmit min, árpmit.

Ipmila Láppis don, guhte guottát máilmmi suttu,  
atte midjiide ráfi.

## 15. Eahkedaččaid juohkin

---

### Eahkedaččat

Láibbi juogadettiin celkojuvvo:

Kristusa rumaš, du ovddas addojuvvon.

Viinni juogadettiin celkojuvvo:

Kristusa varra, du ovddas golggahuvvon.

### Loahpahansánit

**B** Mii leat vuostáiváldán Hearrá Jesusa Kristusa. Várjalehkos son min  
agálaš callimii.

**S** Ámen.

### DAHJE

**B** Min Hearrá Jesusa Kristusa rumaš ja varra vurkejehkos oppa min  
vuoigŋa, sielu ja rupmaša agálaš callimii.

**S** Ámen.

## 16. Giittosrohkos

---

**B** Rohkadallot.

1. [Mu siellu, máinno Hearrá,

buot mii lea mu siste,  
máinno su bassi nama!  
Mu siellu, máinno Hearrá,  
ale vajáldahte su buorredaguid!  
Son addá ándagassii buot du sudduid  
ja dálkkasta buot du vigiid.  
Son lonista du heakka hávddis  
ja kruvnnida du árbmugasvuodain ja váibmoládisvuodain.]

Ipmileamet ja Áhččámet.

Mii giitit du,  
ahte don leat bassi mállásiin biebman min.  
Nanne mis oskku, doaivvu ja gierdavašvuoda.  
Giitu, ahte mii oažžut leat headjun du lahka.  
Veahket min bissut eallimis ja jápmimis du oapmin.  
Gula min Bártnát Jesusa Kristusa namas.

2. Almmálaš Áhčči, mii giitit du eahkedaččaid attáldagas,  
maiguin don nanusmahtát min oskku dutnje.  
Ovttastahte min ráhkisvuodain guhtet guimmiidasamet  
ja bisut mis agálaš eallima doaivvu.  
Gula min rohkosa du Bártni Jesusa Kristusa dihtii.

**S** Ámen.

## IV Loahpaheapme

---

### 17. Buressivdnáduš

---

- B** Hearrá buressivdnidivččii din ja várjalivččii din.  
Hearrá čuvgešii muođuidis didjiide  
ja livččii didjiide árbmugas.  
Hearrá jorgalivččii muođuidis din beallái

ja attášii didjiide ráfi.

Áhči ja + Bártni ja Bassi Vuoigŋa nammii.

**S** Ámen.

#### **DAHJE**

**B** Buressivdnidehkos din buotveagalaš ja árbmugas Ipmil,

Áhčči ja (+) Bárdni ja Bassi Vuoigŋa.

**S** Ámen.

## **18. Loahpahanmusihkka**

---

Loahpahanmusihkkan sáhtta leat ovdamearkka dihte sálbma 409, 417, dahje 424.